

Yebac ya Asom a Yesu

Asɔŋ asom a Yesu temer ta kader ka Amera Nɛcɛmpi ŋa Kanu

¹ Wanapa Teyofil,

Inacicas kitabu kem kacɔkɔ-cɔkɔ disre mes mme Yesu enacop kayɔ kɔ kɛtakɛ mɔ,

² haŋ dɔsɔk nde anapɛnɛ kɔ darenc, nte elip kɛsom asom ɔn Amera Nɛcɛmpi ŋa Kanu disre, aŋɛ enayek-yek mɔ.

³ Asom akakɔ ŋɔ Yesu enamentar kance ka mes melarɛm nte enayefe pucuy pa defi mɔ. K'owurar ŋa mata 40 pɛyi wɔyɛŋ, pɛcloku ŋa mes ma dɛbɛ da Kanu.

⁴ Dɔsɔk dɔlɔma nte ŋayi kadi yeri kɔ Yesu mɔ, k'oloku ŋa: «Ta nɛbɔlɛ dare da Yerusalem, mba nɛkar tes nte Papa enasɔŋ temer kadesɔŋ mɔ, tɔkɔ nɛnane icloku mɔ:

⁵ Dɛromun Saŋ encgbat afum teta Kanu, mba nana kɛgbat dɛromun dɛAmera Nɛcɛmpi ŋa Kanu disre kɔ nɛndesɔtɔ mata mamɛ.»

Kɛpɛ ka Yesu dɛkɔm

⁶ Akɔ ŋanaloŋkane mɔ kɔ ŋayif Yesu: «Wɛbɛ, tɛm tante tɔ mɛndelompɔsɛ Yisrayel dɛbɛ ba?»

⁷ K'oloku ŋa: «Tɛncɛmɛ fɛ nu dɔpɔ kacɛrɛ ka tɛm kɔ dɔsɔk nde Apa Kanu encɛmɛmɛnɛ kayɔ tɛfaŋ tɔn kɛtam kɔn disre mɔ.

⁸ Mba nɛndesɔtɔ fɛnɔntar kɔ Amera Nɛcɛmpi ŋa Kanu ŋɛndeder nu-ɛ, tɛm tatɔkɔ nɛndeyɔnɛ atɛŋnɛ aŋɛ mes mencepɛr fɔr yaŋan kirin mɔ nde dare

da Yerusalem, atɔf ɲa Yude fɔp kɔ atɔf ɲa Samari kɛkɛbɛp cɛpɛc ca doru fɔp.»

⁹ Nte elip kɛlɔku tatɔkɔ mɔ, afum aɲɛ ɲanayi di mɔ fɔp ɲanagbɛtɲɛ Yesu nte ancɛɲɛ kɔ mɔ, kɔ kɛp kɛɲkump kɔ, ɲanctam fe sɔ kɛnɛɲk kɔ.

¹⁰ Nte Asom ɔn ɲanagbɛtɲɛ kɔm Yesu pɛɛpɛ darenc mɔ haɲ k'ɔsɔlɛ. Gbɛncana babɔkɔ kɔ mɛlɛkɛ mɛrɛɲ mɛmbɛrɲɛ yamos yomotɛr-motɛr mementɛrɲɛ ɲa,

¹¹ kɔ moloku: «Afum a Kalile, ta ake tɔ nɛncɛmɛɲɛ kɛmɔmɔn kɔm-ɛ? Yesu, wɛkɔkɔ empɛ dɛkɔm fɔr yonu kirin mɔ, tante nɛɲgbɛtɲɛ kɔ pɛɛpɛ mɔ, t'endesɔ-der.»

Wɛcɛnc ka Yudas

¹² K'asom a Yesu ɲalukus Yerusalem kɛyɛfe nde tɔrɔ tɔkɔ aɲwe «Tɔrɔ ta tɔk ya *Olif*», mpɛ pɔntɔbɔlɛɲɛ dare mɔ. Pɛbol-bolu mpɛ dinɛ da aSuyif doncwosɛ fum kɛkɔt pabɛp simiti, dɔsɔk da kɛɲɛsɛm mɔ.

¹³ Nte ɲambɛrɛ dare mɔ, kɔ ɲampe dɛkɛlɔ da kɛrɔɲ nde ɲancndɛ mɔ. Afum aɲɛ ɲanayi di mɔ: Piyɛr, Isan, Sak kɔ Andɛrɛ, Filip kɔ Tɔma, Bartelemy kɔ Matiye, Sak wan ka Alfe, Simɔɲ wɛsimɛ teta atɔf, kɔ Yudas wan ka Sak.

¹⁴ Fɔp faɲan kɛfɔ kin kɔ ɲanckɔ kɛtola Kanu tɛm o tɛm kɔ aran, kɛbɛp ka awɛnc a Yesu, kɔ iya kɔn Mari.

¹⁵ Dɔsɔk dɔlɔma mata mamɔkɔ disrɛ, afum aɲɛ ɲanayi di mɔ, ɲanckɔ haɲ afum tasar tin kɔ wɛcɔ mɛrɛɲ (120). Kɔ Piyɛr ɛyɛfe awɛnc ɔn dacɔ, k'oloku:

¹⁶ «Awɛnc im aɲa: Pɛnamar yecicɛs ya dɛkitabu yɛlarɛ. Ti disrɛ Amera Nɛcɛmpi ɲa Kanu ɲɲɛ Dawuda ɛnanuɲkɛɲɛ kɛlɔku teta Yudas, nwe ɛnasɔlɛ aɲɛ ɲanasumpɛr Yesu mɔ.

17 Analòm Yudas su dacɔ, səpaŋne yebæc yin yayi.

18 Nte elip kəsətɔne abɔf pəsam pa kiciya kɔn mə, k'engbekne, k'entempene tekirin k'ewaline kor kɔ tɔsɔŋe sumpa sɔn fəp kəsamsər dɔntɔf.

19 Tes tɔ nte aka Yerusalem fəp ŋanacəre mə, ti tenasɔŋe pawe dale dadɔkɔ «Hakeldama», itɔ tatɔkɔ kusu kəŋan «Dale da mecir».*

20 Bawo anacic nde Yabura Dawuda disre:

«Kələ kɔn kəyɔ fos,

ali fum ta pəyi ki!»

K'enacicəs sɔ:

«Wələma pələk dəkəcəme dɔn!»

21-22 Mene paməməne afum aŋe ŋanccəmbər su tɔm nte Yesu encpe pəctor kɔ səna mə, mēne wəkin pəyi su dacɔ nwe endeyɔne wətəŋne mes mme menacepər fər yɔn kirin kəyefe ka Yesu afi dacɔ, mēne wəkayi sɔ pəyɔne wənatəŋne mes fəp kələk kəgbət ka Saŋ teta Kanu, haŋ dəsək nde Yesu enayefe su dacɔ mə.»

23 Awa kɔ ŋamentər afum mərəŋ: Matiyas, kɔ Isifu nwe ancwe Barsabas, pacdenjər kɔ sɔ tewe ta Yusu.

24 Kɔ ŋantola Kanu nte: «Wəbe, məna nwe mənəcəre bəkəc ya fəp mə, məmentər su gbasŋa wəkin nwe məlek kədecɔnc Yudas akanje mərəŋ dacɔ mə.

25 Tɔsɔŋe wəkayi kəcɔp su dacɔ yebæc yɔn, pələk dəkəcəme nde Yudas enasak a k'ɔŋkɔ kəfo nke kəmar kɔ mə.»

* **1:19** «Kiciya ka Yudas», məməmən Matiye 26.47-53, 27:3-8. **1:20** Yabura 69.26; 109.8

26 Kɔ ɲaɲkot yampunɲun † kɔ tosurenɛ Matiyas nwe anaberɛnɛ Asom aɲɛ wɛco kɔ pin mɔ.

2

Kɔder ka Amera Nɛcɛmpi ɲa Kanu

1 Ntɛ Dɔsɔk da kɛsata ka Tataka ta wɛco kɛcamɔt dɛnabɔp mɔ, alaɲ a Yesu fɔp ɲanalɔɲkanɛ kɛfo kin.*

2 Gbɛncana babɔkɔ kɔ pukulɛ pɔyɛfɛ dɛkɔm mpɛ pɛnawurɛnɛ pukulɛ pa afɛf ɲɔpɔɲ mɔ, kɔ pɛlas kɛlɔ kaɲkɔ ɲanandɛ disrɛ mɔ.

3 Kɔ membr mowurɔr ɲa mmɛ mɛnawurɛnɛ ma nɛnc mɔ. Kɔ meyerɛsɛnɛ fɔp faɲan, kɔ temer tɛntɔpɲɛ nwe o nwe dɛtɔbu.

4 Kɔ Amera Nɛcɛmpi ɲa Kanu ɲɛndɛr ɲa fɔp, kɔ ɲayɛfɛ kɛcɔp nwe o nwe kusu kɛcuru. Amera Nɛcɛmpi ɲɔncsɔɲɛ ɲa kɛcɔp tatɔkɔ.†

5 Awa tɛm tatɔkɔ aSuyif asumpɔr dinɛ gbɲɲ aɲɛ ɲanayɛfɛ tɔf ya doru fɔp mɔ, ɲanandɛ dare da Yerusalem.

6 Ntɛ ɲane pukulɛ mpɛ mɔ, kɔ ɲayɛksɛ kɛkɔ di. Kɔ pɛnciyɛnɛ acikɛra fɔp ntɛ ɲane afum a Kalile ɲaccɔp nwe o nwe kusu k'acɛkɛra mɔ.

7 Pɛciyanɛ, kɔ kusu kɛwɔs kaɲkɔ disrɛ, kɔ ɲayifɛnɛ: «Afum akaɲɛ ɲalok-loku mɔ, bafɔ aka Kalile ɲɔ ba?

† **1:26** Ntɛ ɲanafɔɲ kɛcɛrɛ tɛfɔɲ ta Kanu mɔ, kɔ ɲamber ca yowurɛnɛ mɛrɔɲ dɛlɔba. Pin tɛwɛ ta Matiyas, pɔkɔ tɛwɛ ta Barsabas. Dɛkɔwurɛ da yi, kɔ wɛkin (Matiyas) ɔsɔtɔ. * **2:1** *Kɛsata ka Tataka ta wɛco kɛcamɔt*: Mɛmɔmɔn ALewy 23.15-21, Sariyɛ 16.9-11. Itɔ kɛrɛn o kɛrɛn aSuyif ɲambɔc kɛsata ka kɛtɛl tatɔkɔ tataka ta wɛco kɛcamɔt (50) kɔ kɛsata ka Kɛcɛpɔr kɛncɛpɔr-ɛ. † **2:4** Mɛmɔmɔn 1.5,8 (toloku ta kɛsɔɲ temer Amera Nɛcɛmpi ɲa Kanu.)

⁸ Ake'səŋe nte səna dacə, fum o fum ene ŋaccəp kusu kən mə?

⁹ AParto, aMede, aka Elam, aka Mesopotami, aka Yude, aka Kapados, aka Ponto, kə aka Asi,

¹⁰ aka Firiki, aka Paŋfili, aka Misira, aka Libi ande a atəf ŋa Siren, aRom,

¹¹ aSuyif kə acikəra aŋe ŋanctubucne pətət pa dine da aSuyif mə: Aka Krit, aka Arabi, səŋne ŋa ŋacloku cusu cosu mes məpəŋ ma Kanu!»

¹² Kə cusu cəwos ŋa kə pəyi ŋa yamayama, kə ŋayifene tanjan: «Cəke cə tante toloku-e?»

¹³ Mba kə aləma ŋaŋfani ŋa, ŋacloku: «Member mobotu mə ŋanembəre!»

Kəcam ka Piyer

¹⁴ Kə Piyer eyefe k'encəme kə asom a Yesu aŋe wəco kə pin, k'empene dim pəcloku kənay nke: «Afum a Yude kə nəna aŋe nənde dare da Yerusalem mə, nəsu ləŋəs, nəcəŋkəl belbel moloku mem! Nəcəre ti:

¹⁵ Afum akanəŋe ŋancis fe pəmə təkə nəcəmcemne ti mə, bawo bətbət b'ayi bambə. ‡

¹⁶ Mba təkə aŋnabi Yowəl enaloku mə teyi kəcəpər:

¹⁷ Kə Kanu kəloku mata məlpəs:

«Indesamsər Amera ŋem nnə afum fəp ŋayi mə. Awut anu arkun kə aran ŋande ŋacdəŋk cəsayibe-e. Indesəŋ awut atemp anu kəŋəŋk ka məyə mem, indewerəpəs sə afum anu atem.»

¹⁸ <Ey> Kanu kəloku, <Indeyerəs Amera Necempi ŋem acar em arkun kə aran,

‡ **2:15** *Bawo bətbət b'ayi bambə* = itə kusu ka aka Kresi koloku: «Dec maas da dəsək də dandə» = 9:00, bərbət.

mata maməkə, ɲandedəŋk cəsayibɛ-e.

¹⁹ Indementər mes mɛwɛywey mɛlarəm dəkəm
kə mɛgbəkərə ma Kanu nnə dəntəf: Mecir, nɛnc, kə
acul ɲa kinimɛ.

²⁰ Dec dendesəkrɛ kubump,
kə ɲof ɲesəkrɛ mecir.

Maməkə mendecepər a dəsək da Wəbɛ dedebər,
dəsək dadəkə dəmbək kə dentesɛ.

²¹ Nwɛ o nwɛ endekornɛ Mariki mə endefis.⟩

²² Afum aka Yisrayel, nəcəŋkəl moloku mamɛ!
: Yesu wəka Nasarɛt, fum nwɛ Kanu kəmentərə
nu debeki dən mə, dəmes mɛwɛy-wɛy, dəməpəŋ,
dəmɛgbəkərə pəmə tatəkə nəncərə ti mə,

²³ fum wəkawɛ anasəŋ nu kədif kən pəmə təkə
Kanu kənawosɛ ti kə kəsəŋ təkətɛnɛ ta ti mə. Nənim
kə nəncəŋ kə dətək yɛpəmpəl kəmar ka waca wa
acikəra. §

²⁴ Kanu kəyɛkti kə kəŋgbintər kə pəcuy pa defi,
bawo defi dənataɲ fɛ kəməŋkərnɛ kə.

²⁵ Dawuda ɛnanuŋkɛnɛ kəloku dəyɛcicəs
yɛcɛmpɪ tɛta Yesu:

⟨Incəŋk Mariki tɛm fəp fər yem kirin,
ifəyikcɛ, bawo ey'im kəca kətət.

²⁶ It'əsəŋɛ nɛ abəkək ɲem ɲeyi dəkəsata mə, kə
temer tem tesikələ dəpəbotu.

Dis dem yati dendekəŋesəmɛ kəgbəkər amera.

²⁷ Bawo məfədəkəsak im dabiya
məfədəkəsak wəsoku kam pətɛ.

²⁸ Məsəŋ'em kəcərə səpə sa kəcəpərənɛ doru,
kiyi kam ina kəsək kəndekəlas im pəbotu.⟩

2:21 Yowɛl 2.28-32 § **2:23** Acikəra = afum atətəmpər sariyɛ,
atəyənɛ aSuyif. **2:28** Yabura 16.8-11

29 Awenc im aña! Nəwose iloku nu nte kəlan disre teta wətem Dawuda: Enafi, k'awup kə, kə kufu kən kəyi su sə məkə daco.

30 Mba nte Dawuda enayone sayibe mə, encəre sə a Kanu kənadərme kə a kəndedəs wansə kən wələma dəcəm da dəbe dən kəron.

31 Dawuda enanukenə pənənk kəyefe ka Krist dəkufu *, enanənk nte tendeder mə k'oloku ti: a anasak fe Krist dabiya, dis dən denate fe dəkufu.

32 Yesu wəkakə, Kanu kəyekti kə, səna fəp səyone sede aka ti.

33 Kə Kanu kəmpene Yesu kəfo kələli, k'endəs kə kəca kən kətət. Kə Yesu əsətər nkən apa Kanu Amera Nəcempi nje analoku kədesəñ mə, k'eyerəs tatəkə nənənk kə nəne mə.

34 Bafə Dawuda enape darenc, nkən yati oloku: «Mariki Kanu oloku Mariki mem: «Mənd'em nno kəca kem kətət,

35 hañ iclip kəboc aterene am wəcək wam dəntəf mənas-nas ɲa.»

36 Pəmar aka Yisrayel fəp ɲacəre ti belbel: Kanu kənasəñe Yesu kəyone wəbe wəyek-yek kən, Yesu wəkakə nəncan dətək yepəmpəl mə.»

37 Nte afum ɲane moloku maməkə mə, kə mo-sumpər ɲa, kə ɲayif Piyer kə asom a Yesu akə: «Awenc su aña, cəke cə pəmar səyɔ oɲ-ε?»

38 Kə Piyer oloku ɲa: «Nəsəkpər mera yonu, nəlomp! Nwe o nwe pəsətə kəgbət dərɔmun tewe ta Yesu Krist disre, nte təñsəñe pañañənene kiciya ka wəkayi mə, nəndesətə sə Amera Nəcempi ɲa Kanu.

* 2:31 Krist = Wəbe nwe Kanu kəyek-yek mə, Wəyek-yek ka Kanu
2:35 Yabura 110.1

39 Bawo, kɛpocɛ nkɛ Kanu kɛnasɔŋɛ temer mɔ, konu kɔ, kɔ awut anu kɛbɛp ka akɔ ŋayi pɛbɔlɛ mɔ, haŋ kɛnay ka afum nkɛ Wɛbɛ Kanu kosu endewe mɔ.»

40 Kɔ Piyɛr oloku ŋa sɔ moloku mɛlarɛm ntɛ tɔŋsɔŋɛ ŋanɛnɛ kɔ mes mmɛ mɛnacepɛr fɔr yɔn kirin mɔ. K'ɛŋgbinɛr ŋa, pɛcloku: «Nɔyacnɛ dɛtemp dandɛ dɛŋkafɛlɛ-kafɛlɛ mɔ!»

41 Afum alarɛm ŋawosɛ kɛgbɛt dɛromun teta Kanu. Dɔsɔk dadɔkɔ afum wul maas (3.000) ŋambɛrɛnɛ akɔ ŋananunɛnɛ kɛlan mɔ.

42 Kɔ ŋancɛŋkɛl tɛm fɛp kɔ belbel mɛtɔksɛ ma asom a Yesu, kiyi kɛŋan tes tin, kɛpaŋnɛ kɛŋan dap da yeri,† kɔ kɛtola Kanu.

43 Kɔ kɛnesɛ kɛsumpɛr nwe o nwe bawo Kanu kɛncmentɛrɛ mes mɔpɔŋ kɔ mes mɛwey-wɛy mɛlarɛm waca wa asom a Yesu.

44 Akɔ ŋanalan mɔ fɛp ŋanayi tes tin ŋacyɛrɛnɛ mpɛ o mpɛ ŋaŋsɔtɔ mɔ.

45 Kɔ ŋancamɔs daka dɔkɔ ŋanayɔ mɔ, kɔ ŋayer pɛsam papɔkɔ ŋacmɔmɔn tɔkɔ pɛcucanɛ pɛncepɛrɛnɛ mɔ.

46 Dɔsɔk o dɔsɔk ŋanclɔŋkanɛ ndɛ kɛlɔ kɛpɔŋ ka Kanu, ŋaccinɛnɛ yeri kɛfo kin ndɛ wɔlɔ waŋan, ŋaccinɛ yi mera yobotu kɔ bɛkɛc yoforu.

47 Nackor-koru Kanu, kɔ mes maŋan mɔmbɔt afum fɛp. Kɔ Mariki nkɔn ɛmbɛrɛnɛ dɔsɔk o dɔsɔk kɛgba ka aŋɛ encyac mɔ.

3

Wɛbɛc wɛtɔkɔt ɛntamne

† 2:42 *Kɛpaŋnɛ kɛŋan dap da yeri* = cɔKresi «kɛtɛpɛnɛ kɛcom kɛyɛrɛnɛ ki mɔ»

¹ Dɔsɔk dɔlɔma Piyer kɔ Isanɔ ɲampɛ nde kɛlɔ kɛpɔɲ ka Kanu dec dɛrɔfɔy, dec nde antola Kanu mɔ.

² Tosurenɛ pasare wɛbɛc nwe aɲkome kɛtɔkɔt mɔ. Dɔsɔk o dɔsɔk anckekɛre kɔ padɛs nde kusunɲa ka kɛlɔ kɛpɔɲ ka Kanu. Dɛndo wɛbɛc nwe onctolanɛ daka nɔnɔfɔr disre afum aɲɛ ɲancberɛ kɛlɔ kɛpɔɲ mɔ. Kusunɲa nke ancwe «Kusunɲa Kɛtɔt».

³ Nte ɛnɔɲk Piyer kɔ Isanɔ aɲɛ ɲanckɔ kɛberɛ kɛlɔ kɛpɔɲ mɔ, k'ɛyɛfɛ kɛtola akakɔ nɔnɔfɔr disre.

⁴ Piyer kɔ Isanɔ ɲaɲgbɛtɛne kɔ, kɔ Piyer oloku: «Mɛgbɛtɛne su!»

⁵ K'ɛɲgbɛtɛne ɲa pɛckar kɛdesɔtɛr ɲa paka pɔlɔm.

⁶ Mba kɔ Piyer oloku ɔɲ: «Ali pɛsam iyɔ fɛ, mba ɲpɛ iyɔ mɔ, ip'indesɔɲ'am: Tewe ta Yesu Krist wɛka Nasaret, mɛyɛfɛ, mɛkɔt!»

⁷ Gbɛncana babɔkɔ kɔ ɲasumpɛr kɔ kɛca kɛtɔt kɔ ɲayekti, wɛcɛk kɔ mɛgbɔlkɔc mɔn yɛncɛp.

⁸ Kɛsɔrne katin k'ɛyɛfɛ k'ɛncɛmɛ, k'ɛlɛk wɛcɛk kɛkɔt. K'osol kɔ ɲa, kɔ ɲamberɛ kɛlɔ kɛpɔɲ ka Kanu disre, pɛckɔt, pɛcyoke, pɛckor-koru Kanu.

⁹ Kɔ afum fɛp ɲanɔɲk fum nwe pɛckɔt, pɛckor-koru Kanu.

¹⁰ Ancnɛpɛl kɔ, nkɔn ɛncndɛ nde kɛlɔ kɛpɔɲ nde «Kusunɲa Kɛtɔt», pɛctolanɛ daka nɔnɔfɔr disre. Kɛnesɛ kɔ pɛciyanɛ kɛmbɛp afum fɛp tɛta tɔkɔ tɛnabɛp kɔ mɔ.

Moloku ma Piyer nde kɛlɔ kɛpɔɲ ka Kanu

¹¹ Nte fum nwe ɛnader pɛyi ɔɲ ta ɛɲyɛfɛ Piyer kɔ Isanɔ dɛntɔf mɔ, kɛnesɛ disre kɔ afum fɛp ɲayekse kɛkɔ nde akɛr ɲɛɛ aɲwe «Aker ɲa Sulemani», nde Piyer kɔ Isanɔ ɲanayi mɔ.

12 Nte Piyer enɛŋk ti mɔ, k'oloku afum: «Aka Yis-rayel! Ake'sɔŋe nte tantɛ t'enciyanɛ nu mɔ? T'ake tɔ nɛŋgbɛtnɛnɛ su pɛmɔ fɛnɔntɛr fosu, kɔ pɛyɔnɛ fɛ ti-ɛ, dosoku dosu disrɛ dɔsɔŋɛ fum wɛkawɛ kɛkɔt?

13 Bafɔ tatɔkɔ tɔ de! Mba ti disrɛ, Kanu ka atem asu Kanu ka Abraham, Kanu ka Siyaka, kɔ Kanu ka Yakuba kɛnaye-kɛkɛs wɛmarɛs kɔn Yesu. Mba nkɔn nɛna nɛnalek, kɔ nɛsɔŋ abɛ, nɛce kɔ fɔr ya Pilat kirin, ali nte Pilat ɛnacɛm-cɛmnɛ kɛsak kɔn mɔ.

14 Nɛna nɛnace nwe ɔyɔnɛ wɛcɛmpi kɔ wɛlɔmpu kɔ nɛlɔku a pawosɛ kɛsakɛ nu wɛdifɛt afum dare disrɛ.

15 Nɛnadif wɛkirin wɛka doru, mba Kanu kɛnasɔŋɛ kɔ kɛfɔtɛ afi dacɔ. Sɛn'ɔyɔnɛ atɛŋnɛ aka ti.

16 Anasɔŋ fɛnɔntɛr fum wɛkawɛ nɛŋgbɛtnɛ kɔ nɛncɛrɛ mɔ. Kɛlan kɔn Yesu gbɛcɛrɛm kɛsɔŋ fum wɛkawɛ fɛnɔntɛr. Kɛlan kɔn Yesu kɛsɔŋ kɔ kɛtamnɛ kɛŋ fɔr ya fɛp fonu kirin.

17 Ndekɛl ɔŋ, awɛnc im aŋa, incɛrɛ a kɛtɔcɛrɛ konu kɛnasɔŋɛ nu kɛyɔ tatɔkɔ, nɛna kɔ abɛ anu.

18 Kanu kɛnalas tɔkɔ kɛnanuŋkɛnɛ kɛlɔkɛ cusu ca sayibɛ ɔn fɛp mɔ: A pɛnamar dis dɔlɔl Krist, wɛyɛk-yɛk kɔn.

19 Nɛsɛkpɛr bɛkɛc yonu, nɛluksɛrɛnɛ nte tɔŋsɔŋɛ paŋaŋnɛnɛ kiciya konu mɔ,

20 nte tɔŋsɔŋɛ Wɛbɛ Kanu pɛgbɔkɛrɛ sɔ kɛkɛrɛ nu tɛm ta kɛŋesɛm, Yesu nwe ananuŋkɛnɛ kɛyɛkyɛkɛ nu mɔ.

21 Nkɔn kɔm kɛntɔmpɛr haŋ tɛm nte mes mɛmɛ Kanu kɛnalokɛ tɛm tobol-bolu cusu ca sayibɛ ɔn sɛcɛmpi mɔ melarɛ.

22 Aŋnabi Musa ɛnaloku: «Wɛbɛ, Kanu konu,

endekere nu sayibe pamo ina. Fum wakin waka awenc anu daco endeyi, nade nacanjkal moloku mamako ende pacloku nu mo fap.

²³ Nwe o nwe antodecankal wadank wakako mo, andelasar ko. Endemalke afum a Kanu daco.»

²⁴ Sayibe fap kayefe anjabi Samiyel han ane nanacanc ko mo, nanaloku teta mataka mamako, ko nandank mi.

²⁵ Nana, awut a sayibe no nayone, ko nayone so awut a temer toko Kanu kanacanjəs ko atem anu mo, kacloku Abraham: «Afum a doru fap nandesoto kəpocə kətət kem teta kabənda ka dokom dam.»

²⁶ Te tonu to, Kanu kananunjenə kayekti wəcar kon, k'osom ko kadetolane nu, pasəkpər nu nwe o nwe abəkac nən jelec, nəyone ko jətət.»

4

Piyer ko Isan fər ya aboc kiti aSuyifkirin

¹ Piyer ko Isan nanayi kalok-lokər afum tem nte alonje a kalo kəpən ka Kanu nanabere ko wəbe ka asodar ane nancbum ki mo, ko asadisi.

² Pənatəle na nte nanane Piyer ko Isan nactəkse afum a fap fəndefote afi daco pamo nte Yesu ofote afi daco mo.

³ Ko nasumpər Piyer ko Isan, ko nandəs na pacbum na dəbili han dəkəsək, bawo pənabiyə.

⁴ Afum alarəm aloma ane nanane moloku manan mo, nanalan, delay danan denabər arkun wul kacamat (5.000).

⁵ Dəkəsək abe anan, abeki apən a dətəf, ko atəkse a yecicəs ya Anjabi Musa nambəpsene Yerusalem

⁶ kɔ wəlonɛ wəpɔŋ Anas, kɔ Kayifa, Isan, Aleksandar, kɔ akɔ ŋanayɔnɛ aka kəbənda ka dokom da alonɛ apɔŋ mɔ.

⁷ Kɔ ŋancəmbər Piyer kɔ Isan fɔr yaŋan kirin kəyifət: «Fənɔntər fəre, kɔ tewe ta ana tɔ nəyɔnɛ tantɛ-ɛ?»

⁸ Awa kɔ Amera Nəcempi ŋa Kanu ŋelarɛ Piyer, kɔ ŋɔsɔŋɛ kɔ kəlɔku ŋa: «Abɛ a afum kɔ abeki a dətɔf:

⁹ Ayifət su məkɔ teta pətət mɛ ayɔnɛ wəlanɔyuru mɔ, kɔ ntɛ antaməs kɔ mɔ.

¹⁰ Nəcərə ti belbel, fəp fonu kəbəp ka aYisrayel: Tewe ta Yesu Krist wəka Nasaret, wəkɔ nənacan dətɔk yepəmpəl, akɔ Kanu kənasɔŋɛ kɔ kəfətɛ afi daco mɔ, tewe tən tɔsɔŋɛ ntɛ fum wəkawɛ encəmə nu daco pətamnɛ mɔ.

¹¹ Nkɔn Yesu «ɔyɔnɛ togbu mɛ nənna acəmbər kəlɔ nənafani mɔ, mba enayɔnɛ togbu pətət pa daco.»

¹² Nkɔn gbəcərəm entam kəsɔŋ su kəfis. Kanu kənasɔŋ fɛ tewe təlɔma ta fum nnɔ doru dandɛ ntɛ pəmar payacnɛnɛ mɔ.»

¹³ Ntɛ abeki aŋɛ ŋanəŋk Piyer kɔ Isan ŋabəkɛ mɔ, kɔ pənciyənɛ ŋa, bawo ŋanacərə a afum gbəcərəm ŋanayi aŋɛ ŋanatətəkəs mɔ. Kɔ ŋanepəl ŋa daco akɔ ŋanayi kɔ Yesu mɔ.

¹⁴ Mba ntɛ abeki apɔŋ ŋancnəŋk fum nwɛ anataməs pəcəmə ŋa fɔr kirin mɔ, ŋanayɔ fɛ tolɔku.

¹⁵ Kɔ aboc kiti aSuyif ŋalɔku Piyer kɔ Isan kəwur ka dəkəlɔ ndɛ ancyifət ŋa mɔ, kɔ ŋamɛŋksɛnɛ taŋan,

¹⁶ kɔ ŋayifɛnɛ: «Cəke c'andeyɔ afum akanɛ-ɛ? Bawo tɔsəkər aka Yerusalem fəp a ŋa ŋasɔŋɛ kɔ tɛgbəkərə ta Kanu tantɛ teyi. Afətam kəgbəkəl ti.

17 Mba, nte anyɔ a ta tesam nnɔ afum ηayi mɔ, pabehne ηa, pamone ηa kɛclɔk-locɛr nwe o nwe tewe tatɔkɔ.

18 Kɔ ηawe ηa, kɔ ηambehne ηa kɛtoloku kɔ kɛtɔtɔksɛ afum tewe ta Yesu.

19 Piyer kɔ Isan ηayif ηa: «Pɛmar fɔr ya Kanu kirin palelɛs nɛna patas Kanu Nkɔn ba? Nɛna nɛmɔmɔn ti belbel,

20 bawo sɛna sɛfɔtam kɛyi ta sɛloku tɔkɔ sɛnɛnk kɔ tɔkɔ sɛne mɔ-ɛ.»

21 Kɔ aboc kiti ηanɔgbɔkɛrɛ sɔ kɛbehɛsne ηa, kɔ ηasak ηa. Nanasɔtɔ fɛ tes nte andehne ηa a patɔrɛrɛ ηa ti mɔ bawo afum fɛp ηanckor-koru Kanu teta tɔkɔ tenacepɛr fɔr yanɔn kirin mɔ.

22 Fum nwe enasɔtɔ tɛgbɛkɛrɛ ta kɛtamɛs tatɔkɔ mɔ, enatam kɛsɔtɔ meren wɛco maɔnkɛle pɛcepɛr.

Kɛtola ka alan

23 Nte asak Piyer kɔ Isan mɔ, kɔ ηanɔkɔ ηalɔmɛr afum anɔn tɔkɔ alɔhne apɔh kɔ abeki a dɔtɔf ηanaloku ηa mɔ.

24 Nte ηane moloku mamɛ mɔ, kɛtɔhne disɛ kɔ ηampɛne sim nnɔ Kanu kɛyi mɔ, ηacloku: «Wɛbɛ, mɛna nwe mɛlompɛs kɛm, antɔf, kɛba kɔ ca yɔkɔ yeyi ki mɔ fɛp,

25 dɛAmerɛ Nɛcɛmpi ηɔ mɛnalokɛ kusu ka kas kosu Dawuda wɛmarɛs kam:

«Akesɔhne nte mɛtɛle mɔpɔh mencepɛrɛr afum a tɔf mɔ?

Akesɔhne nte afum ηantɔhne mes mme mɔntɔdelɔpsɛr mɔ?

26 Abɛ a doru kɛrkɛr ηalompɛsne teta kɛyɛfɛrɛne, kɔ akirin ηalɔhkanɛ kɔ ηantɔhne pɛlec

nnɔ Wɔbɛ Kanu kɔ wɔyɛk-yɛk kɔn ɲayi mɔ.›

²⁷ Bawo kance, Herodu kɔ Pɔɲse Pilat ɲantɔɲɛ pɔlɛc dare dandɛ disrɛ atɔyɔnɛ aSuyif kɔ aYisrayel nnɔ wɔmarɔs kam wɔcɛmpi Yesu eyi mɔ, nwe mɔnayɛk-yɛk mɔ.

²⁸ ɲanayɔ mes fɔp mme mɔnanunɲkɛnɛ kɔwosɛ kɔyɔ mɔ.

²⁹ Ndɛkɔl on, Wɔbɛ, mɛgbɛkɛrɛ kɔbɛɲɔsnɛ kɔɲan, mɔsɔɲɛ acar am kɔbɛknɛ kɔloku toloku tam kance disrɛ.

³⁰ Mɔtenci kɔca nte tɔsɔɲɛ kɔtamɔs, mɛgbɛkɛrɛ, kɔ mes mɛwɛy-wɛy meyi tewe ta wɔcar kam wɔsoku Yesu.

³¹ Nte ɲalip kɔtola Kanu mɔ, kɔ kɔfo kɔɲkɔ ɲanalɔɲkanɛ mɔ kɔyikcɛ, kɔ Amera ɲɛcɛmpi ɲɔsɔɲɛ fɔp faɲan kɔloku toloku ta Kanu kɔbɛknɛ disrɛ.

Alaɲ Yesu ɲawosɛ kɔyɛrɛnɛ daka daɲan

³² Kɔnay nke kɔnalaja mɔ, ɲasɔtɔ bɛkɛc yin yayi, kɔ ɲayɔnɛ sɔ akin ayi. Nwe o nwe oncloku fɛ a nkɔn sona ɔyɔ daka dɔn, mba a fɔp faɲan fɔ ɲanapaɲɛ di.

³³ Asom a Yesu ɲancloku tɔkɔ ɲananɔɲk kɛfɔtɛ ka Mariki Yesu afi dacɔ mɔ. Kɔ kɔmar ka Kanu kɔyi alaɲ fɔp kɔron.

³⁴ Afum akanɛ dacɔ, nwe o nwe abɛkɛc ɲɛnalɛcɛ fɛ sɔ teta kɔtɔyɔ kɔn daka, bawo aɲɛ ɲanayɔ dale, kɔ pɔyɔnɛ fɛ ti wɔlɔ mɔ, ɲanacamɔs yi. Kɔ ɲaɲkɛrɛ kɔway ka ca yayɔkɔ,

³⁵ kɔ ɲambocɔr ki asom a Yesu dɔntɔf. Kɔway kɔɲkɔ k'ancyer nwe o nwe kɔ tɔkɔ pɛcuca pɛyi kɔ mɔ.

³⁶ Isifu waka kor ka Lewy enayi, nwe asom a Yesu nancwe Barnabas ma, ito tato ko kusu kanjan «Wacapas bakac.» Nde dare da Sipar anakom ko.

³⁷ Nkon enacaməs antof nne enayo ma, k'enkere kaway kan ko fap k'ender pabocar ki asom a Yesu dantof.

5

Ananias ko Safira

¹ Warkun walama enayi pacwe ko Ananias, ko wəran kon Safira, ko nancaməs antof nanjan.

² Katəhne disre ko wəran kon, k'Ananias embelar kaway ka antof nanjo ko k'enkere kaway kaləpəs nke k'onjo pabocar ki asom a Yesu dantof.

³ Ko Piyer eyif ko: «Ananias, ake'səhne nte məwose Sentani səsəh am kayembər Amera Necempi ma? Məmbelar kaway ka dale.

⁴ Nte dale dandə denayəne dam ma, ak'enasəhne ta məmənkarne di-ε? Ali nte mənacaməs di ma, pəsam papəko, bafə pam pənayi ba? Akəsəh'am kayə tantε-ε? Bafə afum ηə məyembər de, mba Kanu!»

⁵ Nte Ananias ene moloku maməko ma, k'entempene, k'engbiη kifir, k'efi. Ko kənesə kəpəh kəsumpər akə nanane ti ma fap.

⁶ K'atemp ηayefe ko nanepsər ko arəfan, ko nanjo ηawup.

⁷ Nte dec maas dencepər ma, ko wəran ka Ananias embere, ta encərə təkə tenacepər ma.

⁸ Ko Piyer eyif ko: «Məlok'im ma kance: Kaway kanke ko nancaməs dale ba?»

Ko wəran nwe oloku «Ey, kaway kanjo yati ko.»

⁹ Ko Piyer oloku ko: «Akəsəhne nte nəntəhne ko nəwak Amera ηa Wəbe ma-ε? Məcəre a anη ηawup

wos ɛm mɔ, ɲayi nde dɛkusunja, kɛkɛkɛrɛ kɔ ɲander sɔ mɛna.»

¹⁰ Gbɛncana babɔkɔ k'entɛmpɛnɛ kɔ wɛcɛk dɛntɔf, k'ɛngbiɲ kifir. Kɔ atɛmp ɲambɛrɛ kɔ ɲambɛp kɔ pɛfi. Kɔ ɲaɲkɛkɛrɛ kɔ, kɔ ɲaɲkɔ ɲawup wos kɛsɛk.

¹¹ Kɔ kɛnɛsɛ kɛpɔɲ kɛsumpɛr kɛlonjanɛ ka alan fɛp kɔ akɔ ɲanane moloku mamɔkɔ mɔ.

Asom a Yesu ɲanatɔmpɛr mes mɛwɛy-wɛy mɛlarɛm ma Kanu

¹² Asom a Yesu ɲancyɔ mɛgbɛkɛrɛ kɔ mes mɛwɛy-wɛy mɛlarɛm mɛmɛ mɛnɲayi afum dacɔ mɔ. Alan fɛp ɲanacɛmɛ kɛfo kin nde akɛr ɲɲɛ ancwɛ «Akɛr ɲa Sulemani» mɔ.

¹³ Afum alpɛs ɲancnɛsɛ kɛnɔɲkɛl ɲa, mba ɲancyɛkyɛkɛs ɲa.

¹⁴ Kɛnɲay ka arkun kɔ aran aɲɛ ɲanalan Wɔbɛ mɔ, ɲancla ɔɲ kɛla dɛm.

¹⁵ Packɛrɛ atɔtamnɛ sɛpɔ fɛp packɛrɛ ɲa dɛyala kɔ dɛsɛpoko ntɛ tɔsɔɲɛ kɔ Piyɛr ender-ɛ, andulu ɲɔn gbɛcɛrɛm ɲɛtam kɛbɛp wɛlɔma mɔ.

¹⁶ Kɛnɲay ka afum aɲɛ ɲanɲayi sɛdare nɛsɛ sɛnakɛl Yerusalem mɔ, ɲancyɛkɛsɛ kɛkɛrɛ Yerusalem atɔtamnɛ nde asom a Yesu ɲanɲayi afum aɲɛ yɔɲk yɛlɛc yɛnasɔɲ dotonkulu mɔ, fɛp fanjan anatamɛs ɲa.

Antɛrɛs asom a Yesu tɛta kɛlan kɛjan

¹⁷ Wɛlonɲɛ wɛpɔɲ kɔ aSadisi aɲɛ ɲasol mɔ ɲayɛfɛnɛ kɛraca.

¹⁸ Kɔ ɲantɛp asom a Yesu waca kɔ ɲambɛr ɲa dɛbili.

¹⁹ Pibi papɔkɔ disrɛ kɔ mɛlɛkɛ ma Wɔbɛ Kanu mɛngbiti cumba ca bili babɔkɔ, kɔ mowurɛnɛ ɲa. Kɔ mɛlɛkɛ moloku ɲa:

20 «Nɛkɔ kɛlɔ kɛpɔŋ, nɛloku afum moloku kɔ mes fɛp ma tɔkɔtɛnɛ ta doru dandɛ.»

21 Ntɛ ɲane moloku mamɔkɔ mɔ, kɔ asom a Yesu ɲaŋkɔ bɛtbɛt suy nde kɛlɔ kɛpɔŋ, kɔ ɲancop kɛtɔksɛ di afum.

Kɔ wɛloŋnɛ wɛpɔŋ ender kɔ akɔ ɛnasolɛ mɔ. Kɔ ɲawe aboc kiti alpɛs aSuyif kɔ abeki apɔŋ aka Yis-rayel fɛp, kɔ ɲasom a pakɔ pawurɛnɛ asom a Yesu dɛbili, pakɛɛ.

22 Kɔ asɔdar ɲafɔ ɲakɔ afum aɲɛ ɲawur ɲambɛp fɛ ɲa dɛbili, kɔ ɲalukus. Kɔ ɲaŋkɔ ɲaloku ti abɛ aɲɛ ɲanasom ɲa mɔ, ɲacloku:

23 «Sɛŋkɔ sɛbɛp cumba ca bili pacanɲ ci belbel, abum a ci ɲacɛmɛ dɛkɛcɛmɛ danɲan, mba sɛŋgbiti ali fum sɛmbɛp fɛ bili disrɛ.»

24 Ntɛ ɲane moloku mamɔkɔ mɔ, kɔ pɛyi wɛbɛ ka asɔdar a kɛlɔ kɛpɔŋ kɔ alonɲɛ apɔŋ yamayama teta afum akanɛ, kɔ ɲayifnɛ cɛke cɔ tes tantɛ ten-delɛpɛsɛr-ɛ?

25 Kɔ fum wɛlɔma ende pɛloku ɲa: «Afum aɲɛ nɛnabɛr dɛbili mɔ ɲayi nde kɛlɔ kɛpɔŋ, ɲactɔksɛ afum.»

26 Asɔdar a kɛlɔ kɛpɔŋ kɔ wɛbɛ kɛŋan ɲaŋkɔ kɛlɛk asom a Yesu, kɔ ɲaŋkɛɛ ɲa pɛforu disrɛ, bawo ɲananɛsɛ afum kɛca-cas ɲa.

27 Ntɛ asɔdar ɲaŋkɛɛ asom a Yesu mɔ, kɔ ɲancɛmbɛr ɲa fɔr ya aboc kiti aSuyif kirinɲ. Kɔ wɛloŋnɛ wɛpɔŋ eyifɛt ɲa,

28 k'oloku: «Bafɔ sɛnamɔnɛ nu kɛtɔksɛ sɔ afum teta tewe tantɛ ba? Nɛlas Yerusalɛm mɛtɔksɛ monu! Kɔ nɛloku gbɛs a mɛnɛ nɛloŋɛr su pɛlɛc pa defɛ da fum wɛkawɛ.»

29 Piyer kɔ asom a Yesu ŋaloku: «Kɛcɛŋkɛle Kanu kɛncepɛr ka afum!

30 Kanu ka atem asu kɛnasɔŋɛ Yesu kɛfɔte dɛdefi, nwe nɛnacan dɛkɛtɔk yepɛmpɛl mɔ.

31 Kanu kɛndɛsɛrne kɔ kɛsɛk bawo nkɔn ɔyɔne wɛkirin kɔ wɛyac, nte tɔŋsɔŋɛ pɛsɔŋ aka Yisrayel kɛsɛkpɛr bɛkɛc ŋacɛme dɔpɔ da Kanu darɛŋ, paŋaŋɛne ŋa kiciya kɛŋan mɔ.

32 Sɛna sɔyɔne atɛŋne a moloku kɔ mes mamɔkɔ fɛp, sɛna kɔ Amera Nɛcempɛ nŋɛ Kanu kɛsɔŋ aŋɛ ŋalɛlɛs kɔ ŋawosɛ toloku tɔn mɔ.»

33 Pɛnatɛle aboc kiti aŋɛ ŋanccɛŋkɛl ŋa mɔ han pɛcepɛrɛr, kɔ ŋafan kɛdif ŋa.

34 Mba wɛFarisi wɛlɔma ɛnayi ŋa dacɔ, pacwe kɔ Kamaliyel. Wɛtɛkse sariye ɛnayi, nwe afum fɛp ŋanabɔtɛr mɔ. K'eyɛfe aboc kiti aSuyif dacɔ, k'oloku a pawurene afum akanɛ kɛresna,

35 k'oloku: «Arkun a Yisrayel! Nɛkembɛrne belbel nte nɛndeyɔ afum akanɛ mɔ.

36 Towon fɛ, Tudas ɛnadot banca, afum masar maŋkɛle (400) ŋanacɛk kɔ darɛŋ. Mba anamɛlɛk kɔ, afum akɔ ɛnasolɛ mɔ fɛp k'ambɛlɛs ŋa. Ali wɛkin anasak fɛ.

37 Nte tatɔkɔ tencepɛr mɔ, kɔ Yudas wɛKalile ɛyɛfe tɛm nte anclɔm afum a dɔtɔf mɔ. K'osolɛ sɔ afum alarɛm. Nkɔn sɔ anamɛlɛk kɔ, aŋɛ ɛnasɛp kɛkafɛli kɛcɛme kɔ darɛŋ mɔ fɛp, kɔ ŋasamɛsɛr.

38 Nɛkɛl icloku nu, ta nɛcɛpsɛr afum akanɛ, nɛsak ŋa ŋakɔ. Kɔ pɛyɔne a mɛfan, kɔ pɛyɔne fɛ ti mɔyɔ maŋan nda fum mɛŋyɛfe-ɛ, mɛndɛsɛlɛ.

39 Mba kɔ pɛyɔne a nda Kanu mɛŋyɛfe-ɛ, nɛfɔdetam kɛsɛlɛne mi de! Nɛkɛmɛrne

kadeyefarene ko Kanu de!» Ko hane moloku mamoko Kamaliyel enasero keloku na mo.

⁴⁰ Ko hawe asom a Yesu, ko nasut na, ko namone na katosolok-loke tewe ta Yesu, ko nasak na.

⁴¹ Ko asom a Yesu nawur na aboc kiti asuyif daco. Ko pambot na kataras kanan teta kalelas ka tewe ta Yesu.

⁴² Dosok o dosok payone nde kelo keroj ka Kanu ko payone fe ti nde wolo wanjan, nanasak fe kactakse ko kacam moloku motot: A Yesu yone Krist, wabe nwe Kanu kayek-yek mo.

6

Ayek-yek arkun camat-meraj kamar ka asom a Yesu

¹ Mata mamoko nte acerse a Yesu nancla kela dam mo, asuyif acoro kusu ka Kresi nayefe kacopasne teta ako nanccoro Ebare mo. Aran acoro cokeri ane awos anjan nafi mo nancoto fe yeri pamo acoro Ebare dosok o dosok ko andeyer-e.

² Ko Asom waco ko meraj hawe kanay ka acerse a Yesu kanenkenene, ko jaloku: «Pamar fe su kasak kacam ko cactakse toloku ta Kanu teta kayeri yeri.

³ Awa awenc su ana, nayek-yekene arkun camat-meraj, ane afum nancore kayo mera yotot mo, jalare so Amera Necempi na Kanu ko kacore kakot. Seroj ayek-yek anu akako yebac yayoko.

⁴ Sana sasumpar belbel ketola ka Kanu ko yebac ya kacam ko cactakse toloku ta Kanu tem fep.»

⁵ Ko moloku mamoko mambot afum fep, ko nayek-yek Etiyen, fum wolan Kanu weroj, palare Amera Necempi na Kanu, ko Filip, ko Pirakor, ko Nikanor, ko Timon, ko Parmenas, ko Nikola, waka dare da

Antiyok, nwe enayone wacikera kabere ka dine da aSuyif mo.

⁶ Ko nanako namentar ayek-yek akako asom a Yesu nte nalip katola Kanu mo, ko nanden ja waca kadas kanan.

⁷ Moloku ma Kanu mme anctakse mo mencesam kasam dam, ko acerse a Yesu jala katana katana Yerusalem, ko alonne Kanu alaram jawose kelan Yesu.

Kasumpar ka Etiyen

⁸ Kanu kanmar Etiyen ko kason ko katam kayo ka mes mewey-wey ko megbekere mopon ma Kanu afum daco.

⁹ Afum aloma aka dakatola Kanu da aSuyif ane ancwe ki «kalo ka Awur dacar» mo, nanayine fe Etiyen. Ja nanayone afum aka atof ja Siren, aka dare da Aleksandar ko afum a atof ja Silisi, ko aka atof ja Asi. Nte to ko namberere kagbekelene ko Etiyen.

¹⁰ Mba nanatam fe kasumpar ko damoloku, bawo Amara Necempi ja Kanu nenason ko kalok-loke deceran.

¹¹ Ti disre, ko afum akako nason calbante pasam ane nanaloku nte: «Sana sannen ko kalomas Musa ko Kanu!»

¹² Ko namberas afum mer kayefe abeki a dotof han atakse sariye. Ko nasumpar Etiyen, ko nankekere ko for ya aboc kiti aSuyif kirin.

¹³ Ko nankenene so calbante akako nanawose kayeme mo, nacloku: «Fum wakawe eyi fe nte o nte mene kaloku peler pa kifo kasoku kanke ko sariye sa Musa.

¹⁴ Sənenε kə pəcloku a Yesu wəNasarət wəkawε endeləsər kəfo kanke, pəsəkpər sə məyo mme Musa enasakε su mə.»

¹⁵ Aboc kiti aSuyif fəp ηanagbatne Etiyen, bawo kəro kən kəncmot pəmə ka mεlekε.

7

Etiyen nde fər ya aboc kiti kirin

¹ Kə wəlonne wəpəη wəka kələ kəpəη ka Kanu eyif Etiyen: «Itə teyi ba?»

² Kə Etiyen oloku: «Awenc im aηa, Papa kem aηa, Nəcənkəl im! Kanu nke debeki dən dəηmot mə kənwurər Abraham, wətem kosu, nte enayi Mesopotami, ta entadeder kənde Harəη mə.

³ Kə Kanu kəloku Abraham: «Məwur atəf ηam, dəηkom dam, məkə nde atəf nηε indekəmentər əm mə.»

⁴ Kə Abraham owur atəf ηa Kaldi, k'əηkə pənde dare da Harəη. Dəndo, nte defi da kas dencepər mə, kə Kanu kəncepərəne kə atəf ηaηε nənde oη ndekəl mə.

⁵ Kanu kənasəη fe Abraham ke atəf ηaηε, ali dəkəcəmbər kəcək, mba kənalεkε kə temer kədesəη kə ηi kəbəp kəbənda ka dokom dən kə nkən encepər-ε, mba tēm tatəkə ta entayo wan-ε.

⁶ Kə Kanu kəloku Abraham nte: «Kəbənda ka dokom dam kəndeyi decikəra atəf ηələma. An-dekəcəmbər ηa di dacar, patərəs ηa meren masar maηkələ (400).

⁷ Mba afum aka atəf ηaηəkə ηandekəcəmbər ηa dacar mə, in'endekəbocər ηa kiti. Kə tencepər-ε, ηandewur ηadekor-kor im nnə kəfo kanke.»

⁸ Nte tatəkō tencepær mō, kō Kanu kəncanəſ kiyi kōn tetin kō Abraham, ti tōyōne kəmeŋkərne ka kəkənc arkun. Ti disre kō Abraham oŋkom Siyaka, k'ēŋkənc kō tataka tən ta camət-maas. Itō Siyaka enayō sō Yakuba, kō Yakuba ōyō sō ti awut ɔn arkun wəco kō mērəŋ, aŋe ŋayōne cas ca cusuŋka wəco kō mērəŋ ca Yisrayel mō.

⁹ Nte atem asu, awut a Siyaka, ŋanayōne wenc kəŋan Isifu kəraca mō, kō ŋancaməs kō nte tōŋsəŋe pakekəre kō Misira mō. Mba Kanu kənayi kō Isifu,

¹⁰ kənayac kō pəcuca fəp. Kanu kəncmar Isifu, kəcsəŋ kō kəcəre kəkət nde Firawona wəbe ka Misira fər kirin. Firawona enasəŋ Isifu dekirin da Misira kō da kələ kōn disre fəp mō.

¹¹ Kō dor dəpəŋ dende deyi Misira fəp kō atəf ŋa Kanaŋ. Pəcuca pənabek, atem asu ŋancsətō fē yeri.

¹² Kō Yakuba ende pəne a cəgbay cəyi Misira, k'osom təcəkō-cəkō awut ɔn aŋe ŋantəŋne atem asu mō.

¹³ Tamērəŋ, kō Isifu owurərne awenc ɔn, nte tō kō Firawona ɔsətō kəcəre oŋ akomene a Isifu.

¹⁴ Kō Isifu osom awenc ɔn a pakere kō kas Yakuba, kələkene ka afum ɔn fəp, aŋe ŋancbəp afum wəco camət-mērəŋ kō kəcāmət (75) mō.

¹⁵ Kō Yakuba ontor atəf ŋa Misira. Difō enafi, kō atem asu alōma.

¹⁶ K'əŋkekəre cəbel cəŋan Səkem, k'əŋkō pawup nde kufu nkē Abraham enawaye pəsam nno kusuŋka ka Hamər kəyi mō.

¹⁷ Tem nte pənamar a Kanu kəlas temer nte kənaləke Abraham mō tənələtərne. Kō dokombəra dəmbek, kō afum ŋaŋla oŋ kəla dəm Misira,

18 haŋ kɔ wɔbɛ wɔlɔma ender pɛndɛ dɛbɛ da atɔf ŋaŋɔkɔ nwe ɛnatɔcɛrɛ Isifu mɔ.

19 Wɔbɛ wɔkakɔ ender pɛcnɛmpɔs, pɛctɔrɔs atem asu. K'ende pɔsɔŋɛ ŋa kɔsak cɛnaka cɛŋan, ntɛ tɔŋsɔŋɛ ta akakɔ ŋantam kɛyi doru mɔ.

20 Tem tatɔkɔ t'anakom Musa, nwe ɛnabɔt Kanu kɛnɛŋk mɔ. K'antɔmpɛr kɔ yof maas nde kɔlɔ ka kas disrɛ,

21 mba ntɛ tɔyɔ tɛnatɔyi mɛnɛ kɛgbal kɔn mɔ, kɔ wan ka wɔbɛ ka Misira wɔran efir kɔ, k'ɔŋkɔ pɛdusum pɛyɔ kɔ wan.

22 Kɛcɛrɛ kɛkɔt fɛp k'aMisira k'anadusumɛ Musa, k'ɔsɔtɔ fɛnɔntɛr dɛmoloku kɔ dɛmɔyɔ.

23 Ntɛ Musa ɔsɔtɔ meren wɔcɔ maŋkɔlɛ (40) mɔ, k'ende pɛcɛm-cɛmnɛ kɛkɔnɛŋk awɛnc aŋa, afum a Yisrayel.

24 Kɔ Musa ɔŋkɔ pɛtɔŋnɛ wɛnc wɛkin wɛka Misira paccakɛra, k'ɛncɛmɛnɛ wɛnc wɛkakɔ anctɔrɔs mɔ. K'olukse ayɛk ŋa wɛnc, k'endif wɛMisira.

25 Kɔ Musa ɛncɛm-cɛmnɛ a awɛnc aŋa ŋaŋtam kɛcgbɛkɛrɛ a Kanu kɛntam kɛban ŋa kɔ ŋancɛmɛ kɔ darɔŋ-ɛ, mba ŋanacɛrɛ fɛ ti.

26 Dɔckɔsɔk, kɔ Musa ɔŋkɔ pɛbɛp aYisrayel mɛrɔŋ ŋacsutɛnɛ, k'ɛyac ŋa, k'olɔmpɔs ŋa dacɔ. K'eyif ŋa: <Ta ake tɔ nɛŋsutnɛnɛ tantɛ-ɛ? Dɛwɛnca dɔ nɔyɔ!>

27 Mba wɛkɔ ɛncɛkɛra wɛnc mɔ, ɛwɛn Musa pɛcyif: <An'ɔsɔŋ ɔm kɛyɔnɛ wɔbɛ kɔ wɔbɔc kiti sɛna dacɔ-ɛ?>

28 Kɛdif im kɔ mɛfan ba, pɛmɔ tɔkɔ mɛndifsa wɛMisira mɔ?>

29 Kɔ moloku mamɔkɔ mɔsɔŋɛ Musa kɔyɛkse, k'ɔŋkɔ pɛndɛ decikɛra atɔf ŋa Madiyan. Difɔ ɛnakom awut arkun mɛrɛŋ.

30 Ntɛ meren wɔco maŋkɛlɛ mencepɛr (40) mɔ, kɔ mɛlɛkɛ mowurɛr Musa ndɛ tɛgbɛrɛ ta tɔrɔ ta Turisnina dɛmemer ma nɛnc ndɛ dɛncmar dɛrɛntɛm mɔ.

31 Ntɛ Musa ɛnɔŋk ti mɔ, kɔ pɛnciyɛnɛ kɔ kɛnɔŋk ka tes tɛwɛy-wɛy tatɔkɔ, ntɛ ɔncɔŋɛ kɛkɔgbɛkɛrɛ mɔ, kɔ dim da Wɔbɛ Kanu dender kɔ:

32 ‹In'ɔfɔ, Kanu ka atem am: Kanu ka Abraham, ka Siyaka kɔ ka Yakuba!› Musa pɔcyikcɛ, ta ɔŋwɔsɛ sɔ kɛgbɛtɛnɛ di-ɛ.

33 Kɔ Wɔbɛ oloku kɔ: ‹Mɔwurɛ cɔfta cam dɔwɛcɛk, bawo kɛfo kanɔkɔ mɛncɛmɛ mɔ, kɛfo kɛcɛmpi kɔ.

34 Inɔŋk pɔcuy pa afum em aŋɛ ŋayi Misira mɔ, ine kigbis kɛŋan: Kɛtor k'inder ideyɛc ŋa. Nɛkɛl ɔŋ, mɛdɛr isom ɛm Misira.›

35 Musa wɛkakɔ ŋanace a ŋaloku: «An'ɔsɔŋ ɛm kɔyɔnɛ wɔbɛ kɔ wɔbɔc kiti sɛna dacɔ-ɛ?» Nkɔn Kanu kɛnasom pɔyɔnɛ wɔbɛ kɔ wɔyɛc, kɛbɛrɛnɛ ka mɛlɛkɛ mɛmɛ mɛnawurɛr kɔ ndɛ dɛrɛntɛm mɔ.

36 Nkɔn Musa ɛnawurɛnɛ aYisrayel Misira pɔcyɔ mes mɛwɛy-wɛy kɔ mɛgbɛkɛrɛ ma Kanu, ndɛ kɛba Kɔyim kɔ ndɛ dɛtɛgbɛrɛ, meren mɛmɛ wɔco maŋkɛlɛ (40) disrɛ.

37 Nkɔn Musa wɛkakɔ yati ɛnaloku aYisrayel: ‹Kanu kɛndekɛrɛ nu sayibɛ pɛmɔ ina, nɛwɛ kɛndeyɛk-yɛk awɛnc anu dacɔ mɔ, pɛsom kɔ nnɔ nɔyi mɔ.›

38 Nkøn Musa, nte afum ñanalønkanε nde dætegbære mæ, nkøn enayønε sæ wæcepærenε moloku atem asu dacæ kæ mæleke mmε monclok-lokær kæ nde dætæræ ta Turisnina mæ. K'æsætæ moloku meyi wæyen, nte tønsonε sæcære mi mæ.

39 Atem asu ñanafan fe kæcønkal kæ, kæ ñawenæs kæ. Ñanacem-cemne dæbækæc kaluksærne Misira.

40 Kæ atem asu ñaloku Aruna, «Mælompæse su mæranja, mmε mendesole su mæ, bawo Musa nwe owurenε su Misira mæ, sæncære fe nte tæsætæ kæ mæ.»

41 Mata mamækæ, kæ ñalompæs terænka ta tura, kæ ñalønne nnæ terænka kirin, kæ ñamboce kæсата yebæc ya waca wanjan.

42 Mba kæ Kanu kæmber ña kumunt, kæ kæsake ña kækor-koru ca ya darenc. It'ancic ti buk ba sayibe disre:

«Næna aka Yisrayel,

meren wæco mankæle (40) mmε næncepærenε dætegbære mæ, in'æ næncdife sem kælonne disre ba?

43 Nænakekære abal ña terænka ta Mælak

kæ terænka ta kæs ka kanu konu Refan.

Nænapat mæranja teta kæctontnεne ka mi fæ kirin!

Ti disre kækekære nu k'inder decikæra Babiløn tadaræn.»

44 Atem asu ñanayæ dændo dætegbære angbancan ña sede ñne anamænjk walake wa masar nwe Kanu kænacice Musa mæ. Tatækæ tæ wælok-lokær ka Musa enaloku kæ a pæyæ, a ñowurenε kæ ñækæ enanænjk mæ.

45 Nte atem asu ñæsætæ ñi mæ, kæ ñankekære nde atæf ñne Kanu kænabelæs afum fæ wanjan kirin

mə. Yosuwe pəyənə ɲa wəkiriɲ. Anɣbancan ɲaɲəkə
ɲənayi di haɲ tɛm ta Dawuda.

⁴⁶ Kə Dawuda əsətə kəmar ka Kanu, k'ontola sə
kəsəɲ kə kəfo nkɛ əɲkəcəmbərə Kanu ka Yakuba
dəkəyi mə.

⁴⁷ Mba Sulemani ɛnader pələ kələ kaɲkə.

⁴⁸ Mɛnɛ ntɛ Wəbɛ wəka darenc əntəwosɛ kəyi
paka disrɛ mɛrɛ kəca ka fum kələmpəs mə, pəmə
təkə sayibɛ səloku ti mə:

⁴⁹ «Wəbɛ oloku:

«Kəm kəyənɛ dəcəm dem da dəbɛ,
kə antəf ɲəyənɛ dəkəcəmbər dem wɛcək.

Ake kələ kə nəyi kəcəmbər em-ɛ?

Kəfo kərə k'inde icɲesəm-ɛ?

⁵⁰ Bafə kəca kem kələmpəs mame fəp ba?»

⁵¹ Nəna afum atəɲi ləɲəs, ayə bəkəc pəmə bi-
lakoro! Haɲ məkə nəna nəyi kəwɛnəs Aməra
Nəcɛmpi ɲa Kanu pəmə atem anu!

⁵² Sayibɛ səre atem anu ɲanatətərəs-ɛ? Njanadif
aɲɛ ɲananuɲkɛnɛ kədəɲk kəder ka Wələmpu nwe
nəna nənasəɲ oɲ a kə andif mə.

⁵³ Nəna aɲɛ nənasətə sariyɛ sa Musa nse mɛlɛkɛ
ma Kanu mɛnaloku kə mə, mba nənakətɛnɛ fɛ si,
nəmɛɲkərɛnɛ fɛ sə si.»

Kədif ka Etiyɛn

⁵⁴ Ntɛ Etiyɛn onclək-loku mə, afum akə ɲancne
moloku maməkə mə, pənananɲkanɛ kətɛlɛ ɲa haɲ
ɲancɲaɲərənɛ sek nnə eyi mə.

⁵⁵ Mba Aməra Nəcɛmpi ɲa Kanu ɲɛncbəc Etiyɛn
dəris. K'ɛɲɣbətɛnɛ kəm, k'ɛnəɲk nərə da debeki da
Kanu, Yesu pəcəmə Kanu kəsək.

56 K'oloku: «Inəŋk kəm kəgbite, Wan ka Wərkun pəcəme Kanu kəsək!»

57 Kə afum aŋe ŋaŋkule-kule pəpəŋ, kə ŋasuncne ləŋəs, kə ŋawetne fəp faŋan kəkəbəp Etiyen.

58 Kə ŋambeləs kə haŋ kə ŋawurene kə dare, kə ŋanca-cas kə masar. Atəŋne aka ti ŋanaboc suma saŋan sa kəroŋ wətəmp dəntəf, nwe ancwe Sol mə.

59 Nte ŋanca-cas kə mə, kə Etiyen ontola pəcloku: «Mariki Yesu, məbaŋ amera ŋem.»

60 Nte tə kə Etiyen encəp suwu, k'əŋkule-kule: «Wəbe, ta məsarsə ŋa kiciya kaŋkəl!» Nte elip kəloku tatəkə mə, k'əŋgbiŋ kifir.

8

1 Sol enawose kədif ka Etiyen.

Sol əntərəs kəlŋkanə ka alaŋ Yesu

Dəsək dadəkə d'anacop kətərəs kəlŋkanə ka alaŋ Yesu dəndo Yerusalem. Kə alaŋ fəp faŋan ŋasaməsər nde təf ya Yude kə Samari, mənə asom a Yesu.

2 Kə afum alompu aləma ŋawup Etiyen, kə ŋambok kə belbel.

3 Kə Sol nkən eyefe kətərəs ka kəlŋkanə ka alaŋ Yesu, pəcbere dəwələ waŋan, pəcwurene ŋa, pəcsumpər arkun kə aran, pəcber ŋa dəbili.

Filip kəcam kən moloku mətət atəf ŋa Samari

4 Alaŋ aŋe ŋanasaməsər mə, ŋanccam moloku mətət mofə fəp mme ŋanccəpər mə.

5 Filip nwe enator dare da Samari mə, enccam teta Krist, nwe Kanu kəyek-yək kəyənə Wəbe mə.

6 Kənaŋ k'afum kətəŋne disre ŋanccəŋkəl belbel təkə Filip oncloku mə, nte ŋancne kə ŋacnəŋk sə megbəkəre ma Kanu mme əncyə mə.

⁷ Yɔŋk yɛɛc yonckule-kule kɛwɔr afum alarɛm dɛris aka dare dadɔkɔ. Anatamɛs atorɛr kɔ afum alarɛm akɔ ŋanafi wɛcɛk mɔ.

⁸ Kɔ pɛbotu pɔpɔŋ pɛmbɛrɛ dare da Samari.

⁹ Wɛrkun wɛlɔma ɛnayi di pacwe kɔ Simɔŋ. ɛnawon dare dadɔkɔ, pɛyɔnɛ dure, pɛcsɔŋɛ aka Samari cusu kɛwɔs, pɛcwɛnɛ sɔ fum wɛpɔŋ.

¹⁰ Afum fɛp kɛyɛfɛ wanfɛt haŋ wɛbeki ŋanalelɛs kɔ, ŋacloku: «Fum wɛkawɛ ɔyɔnɛ fɛnɔntɛr fa Kanu, fɛnɔntɛr fɛkɔ aŋwe <Fɛpɔŋ> mɔ.»

¹¹ Ŋanacɛmɛ kɔ darɔŋ, bawo ɛnawon kɛwɔsɛs ŋa cusu teta dureya dɔn.

¹² Mba nte ŋanalaŋ moloku ma Filip, nwe ɛncɛam moloku mɔtɔt ma dɛbɛ da Kanu kɔ tewe ta Yesu Krist mɔ, k'aŋgbɛt arkun kɔ aran dɛromun teta Kanu.

¹³ Kɔ Simɔŋ nkɔn yati ɛlaŋ moloku ma Filip, k'owosɛ kɛgbɛt dɛromun. K'ɛncɛmɛ Filip dɛntɔf tɛm fɛp. Nte Simɔŋ ɛnɔŋk mɛgbɛkɛrɛ kɔ mes mɛwɛy-wɛy ma Kanu mme mencyi mɔ, kɔ kusu kɛwɔs kɔ.

¹⁴ Nte asom a Yesu ŋanayi Yerusalem kɔ ŋane a aka Samari ŋawosɛ toloku ta Kanu mɔ, kɔ ŋasom Piyɛr kɔ Isan kɛkɔ di.

¹⁵ Nte Piyɛr kɔ Isan ŋantor dare da Samari mɔ, kɔ ŋantolanɛ ŋa nte tɔŋsɔŋɛ ŋasɔtɔ Amera Ŋecempi ŋa Kanu mɔ,

¹⁶ bawo haŋ tɛm tatɔkɔ Amera Ŋecempi ŋɛnatorɛr fɛ nwe o nwe kɛrɛsna dɛndo. Mɛnɛ kɛgbɛt dɛromun gbɛcɛrɛm kɔ ŋanasɔtɔ tewe ta Yesu Krist.

¹⁷ Awa Piyɛr kɔ Isan ŋandenɔr ŋa waca, kɔ ŋasɔtɔ Amera Ŋecempi ŋa Kanu.

18 Nte Siməŋ enanəŋk a kədeŋər kəca ka asom a Yesu gbəcərəm kənasəŋ afum Amera Nəcempi mə, k'əŋkərə ŋa pəsam pəcloku:

19 «Nəsəŋ im ina sə kətam! Nwε o nwε indedeŋər waca mə, wəkayi pəsətə Amera Nəcempi ŋa Kanu.»

20 Mba kə Piyer oloku kə: «Kanu kəsəŋe məlece kə pəsam pam, bawo mənəcem-cəmne kəsətene pi kəpocə ka Kanu!»

21 Məna məyə fε daka, məyə fε tofokəl nnə tes tante disre, bawo abəkəc ŋam ŋolomp fε fər ya Kanu kirin.

22 Məluksərne Wəbe Kanu, məletsene kə, mətola kə nte təŋsəŋe pəŋaŋnen'am məcem-cəmne məlec ma abəkəc ŋam mə, kə Kanu kəwose ti-ε.

23 Bawo inəŋk a məcem-cəmne məlec ma kəraca məntam əm, kə kətəlomp kəsekət əm.»

24 Kə Siməŋ oloku kə: «Nətolan'em Kanu Wəbe, nte təŋsəŋe məmə nəloku mə ta tələm o tələm təsət'em.»

25 Piyer kə Isəŋ ŋancam nte ŋananəŋk kə təkə ŋanane teta Yesu mə, kə ŋalukus Yerusalem, ŋaccam toloku tətət ta Kanu sədare səlarəm sa Samari.

Filip kə wərkun wəpəŋ wəka atəf ŋa Ecopi

26 Məleke ma Wəbe mələma mender nde Filip eyi mə mocloku: «Məkə ntende kəca kətət, məsolne dəpə deyer-yer nde deŋyefe Yerusalem doctor Kasa mə.»

27 Kə Filip eyefe katin, k'entas. Wərkun wəpəŋ wəka Ecopi enayi pabane kə. Nkən enatəmpər kəcəmbər-cəmbər ka daka da Kandas, wəbera wəka atəf ŋa Ecopi fəp. Enader Yerusalem kədəkor-koru Kanu.

28 Kælukus k'encndε ndørøn pændε pɛyεksenε pøn kəronj, pæckaranj pəpənj buk ba aŋnabi Esayi.

29 Kə Amera ŋa Kanu ŋoloku Filip: «Məcəŋne mələtərne pəyεksenε mpe.»

30 Kə Filip εyεkse kəkə dəndo, k'ene wəka Ecopi nwε pæckaranj buk ba aŋnabi Esayi. K'eyif kə: «Məncəre nte məyi kəkaranj mə ba?»

31 Kə wəEcopi nwε oloku Filip: «Cəke c'intam ti kəcəre-ε, k'intəyə nwε entəks'em mə?» K'oloku Filip a pəpese pændε kə kəsək pəyεksenε pøn kəronj.

32 Moloku ma Buk mbε enckaranj mə mənayəne mmε:

«K'aŋkekəre kə dəkədif pəmə aŋkesiya.

Pəmə aŋkesiya ŋowut nŋε ŋəntəkule-kule wəfon wəka ŋi dəntəf mə,

enawani fε kusu.

33 Owose kətore kən banca, k'ambanər kə kance kən.

An'endetam kələm teta kəbənda ka dokom dən-ε? Bawo anim kiyi kən doru antəf ŋaŋε kəronj.»

34 Kə wərkun wəbanε nwε eyifnε Filip: «İletsen'am, məlok'im: Tes ta ana tə sayibe səloku tantε-ε? Ta nkən wəsərka ba, ka fum wəcuru?»

35 Kə Filip εlek moloku k'oncop dəmoloku ma Buk babəkə, k'oloku kə toloku tətət ta Yesu.

36-37 Nte ŋanasolne dəpə ŋackə mə, kə ŋaŋkə ŋabəp domun. Kə wərkun wəbanε oloku: «Domun də dandε: Ak'endeyaməs oŋ kəgbət kem dəromun teta Kanu-ε?»*

8:33 Esayi 53.7

*

8:36-37 Yecicəs yələma aŋdenər moloku mələma: «Kə Filip oloku: «Kə məlanj abəkəc ŋam fəp-ε, səntam ti.» Kə wəEcopi wəbanε oloku: «İlanj a Yesu Krist əyənε Wan ka Kanu.»

³⁸ Kɔ Filip oloku a pɛcɛmbɛr pɛyɛksɛnɛ, kɔ ɲantor dɛromun. kɔ Filip ɛɲgbɛt kɔ dɛromun teta Kanu.

³⁹ Ntɛ ɲampɛ dɛromun mɔ, kɔ Amera ɲɛcɛmpi ɲa Wɔbɛ Kanu ɲɛmpɛnɛ Filip. Ti disrɛ, wɔbanɛ wɔka Ecopi nwɛ ɛnɛɲk fɛ kɔ sɔ, k'osolnɛ dɔpɔ dɔn abɛkɛc ɲobotu disrɛ.

⁴⁰ Kɔ Filip ɔɲkɔ pɛnɛɲknɛ dare da Asot. K'oloku moloku mɔtɔt ma Kanu sɛdare fɔp nɛɛ encɛpɛr mɔ, haɲ k'ɔɲkɔ pɛbɛp dare da Sesari mɔ.

9

Kanu kɛncɛmbɛr Sol dɔpɔ dɔtɔt 22.3-16; 26.9-20

¹ Tɛm tatɔkɔ Sol pɛcɛɲɔsɛnɛ kɛdifɛt acɛpsɛ a Mariki darɛɲ, k'ɔɲkɔ ndena wɔlɔɲnɛ wɔpɔɲ wɔka kɛlɔ kɛpɔɲ ka Kanu.

² Kɔ Sol ewer wɔlɔɲnɛ wɔpɔɲ reka teta wɔlɔ wa dɛkɛtolɔ Kanu da aSuyif nde Damas, ntɛ tɔɲsɔɲɛ k'ɛmbɛp di akin akin-ɛ, pɛyɔnɛ arkun pɛyɔnɛ aran aɲɛ ɲancɛmɛ dɔpɔ da Yesu darɛɲ mɔ, pɛtam kɛsumpɛr ɲa pɛkɛkɛrɛ Yerusalem.

³ Dɔpɔ Sol ɛnayi pɛclɔtɛrnɛ dare da Damas, gbɛncana babɔkɔ kɔ pɛmot pɛyɛfɛ dɛkɔm, kɔ pɔsɔɲ pɔwanɲkɛra mpɛ pɛnakɛl kɔ mɔ.

⁴ K'ɛntɛmpɛnɛ dɛntɔf. K'ɛnɛ dim ndɛ dɛnɛyɛf kɔ: «Sol! Sol! T'ake tɔ mɛntɔrɛs ɛm-ɛ?»

⁵ Kɔ Sol ɛyɛf kɔ, «Wɔbɛ, mɛna an'ɔfɔ-ɛ?»

«Ina, Yesu iyɔnɛ, nwɛ mɛyi kɛtɔrɛs mɔ.

⁶ Mba mɛyɛfɛ, mɛbɛrɛ dare, aɲkɔlok'ɛm tɔkɔ pɛamar mɛyɔ mɔ.»

⁷ Kɔ arkun aɲɛ ɲanasol kɔ nkɔn Sol mɔ ɲancɛmɛ, ta ɲantam kɛlok-loku-ɛ kɛnɛsɛ disrɛ, ɲacnɛ dim mba ta ɲaɲnɛɲk fum-ɛ.

⁸ Kɔ Sol eyɛfɛ dɛntɔf pɛmɛpi fɔr, mba ta ɛɪnɛŋk paka o paka-ɛ. K'asumpɛr kɔ kɛca, k'ambɛrsɛnɛ kɔ dare da Damas.

⁹ K'eyi di mata maas ta ɛɪnɛŋk-ɛ, ɔfɔdi peri, ɔfɔmun.

¹⁰ Dɛndo dare da Damas wɛɛɛpɛ wɛka Mariki darɛŋ wɛlɔma ɛnayi di pɛcwe kɔ Ananiyas. Kɔ Wɛbɛ oloku kɔ kɛnɛŋk disrɛ: «Ananiyas!»

K'owosɛ: «Iyi nnɔ, Mariki!»

¹¹ Kɔ Mariki oloku kɔ: «Mɛkɔ dɔpɔ dɔkɔ aŋwe <Dolompu> mɔ, mɛkɔ mɛtɛn nde kɛlɔ ka Yudas fum wɛkɔ aŋwe Sol mɔ, wɛka dare da Tarɛs ɔyɔnɛ. Bawo ontola Kanu,

¹² kɔ Kanu kɛnɛmentɛr kɔ kɛnɛŋk disrɛ fum nwe aŋwe Ananiyas mɔ pɛbɛrɛr kɔ. K'endenjɛr Sol waca, nte tɔŋsɔŋɛ kɔ sɔ kɛnɛŋk mɔ.»

¹³ Mba Ananiyas olukɛ: «Wɛbɛ, inenɛ afum alarɛm ŋaclɔm pɛlɛc mpɛ fum wɛkakɔ ɔyɔ afum am acɛmpi nde Yerusalem mɔ.

¹⁴ Nnɔ kɛfo kɛŋkɛ yati kɔ aloŋnɛ apɔŋ aSuyif ŋanawurɛ Sol a pɛdesumpɛr nwe o nwe ombonc tewe tam mɔ.»

¹⁵ Mba kɔ Wɛbɛ oloku Ananiyas: «Mɛkɔ! Bawo fum wɛkakɔ paka pɔ mpɛ inayɛk-yɛk kɛkɔtɛnɛ tewe tem nnɔ abɛ a tɔf ya doru kɔ aka Yisrayel fɔr kirin mɔ.

¹⁶ Ina yati in'endementɛr Sol pɛcuy fɛp pɔkɔ pɛmar pɛdeɛpɛrɛnɛ teta tewe tem mɔ.»

¹⁷ Kɔ Ananiyas ɔŋkɔ. Nte ɛmbɔp kɛlɔ kɛŋkɔ mɔ, k'ɛmbɛrɛ, k'endenjɛr Sol waca. K'oloku: «Sol Wɛnc im, Mariki Yesu, nwe ɛnawurɛr ɛm nde dɔpɔ ndɛ mɛnasolnɛ mɛcder Damas mɔ, osom im nte tɔŋsɔŋ'am sɔ kɛnɛŋk, a mɛlarɛ sɔ Amɛra Nɛcɛmpi ŋa Kanu mɔ.»

18 Gbæncana babəkə, kə ca yonkəŋe kə dəfər pəmə wokwok, kə fər yən yentam sə kəcnəŋk. Kə Sol eyefe, k'əsətə kəgbət dəromun teta Kanu.

19 Nte elip kədi yeri mə, k'əsətə sə fənəntər.

Sol kəcam kən toloku ta Kanu dare da Damas

Kə Sol encepərene mataka mələma kə acepse a Mariki Yesu akə ŋanayi dare da Damas mə.

20 K'eyefe kəcam katina dəwələ wa dəkətola Kanu da aSuyif, pəcloku a Yesu Wan ka Kanu əyənə.

21 Kə pənciyane afum fəp aŋe ŋancne polok-loku pa Sol mə, kə ŋayif: «Bafə nkən nde Yerusalem encfan kəmələk aŋe ŋancbonc tewe tante mə ba? Bafə kəsumpər kəŋan k'enaderene nnə, pəkekəre ŋa nde aloŋne apəŋ ŋayi mə ba?»

22 Mba Sol pəcsətə kəsətə dəm kətam pəcsəŋe aSuyif aŋe ŋanayi dare da Damas mə kəciyane, kəcmentər a Yesu əyənə Krist, wəbe wəyek-yek wəka Kanu.

23 Nte mataka mələma mencepər mə, aSuyif aŋe ŋanayi Damas mə ŋantəŋne kənim ka Sol.

24 Kə Sol ende pəcərə tetəŋne taŋan. ASuyif ŋancbum daŋ kə pibi kədewur kən dare nte təŋsəŋe ŋatam kənim kə mə.

25 Mba pibi papəkə kə acepse a Mariki Yesu darəŋ ŋamber kə dəkəsaksaka, kə ŋayokene kə damba da saŋka sa dare darəŋ.

Kəyi ka Sol Yerusalem

26 Nte Sol emberə Yerusalem mə, k'əŋsep kənəŋkələne acepse a Mariki Yesu darəŋ. Mba fəp fəncnese kə, ta ŋalaŋ a nkən sə əyənə wəcepse wəka Yesu darəŋ-ə.

²⁷ Mba kɔ Barnabas elɛk kɔ, kɔ ŋaŋkɔ nde asom a Yesu ŋayi mɔ. Kɔ Barnabas ɔlɔmɛr ŋa nte Sol ɛnanəŋk Mariki dɔpɔ, a kɔ Yesu olok-lokɛr kɔ mɔ, kɔ nte tewe ta Yesu kənasəŋe kɔ kəbəkne kəlɔkk-loku mɔ.

²⁸ Sol ɔnckɔ pəcder kɔ ŋa dəndo Yerusalem pəclɔk-lokɛ kəlanj disrɛ tewe ta Mariki.

²⁹ Sol pəclɔk-loku, pəcgbəkəlɛnɛ kɔ afum aKresi, mba, ŋa sɔ, ŋactɛn kənim kɔ.

³⁰ Nte awɛnc alanj ŋancərə ti mɔ, kɔ ŋasəŋe Sol kətor Sesari, k'elɛk dɔpɔ k'əŋkɔ dare da Tarəs.

³¹ Kəlɔŋkanɛ ka alanj Yesu a atɔf ŋa Yude, atɔf ŋa Kalile kɔ atɔf ŋa Samari, ŋa fəp ŋanayi pəforu disrɛ. Alanj Yesu ŋancəpəsɛnɛ bəkəc, ŋayinɛ kənɛsɛ ka Wəbɛ Kanu disrɛ. Amera Nəcɛmpi ŋa Kanu ŋɛncmarəs kəlɔŋkanɛ ka alanj Yesu, ti disrɛ ŋancla kəla dəm.

Kətaməs ka Eney

³² Piyer nwɛ ɛncɛpər sədare sasɔkɔ fəp mɔ, ɛnader pətor sɔ ndena afum acɛmpi aŋɛ ŋanandɛ dare da Lida mɔ.

³³ K'əŋkɔ pəbəp di fum nwɛ ancwɛ Eney mɔ, ta əŋkɔt-ɛ, pəfəntərə debik meren camət-maas disrɛ.

³⁴ Kɔ Piyer oloku kɔ: «Eney, Yesu Krist ɛntaməs əm! Məyɛfɛ mənə wəsərka mənɛp abik ŋam!» Gbəncana babəkɔ k'ɛyɛfɛ, k'ɛncəmɛ.

³⁵ Nte aka Lida kɔ aka Sarəŋ fəp ŋanəŋk kɔ mɔ, kɔ ŋaŋkafəli mera yaŋan nnɔ Mariki eyi mɔ.

Kəyɛkti ka Tabita defɪ

³⁶ Wəran wəɛpɛsɛ ka Mariki Yesu darəŋ wəlɔma ɛnayi dare da Yope, pacwɛ kɔ Tabita. Kusu kəŋan

disrɛ ancwɛ kɔ sɔ Dorkas, ti tɔyɔnɛ «wɛrɛ». Wɛran wɛkakɔ ɔncyɔ mes mɔtɔt mɛlarɛm, kɔ kɛmar.

³⁷ Mata mamɔkɔ disrɛ, k'ɛfɔntɛrɛ docu, k'ɛfi. K'ambikɛ kɛbɛl kɔn, k'ampɛnɛ ki ndɛ dukulɔ da kɛlɔ dɛrɛnc.

³⁸ Ntɛ acɛpsɛ a Mariki Yesu darɛn ɲanɛ a Piyɛr eyi Lida ndɛ dɔlɔtɛrnɛ dare da Yopɛ mɔ, kɔ ɲasom arkun mɛrɛn kɛkɔletsɛnɛ kɔ: «Ta mɛwɔn kɛcɛpɛr ndɛ ndorosu.»

³⁹ Kɔ Piyɛr ɛyɛfɛ kɔ ɲanɲkɔ kɔ asom anɛ mɛrɛn. Ntɛ ɲambɛrɛ mɔ, k'ampɛnɛ kɔ ndɛ dukulɔ da kɛlɔ dɛrɛnc. K'acɛbɔkɛra fɛp ɲander ɲabɛp kɔ ɲacɔbɔk, ɲacmɛntɛr kɔ sɛbrumus kɔ yamos nyɛ Dorkas ɛnalompɛs ntɛ ɛnayi kɔ ɲa mɔ.

⁴⁰ Kɔ Piyɛr owurɛnɛ afum fɛp ndɛ doru, k'ɛncɛp suwu, k'ontola Kanu tetɔn. Ntɛ elip mɔ, k'ɛɲkafɛlɛ ndɛ kɛbɛl kɛyi mɔ, k'oloku: «Tabita, mɛyɛfɛ!» Awa kɔ Tabita ɛmɛpi fɔr, ntɛ ɛnɛɲk Piyɛr mɔ, k'ɛyɛfɛ, k'ɛndɛ.

⁴¹ Kɔ Piyɛr ɔsɔn kɔ kɛca, k'ɛyɛkti kɔ. K'ɛwɛ afum acɛmpi kɔ acɛbɔkɛra, k'ɛmɛntɛr ɲa Tabita pɛyi wɛyɛɲ.

⁴² Kɔ aka dare da Yopɛ fɛp ɲancɛrɛ ti, kɔ alarɛm ɲancɔp kɛlanɲ Mariki.

⁴³ Kɔ Piyɛr eyi dare da Yopɛ mataka mɛlarɛm, ndɛna Simɔn wɛlɔma nwɛ ɛncɔbɛc kata mɔ.

10

Kɛwɛ ka Piyɛr ndɛna Kɛrneli

¹ Wɛrkun wɛlɔma ɛnayi Sesari pacwɛ kɔ Kɛrneli, pɛyɔnɛ wɛbɛ ka kɛgba ka asɔdar tasar tin (100). Kɛgba kanɲkɔ k'ancwɛ «Kɛgba Itali.»

² Nkøn kə aka kəlɔ kən disrɛ fəp ɲancnɛsɛ Kanu, ɲacəmə tɛfan ta ki darəɲ. Kərnɛli ɔncyɔnɛ afum nɔnɔfɔr, pæctola Kanu tɛm fəp.

³ Dɔsək dəlɔma dec dərɔfɔy, k'ɛnəɲk pəsoku pɛs kənəɲk disrɛ, mɛlɛkɛ ma Kanu məlɔma mɛbɛrɛ nde kəlɔ kən disrɛ, kə mewe kɔ: «Kərnɛli!»

⁴ K'ɛɲgbətɛ mi, kə kənɛsɛ kəyi kə, k'eyif mi: «Acəkɛ Wəbɛ?»

Kə mɛlɛkɛ maməkɔ molokɔ kɔ: «Motola mam kə kəyɔnɛ kam afum nɔnɔfɔr, mɛs maməkɔ fəp mɛmpɛ nde Kanu fɔr kirin, kə kəncɛm-cɛmɛ mi.

⁵ Məsom oɲ afum dare da Yope ɲakəwen'am fum wəlɔma nwe aɲwe Siməɲ mə, pacdɛɲər kə tewe ta ⟨Piyɛr⟩.

⁶ Ndena Siməɲ wəlɔma eyi, wəkakɔ wəbæc kata ɔfɔ, kəlɔ kən kəyi kəba kəsək.»

⁷ Ntɛ mɛlɛkɛ maməkɔ mɛnalok-lokər kə mə mɛnadelukus, kə Kərnɛli ewe amarəs ɔn mɛrəɲ kə wəsɔdar wəcəmə mɛfan ma Kanu darəɲ wəlɔma aɲɛ ɲanayi kə dəntɔf mə.

⁸ Ntɛ Kərnɛli elip kəlɔmər asɔdar ɔn mɛs məkɔ mɛnacepər nkøn kə mɛlɛkɛ dacɔ mə, k'osom ɲa Yope.

⁹ Dɔckəsək, ntɛ ɲanayi dɔpɔ, a ɲaclɔtərɛ dare da Yope mə, kə Piyɛr ɛmpɛsɛ akɛr ɲa kəlɔ kən kakəron kəkɔtola Kanu, tenatəɲnɛ daɲ dɛcbəp.

¹⁰ Kə dor dɔyɔ kə, k'ɛfan kədi yeri. Tɛm təkɔ anayi kəlompəsɛ kə yeri mə, k'ɛnəɲk tes tɔlɔma ntɛ tɛyɛfɛ dəkənu mə.

¹¹ K'ɛnəɲk kəm kəgbite, paka pəlɔma mpɛ pɛnawurɛnɛ kə manta mɔpəɲ mɛmɛ anasumpər monkubut mankələ mə, montor haɲ kə mɛfəntərə dəntɔf.

12 Sɛm dokom fɛp yɛnayi manta mamɔkɔ disrɛ, kɛyɛfɛ sɛm ya wɛcɔk maɲkɛlɛ, yeliɲɛ-liɲɛ haɲ kɛbɛp bɛmp ya darenc.

13 Kɔ dim dɔlɔma doloku kɔ: «Piyɛr, Mɔyɛfɛ, mɛdif, mɛsɔm!»

14 Kɔ Piyɛr oloku: «Ala Wɛbɛ! Tɔlɔm o tɔlɔm tentasɔɲɛ f'em kɛsɔm paka mpɛ sariyɛ sɛmɔnɛ mɔ.»

15 Tamɛrɔɲ kɔ dim ndɛ dolok-lokɛr kɔ sɔ: «Paka mpɛ Kanu kɛcɛmpɛs mɔ, ta mɔna mɔyik-yikɛs pi.»

16 Kɔ teyi kɛmaas, pɔwɔn fɛ k'ampɛnɛ dɛkɔm manta mamɔkɔ mɛnayo sɛm mɔ.

17 Kɔ tedisrɛ ta kɛnɔɲk kaɲkɔ teyi Piyɛr yamayama. Tɛm tatɔkɔ tɔ asom a Kɔrneli, ntɛ amentɛr ɲa kɛlɔ ka Simɔɲ mɔ, kɔ ɲaɲkɔ ki ndɛ dɛkusunja.

18 Kɔ ɲawe, kɔ ɲayif kɔ pɔyɔnɛ fɔ kɛlɔ kaɲkɔ kɔ Simɔɲ nwɛ andɛɲɔr tewɛ ta «Piyɛr» mɔ eyi-ɛ.

19 Ntɛ Piyɛr eyi kɛcɛm-cɛmnɛ tedisrɛ ta kɛnɔɲk kɔn mɔ, kɔ Amera ɲa Kanu ɲoloku kɔ: «Arkun maas ɲayi ndɛ dabanja ɲactɛn ɛm.

20 Mɔtor, nɛsol nɛkɔ kɔ ɲa, ali kɛnɛsɛ ta kɛy'im, bawo In'osom ɲa.»

21 Kɔ Piyɛr ontɔr k'eyif arkun aɲɛ: «Ina nɛntɛn, ta ake tɔ nɛnderɛnɛ nnɔ-ɛ?»

22 Kɔ ɲaloku kɔ: «Kɔrneli, wɛbɛ wɛka asɔdar tasar tin (100), fum wɛlompɔ pɛcnɛsɛ Kanu, nwɛ aSuyif fɛp ɲancɛrɛ dɔtɔt dɔn akɔ ɲaɲlɔku mes mɔn mɔtɔt mɔ, ndɔrɔn Kanu kɛsɔm mɛlɛkɛ mosoku, a pɛsak su sɛdew'am pɛkɔcɔɲkɛl ɛm ntɛ pɛmar mɛlɔku kɔ mɔ.»

23 Awa kɔ Piyɛr ɛmbɛrsɛ ɲa dɛkɛr, k'ɔsɔɲ ɲa dɛkiyi.

Dɔckɔsɔk kɔ Piyɛr ɛyɛfɛ, k'ɔɲkɔ kɔ ɲa. K'awɛnc alaɲ a dare da Yope alɔma ɲancɛmbɛr kɔ.

24 Kɔ ɲambere Sesari dɔckɔsɔk, Kɔrneli pɛckar ɲa, k'ewe akomene ɔn alɔma nde ndɔrɔn kɔ anapa ɔn atɔt.

25 Kɔbere ka Piyer, kɔ Kɔrneli ɔɲkɔ pɛfayne kɔ, k'entempene kɔ wɛcɔk dɔntɔf. K'encɔpe kɔ suwu.

26 Mba kɔ Piyer eyekti kɔ, k'oloku: «Mɔyefe, ina sɔ fum iyɔne.»

27 ɲayi kɔlok-loku kɔ Kɔrneli, k'embere k'embɔp afum alarɛm ɲalɔɲkanɛ.

28 Kɔ Piyer oloku ɲa: «Nɛncɔre a amɔne aSuyif kɔbɔt kɔ acikɔra, kɔ pɔyɔne fe ti-ɛ, pɔbere ndɔrɔn. Mba Kanu kɔmentɔr im a pɔmar fe a pakule fum o fum a eyik-yik, kɔ pɔyɔne fe ti-ɛ, pɔmar fe sɔ a pakule fum o fum a ɔsɔk fe fɔr ya Kanu kirinɲ.

29 It'ɔsɔɲe nte mɔsom a pakɔw'em mɔ, k'inder ali ta incɛmɛmne-ɛ. Ndekɔl iyif ɛm, T'ake tɔ mɔwen'em-ɛ?»

30 Kɔ Kɔrneli oloku: «Tɔsɔtɔ mata maɲkɔle ictola nɔnɔ nderem, dɔfɔy dendeɔp. K'inɔɲk fɔr yem kirinɲ wɔrkun wɔlɔma pɔberne yamos yomotɔr-motɔr.

31 Kɔ fum wɔkakɔ oloku: «Kɔrneli, Kanu kɔmbanɲ kɔtola kam, k'encɛmɛmne sɔ kɔyɔne kam afum nɔnɔfɔr.

32 Mɔsom fum dare da Yope pakɔwen'am Simɔɲ nwe andenɲar tewe ta «Piyer» mɔ, nde kɔlɔ ka Simɔɲ, wɔbɔc kata, nwe kɔlɔ kɔn kɔyi kɔba kɔsɔk mɔ.»

33 K'isom katina fum, kɔ mɔna mɔsɔtɔ abɔkɔc ɲɔtɔt kɔder. Ndekɔl ɔɲ sɔyi fɔp fosu Kanu fɔr kirinɲ, sɔdecɔɲkɔl moloku mɔkɔ Wɔbe osom ɛm kɔloku mɔ.»

Moloku ma Piyer ndena Kɔrneli

34 Awa kə Piyer elək moloku, k'oloku: «Kance: Incære oŋ a Kanu kəyi fε kəsək kin.

35 Mba afum fəp dacə mənə nwe məŋnesε Kanu, məcəme pəlompu darəŋ mə, Kanu kəmbəŋ əm.

36 Kanu kənakenε aka Yisrayel toloku, pəcloku ŋa moloku mətət ma pəforu mpε Yesu Krist eŋkεrε afum fəp mə: Nkən əyənε Wəbε ka afum fəp.

37 Nənə nəncərə təkə teyi Yude fəp mə, Kalile tənacop, ntε Saŋ enadəŋk kəgbət dərōmun mə.

38 Kanu kənabəy Yesu wəka Nasaret Amera Nəcempi ŋən kə fənəntər. Nnə o nnə enccepər mə, əncyə pətət, pəctaməs afum fəp aŋε amera ŋelεc ŋəntcərəs mə, bawo Kanu kənayɪ kə nkən Yesu.

39 Səyənε atəŋne a mes fəp mmε Yesu enayə nde atəf ŋa aSuyif kə Yerusalem mə. Nkən nwe ŋananim, ŋacaŋ kə dəkətək mə,

40 mba Kanu kənasəŋε kə kəfətε dədəfɪ tataka tən ta maas. Kə kəsəŋ kə kəmentərne,

41 bafə nnə afum fəp ŋayi mə, mba nnə atəŋne mes aŋε Kanu kənanuŋkεnε kəyεk-yεk, kə sənə aŋε sənadi yeri, səmun kə nkən ntε enafətε afi dacə mə.

42 K'osom su kəloku afum, səmentər a nkən Yesu, nkən ə Kanu kəncəmbər kəyənε nwe endeboce afum afi kə ayi wəyεŋ kiti mə.

43 Sayibε fəp sənəloku tetən: Nwe o nwe εgbəkər kəlaŋ kən Yesu mə, endesətə nde Kanu kəyi mə kəŋaŋnεnε ka mes mən mεlεc teta tewe ta Yesu.»

Atəyənε aSuyif ŋasətə Amera Nəcempi ŋa Kanu

44 Moloku maməkə mə Piyer enayi kəloku, ntε Amera Nəcempi ŋa Kanu ŋenatorər afum akə ŋanccəŋkəl moloku mən mə.

⁴⁵ Cusu cɛnawos alaŋ a Kanu, akɛnc akɔ ŋanader kɔ Piyer mɔ, kɛnɛŋk a kɛpɔcɛ ka Amera Nɛcɛmpi kɛnasamɛsɛr kɛbɛp haŋ acikɛra aŋɛ ŋantɔyɔnɛ aSuyif mɔ,

⁴⁶ bawo ŋancne ŋa kɛkor-koru Kanu cusu c'acikɛra.

Awa kɔ Piyer ɔŋgbɔkɛrɛ:

⁴⁷ «Antam kɛfatɛnɛ kɛgbɔt afum dɛromun nnɔ akanɛ ŋasɔtɔ Amera Nɛcɛmpi pɛmɔ sɛna mɔ ba?»

⁴⁸ K'oloku a pagbɔt akakɔ dɛromun tewɛ ta Yesu Krist. Kɔ ŋaletɛnɛ Piyer kɛyi dɛndo mataka mɔlɔma.

11

Piyer kɛsɔksɛr alaŋ a Yerusalem mes mɔkɔ mɛnacepɛr dare da Yope mɔ

¹ Asom a Yesu kɔ awɛnc aŋa alaŋ aŋɛ ŋanayi atɔf ŋa Yude mɔ ŋane a acikɛra, aŋɛ ŋantɔyɔnɛ aSuyif mɔ, ŋawosɛ toloku ta Kanu.

² Ntɛ Piyer ɛnape Yerusalem mɔ, kɔ afum aŋɛ anakɛnc mɔ ŋayɛfɛ kɛnal kɔ,

³ ŋacloku: «Mɛmbɛrɛ ndena afum aŋɛ antɔkɛnc mɔ, kɔ mɛndi yeri kɔ ŋa, bawo aSuyif ŋanamɔnɛ ti!»

⁴ Awa kɔ Piyer ɛyɛfɛ kɛlɔmɛr ŋa tin tin tin mes mɔkɔ mɛnacepɛr mɔ:

⁵ «Ina, nde dare da Yope inayi, dɔsɔk dadɔkɔ ictola Kanu kɔ kɛnɛŋk kɛnder im. Ti disrɛ, k'inɛŋk paka pɔlɔma pɔctor powurɛnɛ kɔ manta pasumpɛr pi monkubut maŋkɛlɛ, kɔ pontor kɛyɛfɛ dɛkɔm haŋ nnɔ inayi mɔ.

⁶ Ntɛ inagbɔtnɛ pi disrɛ mɔ, k'inɛŋk sɛm ya wɛcɛk maŋkɛlɛ, sɛm ya dop, yeliŋɛ-liŋɛ, kɔ bɛmp ya dɛkɔm.

⁷ K'ine sɔ dim doclok'im: «Məyefe Piyer! Mədif, məsəm.»

⁸ K'iloku: «Ala Wəbe! Tələm o tələm tentasəne f'em kəber paka pətəcemp dəkusə, mpe Kanu kəmənə kədi mə.»

⁹ Kɔ dim nde dənɔgbəkəre sɔ kəyefe dəkəm: «Paka mpe Kanu kəncempəs mə, ta mənə məloke pi kətəcemp!»

¹⁰ Kɔ teyi kəmaas, pəwon fe kɔ ca nyε fəp yolukus sɔ dəkəm.

¹¹ Gbəncana babəkɔ, kɔ arkun maas ane ana-som nde nderem kəyefe dare da Sesari mə, nander nəcəme dəkusənka ka kələ kənka sənayi mə.

¹² Kɔ Amera Nəcempi nɔlok'im a səsol səkɔ kɔ nja, ali inese fe. Kɔ awenc asu anja alan camət-tin ane nəcəm'em darən, kɔ sənka səberε ndena Kərneli.

¹³ Kɔ Kərneli oloku su nte enanənk məleke nde ndərən, kɔ moloku kɔ: «Məsom fum dare da Yope pakɔ wen'am Simən, wəkɔ andənər tewε ta «Piyer» mə.»

¹⁴ Nwε endelok'am moloku mmε mendeyac əm, kəbər aka kələ kam disre fəp mə.»

¹⁵ Iyi kəlok-loku, kɔ Amera Nəcempi nja Kanu nɔntorər nja pəmɔ nte nənatorər sənə sɔ dəkəcɔp mə.

¹⁶ Awa k'incəm-cəmne toloku ta Mariki nte enaloku: «Dəromun Saɔ enəgbət afum, mba nənə Amera Nəcempi nja Kanu nɔ nəndesətəne kəgbət dəromun teta Kanu.»

¹⁷ Kɔ pəyənε a kəpocε kin kayi kɔ njanəsətər Kanu pəmɔ sənə ane səlan Yesu Krist mə-ε, an'inatam kəyənε-ε nte inəkoyamsər Kanu mə?»

¹⁸ Nte njanε moloku maməkɔ mə, kɔ bəkəc yontor nja, kɔ njankor-koru Kanu, njacloku: «Kanu kəsən sɔ acikərə ane nantəyənε aSuyif mə kətam kəsəkpər

bəkɛc, nte tɔŋsɔŋe ŋasɔtɔ tecepɛrɛne doru nte Kanu kɛfan mɔ!»

Kɛlonkanɛ ka alaŋ Yesu nde dare da Antiyɔk

¹⁹ Nte andif Etiyen mɔ, k'ancop kɛtɔrɛs afum alaŋ kɔ tɔsɔŋe ŋa kɛsamsɛr. Alɔma ŋanakɔ atɔf ŋa Fenisi, alɔma ŋakɔ Sipɛr, alɔma ŋakɔ haŋ Antiyɔk, ŋanclukse fe nwe o nwe sɔ toloku ta Kanu mɛne aSuyif gbɛcɛrɛm.

²⁰ Afum akakɔ daco, alɔma ŋanayi, aŋe ŋanader dare da Antiyɔk kɛyɛfe ka sɛdare sa Sipɛr kɔ Siren mɔ, ŋancɔpɛr aKrek, ŋacloku ŋa toloku tɔtɔt ta Mariki Yesu.

²¹ Kɛca ka Mariki kɛnayi alaŋ akakɔ kɛron. Kɔ afum alarɛm ŋayɔne alaŋ, kɔ ŋaŋkafɛli bəkɛc yaŋan nno Mariki eyi mɔ.

²² Kɔ moloku mamɔkɔ mɛmbɛrɛ kɛlonkanɛ ka alaŋ Yesu ka Yerusalem dɛlɛŋɛs, k'asom Barnabas Antiyɔk.

²³ Kɛbɛrɛ kɛn di, nte enadenɛŋk pɛtɔt kɔ pɛbotu mpe Kanu kɛnayɔne alaŋ a Antiyɔk mɔ, kɔ pɛmbɔt kɔ. K'ɛŋgbɛŋɛr ŋa kɛgbɛkɛr ka Mariki mera yaŋan fɛp kɛlan disre.

²⁴ Barnabas fum wɛtɔt ɛnayi. Kɛlan kɛnayi kɔ dɛbəkɛc kɔ Amera Nɛcɛmpi ŋa Kanu ŋeyi kɔ sɔ darɛŋ. Kɔ afum alarɛm ŋancɛmɛ dɔpɔ da Mariki darɛŋ.

²⁵ Kɔ Barnabas ɔŋkɔ dare da Tarɛs kɛlɛk Sol.

²⁶ Nte Barnabas ɛnɛŋk Sol mɔ, k'ɛŋkɛkɛrɛ kɔ Antiyɔk. Teren tin camcam, ŋactɛŋne kɛlonkanɛ ka alaŋ, kɔ ŋaŋtɛkse kɛnay ka afum. Dɛndo Antiyɔk,

difo anacop tɔcɔkɔ-cɔkɔ kɔwe acɛpsɛ a Mariki Yesu darɛŋ «aka Krist.»*

²⁷ Mata mamɔkɔ, kɔ sayibɛ sa Kanu sɛlɔma ŋantor dare da Antiyɔk kɛyɛfɛ Yerusalem.

²⁸ Wɛkin ɛnayi ŋa daco pacwe kɔ Akabus, k'eyɛfɛ, kɔ Amera Nɛcɛmpi ŋɔsɔŋɛ kɔ kɛdɛŋk a dor dendeyi doru fɛp. Dor dadɔkɔ dɛnader deyɛ tɛm nte Kɛlod ɛnayɔnɛ wɔbɛ ka tɔf ya Rom fɛp mɔ.

²⁹ Kɔ acɛpsɛ a Yesu ŋancɛm-cɛmnɛ kɛfɛk teta kɛmar ka awɛnc aŋa alaŋ aŋɛ ŋanayi atɔf ŋa Yude mɔ, nwe o nwe kɔ nte ɛnatam kɛfɛk mɔ.

³⁰ Itɔ ŋanayo: Kɔ ŋasom Barnabas kɔ Sol kɛkenɛ ki abeki aŋɛ ŋanayi kɛlonkanɛ ka alaŋ a Yude mɔ.

12

Kɛdif ka Sak, kɔ kɛbɛr ka Piyɛr dɛbili

¹ Tɛm tatɔkɔ tɔ wɔbɛ wɛka atɔf Herodu ɛnatɔpsɛr afum alaŋ alɔma waca teta kɛtɔrɛs kɛŋan.

² K'endifɛ Sak wɛnc ka Isan dakma.

³ Nte Herodu ɛnanɛŋk a mɔyɔ mɔn mamɔkɔ mɔncbɔt aSuyif mɔ, k'ɛncɛm-cɛmnɛ sɔ kɛtɔp Piyɛr waca, nte tɔŋsɔŋɛ pɛcaŋɛr kɔ mɔ. Mataka ma kɛsata kɛpɔŋ ka aSuyif mɛnayi: Kɛsata ka cɛcom cɛtɔnɔŋkɛl lebin.

⁴ Nte Herodu osumpɛr Piyɛr, k'ɛmbɛr kɔ dɛbili mɔ, k'ɔsɔŋ cɛgba maŋkɛlɛ ca asɔdar kɛbum kɛn, kɛgba o kɛgba kɛnayɔ asɔdar maŋkɛlɛ. ɛncɛm-cɛmnɛ kɛbocɛr Piyɛr kiti fɔr ya afum fɛp kirin kɔ kɛsata ka Kɛcɛpɛr ka Mɛlɛkɛ Medif kɛncɛpɛr-ɛ.

* **11:26** *Aka Krist* = cɛTabo «chrétiens», itɔ tɔkɔ kusu ka Kresi «kristianos», itɔ mentɔr cɛBaka «aŋɛ ŋawureɛ Krist mɔ».

⁵ Ancbum Piyer dɛbili, mba afum alarɛ ɛnanctolane kɔ belbel nnɔ Kanu kɛyi mɔ tɛm fɛp.

Kɔwure ka Piyer dɛbili

⁶ Nte dɔsɔk nde Herodu ɛnacɛm-cɛmnɛ kɛbocɛr Piyer kiti dɛmbɛp mɔ, pibi papɔkɔ, pakote Piyer gbekce mɛrɛɛ, pɛfɛntɛrɛ pɛcdire asɔdar mɛrɛɛ daco. Nde dɛkumba, asɔdar ɛnanacɛmɛ sɔ dɛndo ɛnacbum bili.

⁷ Gbɛncana babakɔ, kɔ wɛsom wɛka darenc, mɛlɛkɛ ma Wɛbɛ, mender, kɔ pɛmot pɔsɔɛ pɛwanɛkɛra bili disrɛ. Kɔ mɛlɛkɛ mmɛ mentimi Piyer m'ocsut-sut kɔ kɛsɔk, kɔ moloku kɔ: «Mɛyɛfɛ katana!» Kɔ gbekce yonkɔɛ kɔ dɛwaca.

⁸ Kɔ mɛlɛkɛ moloku kɔ: «Mɛlɛk yamos yam, mɛbɛrɛnɛ cɔfta cam!» Kɔ Piyer ɔyɔ mamɔkɔ fɛp. Kɔ mɛlɛkɛ moloku kɔ sɔ: «Mɛbɛrɛnɛ yi, mɛcɛm'em darɛɛ!»

⁹ Kɔ Piyer ɛncɛmɛ mɛlɛkɛ mmɛ darɛɛ. ɛnacɛrɛ fɛ a kɛmar ka mɛlɛkɛ kanɛkɔ a kance kɔ: kɛnɛɛk ka darenc kɔ nkɔn ɛnacɛm-cɛmnɛ.

¹⁰ Nte ɛnanɛpɛr abum acɔkɔ-cɔkɔ kɔ aka mɛrɛɛ mɔ, kɔ ɛnambɛp kumba ka fɛc nke kɛnatɛfɛrɛnɛ dare mɔ. Kɔ kumba kɛɛgbite kisɛrka fɔr yanɛn kirin, kɔ ɛjawur, kɔ ɛjasumpɛr dɔpɔ dɔlɔma. Gbɛncana babakɔ, kɔ mɛlɛkɛ mɛsak Piyer.

¹¹ Nte pɛndɛɛrɛɛ Piyer mɔ, k'oloku: «Incɛrɛ ɔɛ a Wɛbɛ osomna mɛlɛkɛ mɛn, mede mɛbanɛ im waca wa Herodu disrɛ, kɔ pɛlɛc pɔkɔ aSuyif ɛnanafan'em mɔ fɛp.»

¹² Nte ɛncɛrɛ ti ɔɛ mɔ, k'ɔɛkɔ nde kɛlɔ ka Mari, iya wɛka Isan, nwe anɛdenɛr tewe ta «Mark» mɔ, nde afum alarɛm ɛnanalɔkanɛ ɛnactola Kanu mɔ.

13 Nte Piyer osut-sut kumba ka dəkəberε mə, kə wəyecərə wələma pacwe kə Rodu, əncəηne kəkəcəηkəl.

14 Kə Rodu enepəl dim da Piyer, mba pəbotu disre enğbiti fε kumba. K'eyekse kəkəloku afum aηe ηanayi dəkələ mə a Piyer ender, k'encəme dəkumba.

15 Kə afum ηaloku Rodu: «Məna məntamne fe!» Mba k'enğbəc a təkə oloku mə itə teyi. Kə ηaloku: «Mεleke mən mə!»

16 Piyer nkən pəcsut-sut kəsut-sut dəm kumba. Nte ηanğbiti kumba kə ηanəηk Piyer mə, kə cusu cəwos ηa.

17 K'olok-lokəre ηa kəca a ηacəηk, k'ələmər ηa nte Wəbe owure kə dəbili mə. K'oloku: «Nəloku ti Sak kə awenc asu.» K'owur k'əηkə kəfo kələma.

18 Nte dec dəsək mə, kə pəyamayama pəpəη peyi asədar dacə: Akəsətə Piyer-ε, Deke eyi-ε?

19 Kə Herodu osom a paten Piyer, mba ηananəηk fε kə. K'ombocər asədar akakə ηancbum Piyer mə kiti, kə Herodu oloku a padif ηa. Nte telip mə, kə Piyer eyefe atəf ηa Yude, k'ontor dare da Sesari kəkəcəpərəne di tēm tələma.

Kəfi ka wəbe Herodu

20 Herodu enayi kəyefərəne kə aka sədare sa Tir kə Sidəη. Mba kətəηne disre aka sədare sasəkə ηander ηabəp Herodu. Nte ηasəp kəsətər Bəlastus nwe enayəne wətəmpər ka mes ma kələ disre ma wəbe Herodu mə, pəmar ηa kəsətər Herodu pəforu, bawo ndəron təf yanəη yəncsətə yeri.

21 Nte tataka tanəη tetəηne tēmbəp mə, kə Herodu emberne yamos yən ya dəbe, pəndε nde aηğbancan ηən pəclok-lokər ηa.

²² Tem nte afum fəp ɲanckule-kule, a ɲacloku: «Bafə dim da fum də dandɛ, mba da kanu də!»

²³ Gbəncana babəkə kə mɛlɛkɛ ma Wəbɛ mosut kə, bawo ɛnayek-yekəs fɛ Kanu, kə yet yoncop kəsəm kə, k'efi.

²⁴ Toloku ta Wəbɛ tɛncsam oɲ kəsam dəm təkə kirin.

²⁵ Barnabas kə Sol nte ɲalip kəkətɛnɛ kəsom kəɲan nde dare da Yerusalem mə, kə ɲalukus, ɲaclekɛnɛ Isan, nwe andɛnɛr tewe ta «Mark» mə.

13

Ayek-yek Barnabas kə Sol kəkətɛnɛ ka moloku ma Kanu

¹ Kəlonkanɛ ka alaɲ aɲɛ ɲanayi dare da Antiyək mə, sayibɛ-e kə atəkɛ ɲanayi ɲa daco: Barnabas, Simeyən nwe andɛnɛr tewe ta «Wəbi» mə, Lusiyus wəka Sirɛn, Manahɛɲ nwe anadusum kəfo kin kə Herodu wəbɛ wəka toɲoc tin k'ayer atəf kəmanəkɛlɛ-ɛ, kə Sol.

² Dəsək dəlɔma, alaɲ akakə ɲanckor-koru Kanu, ɲasunɛnɛ sɔ, kə Amera ɲɛcɛmpi ɲa Kanu ɲoloku: «Nəcəmbər em kəsək Barnabas kə Sol, teta yebəc yəkə inawɛnɛ ɲa mə.»

³ Nte alaɲ ɲalip kəsun kə kətola Kanu mə, kə ɲandɛnɛr Barnabas kə Sol waca, kə ɲasom ɲa.

Kəyi ka Barnabas kə Sol nde Sipər

⁴ Nte Amera ɲɛcɛmpi ɲa Kanu ɲosom Barnabas kə Sol mə, kə ɲantor atəf ɲa Selusi, dəndo ɲanalek abil kə ɲancali kəkə ka mokuru ma Sipər.

⁵ Nte ɲambere Salamin ma, ko ɲancop kalukse toloku ta Kanu nde dakatola Kanu da aSuyif. Isan enayi di pɛmar ɲa.

⁶ Nte ɲancali mokuru han dare da Pafos ma, ko ɲambɛp di fum wawenke walama pɛwene sayibe, mba ta ayone si-e. WəSuyif enayi, pɛwe ko Bar-Yesu.

⁷ Wawenke wakako ndena Serkus Polu enayi, nwe enayone wakirin waka sadare sa ataf ɲanoko ma. Nkon Serkus Polu warkun wacempi domp enayi. K'ender k'ewe Barnabas ko Sol pecten kenene na toloku ta Kanu.

⁸ Elimas, ito tatoko «wawenke» kusu kanan, encgekɛl moloku ma Barnabas ko Sol, pecten kakafali kalan ka wakirin Serkus Polu.

⁹ Mba Sol, nwe ancwe so Pol ma, Amara Necempi ɲeyi ko darɛn, k'engbatne Elimas.

¹⁰ Ko Sol oloku ko: «Məna wakako mala mowul ko yem ma, waka amara ɲeleɛ, wəter pəlompu fəp, mafəsak kakafali-kafali səpə sa Wəbe Kanu nse səlomp ma ba?

¹¹ Ndekɛl kəca ka Wəbe kəy'am kəronj: Wətonənk mənɛyone! Tem tendebəp, mənɛyi ta mənənk pəwanəra pa dec-e.»

Gbancana baboko ko fəp yoyo ko pafulu ko kubump kəwəkərne ko. K'eyefe kanana-nana pecten kəca nke kənkəsumpər ko kəsole ma.

¹² Nte wakirin ka dataf enənk nte tenacəpər ma, k'ayone walan. Metakse mme enanene Barnabas ko Sol teta Wəbe ma menabot ko debəkɛc.

Pol ko Barnabas dare da Antiyok nde Pisidi

13 Nte Pol kɔ asol ɔn nɔyefe dare da Pafɔs mɔ, kɔ nɔyeki abela kɔkɔ ka Perke, nde atɔf nɔ Panfili. Kɔ Isan Mark engbey nɔ, k'olukus Yerusalem.

14 Kɔ nɔyefe Perke nɔcɔme dɔpɔ danan darɔn han Antiyɔk, atɔf nɔ Pisidi. Kɔ nɔnko dɔkɔtola Kanu da asuyif simiti, dɔsɔk da kɔnesɔm, kɔ nɔandɛ.

15 Nte alip kɔkaranɔ Tawureta Musa kɔ Sayibe mɔ, kɔ abɛ a kɔlɔ ka dɔkɔtola da Kanu ndɛ nɔlɔku Barnabas kɔ Pol: «Awɛnc asu anɔ, kɔ nɔyɔ tolɔku tecɔpɔsɛ abɔkɔc nte nɔnfan kɔlɔku afum mɔ, nɔlɔku ti.»

16 Kɔ Pol eyefe, k'ondot kɔca, k'olɔku: «Arkun a Yisrayel, kɔ nɔna alpɔs anɛ nɔnnesɛ Kanu mɔ, nɔcɔnkɔl!

17 Kanu ka afum akanɛ, Kanu ka Yisrayel, kɔnɔyɛk-yɛk atɛm asu, kɔ kɔsɔnɛ nɔ kɔla tɛm nte nɔnɔyi decikɔra Misira mɔ, kɔ Kanu kin kanɔkɔ kɔwurene nɔ atɔf nɔnɔkɔ fɔnɔntɔr fa kɔca kɔn.

18 Kɔ kɔlɛkɛ nɔ mes mɛlɛc manɔn nde dɔtɛgbɔrɛ meren wɔcɔ manɔkɔlɛ (40).

19 Nte Kanu kɔnim afum a cusunɔka camɔt-mɛrɔn nde atɔf nɔ Kananɔ mɔ, kɔ kɔsɔnɔ atɔf nɔnɔkɔ afum ɔn nte tɔnɔnɛ nɔyɔnɛ nɔ kɛ mɔ.

20 Mes mamɔkɔ fɔp mɛnawon meren masar manɔkɔlɛ kɔ wɔcɔ kɔcamɔt (450).

Nte tatɔkɔ tencepɔr mɔ, kɔ Kanu kɔsɔnɔ nɔ abɔc kiti, anɛ nɔnatɔmpɔr dɛbɛ da aka Yisrayel mɔ han kɔbɔp ka tɛm ta anɔnabi Samiyɛl.

21 Kɔ tɛyefe dɔnda kɔ aka Yisrayel nɔawɛr Kanu wɔbɛ. Kɔ kɔsɔnɔ nɔ Sawul wan ka Kis pɔyɔnɛ nɔ wɔbɛ meren wɔcɔ manɔkɔlɛ (40). Fum wɔka kusunɔka ka Benyamɛn ɛnɔyi.

22 Nte Kanu kəfən Sawul mə, kə kəsəŋ ɲa wəbɛ Dawuda, nwe Kanu kənalokɛ nte mə: «Inəŋk Dawuda wan ka Yisay, fum ɔfə nwe səwurene bəkək mə, incem-cemne a endeyə mɛfanj mem fəp.»

23 Kəbənda ka dokombəra da nkən Dawuda, difə Kanu kənasəŋ kəkom ka Yesu Krist kədeyənɛ ka nwe endeyac afum a Yisrayel, pəmə nte kənasəŋ ti atem asu temer mə.

24 Ta Yesu entader-ɛ, Saŋ ɛnacam kəgbət dəromun, nte təŋsəŋɛ afum a Yisrayel fəp ɲasəkpər bəkək yaŋan yetɛfərne Kanu mə.

25 Nte Saŋ ɛncləpəs yebæc nyɛ Kanu kənasom kə mə, encyif: «Pɛcem-cemne ponu, an'iyənɛ-ɛ? Nwe nəncem-cemne a nkən iyənɛ mə, bafə nkən iyənɛ de! Mba endeder tadarəŋ tem nwe pəntəmar im yati kəsikəli ɔfta dəwecək mə.»

26 Awenc im aŋa, nəna awut aka dokom da Abraham, kə nəna akə nəŋnese Kanu mə, səna ɲə anakere toloku nte tendeyac su mə.

27 Mba aka Yerusalem kə abɛ aŋan ɲanacərə fɛ fum nwe Yesu ɛnayənɛ mə. ɲanagbəkərə fɛ sə moloku ma sayibɛ mme anckaraŋ simiti o simiti dəsək da kəŋesəm mə, mba ɲanader ɲalas moloku maməkə nte ɲanabocər Yesu kiti mə.

28 ɲanasəto fɛ nte o nte təkə pənamar a ɲadife Yesu mə, mba kə ɲantola Pilat kədif kən.

29 Nte ɲalip kəyə mes fəp məkə anacic tetən mə, kə ɲantore kə dətək yepəmpəl, kə ɲaŋkə ɲaboc kə dəkufu.

30 Mba Kanu kənasəŋɛ kə kəfətɛ afi dacə.

31 Kə Yesu owurər mataka mɛlarəm akə ɲanapɛ kə nkən kəyɛfɛ Kalile kəkə ka Yerusalem mə. ɲa

ɲayɔnɛ on aɲɛ ɲanatəɲɛ kəyɛfɛ ka Yesu afi daco mə, ɲa ɲantam sə kəlukse ti afum alɔma.

³² Kɔ sənə toloku tətət tatəkɔ tɔ səlɔku nu: Temer mɛ anasəɲ atem asu mə,

³³ Kanu kələsɛ su ti belbel, sənə dokomɛnɛ danɲan, kəyɛkti ka Yesu, pəmɔ təkɔ ancic ti Yabura Dawuda ya mɛrəɲ disrɛ mə:

⟨Wan kem məyɔnɛ,

bawo in'okom əm kəyɛfɛ məkɔ.⟩

³⁴ Kanu kənalɔku a kəndeyɛkti kɔ afi daco, ntɛ təɲsəɲɛ ta oluksərnɛ pətɛ mə. Ti tɛnasəɲɛ pəlɔku:

⟨Indəsəɲ nu memɛ mosoku mmɛ inasəɲ Dawuda mə,

memɛ mmɛ məyɔnɛ kance mə.⟩

³⁵ Itɔ Kanu kəlɔkɛnɛ kəfo kəlɔma Yabura Dawuda disrɛ:

⟨Məfɔdesak Wəsoku wəkam pətɛ dəkufu.⟩

³⁶ Dawuda nkən ɛnabɛc tɛfan ta Kanu dɛtemp dɔn disrɛ, k'ɛfəntərə k'ɛfi, k'awup kɔ ndɛ atem ɔn kəsək, k'ɛntɛ dəkufu.

³⁷ Mba fum nwe Kanu kənasəɲɛ kəfɔtɛ afi daco mə, nkən ɛnatɛ fɛ.

³⁸ Awɛnc im aɲa, nəcərə ti: Teta nkən Yesu t'ancamɛ nu kəɲaɲnɛnɛ ka kiciya, kiciya nkɛ sariyɛ sa Musa sənətətam kəsəkəsɛ nu mə.

³⁹ Ti disrɛ, nwe o nwe ɛɲgbəkər kəlan kən Yesu mə, Kanu kəndəsəkəs kɔ.

⁴⁰ Nəkɛmbərnɛ ntɛ təɲsəɲɛ mes məkɔ sayibɛ ɲancic mə ta mɛbɛp nu:

⁴¹ ⟨Nəməmən nəna afum aɲɛ nəmbɔtər kəfani mə! Nəyi pəciyanɛ disrɛ, nəsələ!

Bawo ina kəyɔ k'inder tes tɔlɔma kiyi konu doru
 kan̄kɛ disrɛ,
 tes ntɛ nɛntɔdelan̄ kɔ fum oloku nu ti-ɛ.»»

⁴² Ntɛ Pol kɔ Barnabas ɲawur dəkətola Kanu da
 aSuyif mɔ, kɔ afum ɲaletɛsɛnɛ ɲa kəder sɔ simiti
 dɔsɔk da kəɲesəm dɔkɔ dender mɔ kədəgbəkərə
 moloku min mayi.

⁴³ Ntɛ kənay kəsaktɛnɛ mɔ, aSuyif alarəm kɔ akɔ
 ɲambərəɛ dinɛ d'aSuyif mɔ ɲancepsɛ Pol kɔ Barnabas
 kəlɔk-loku kəɲan disrɛ. Kɔ akakɔ ɲasɛp kəcəpəs ɲa
 bəkəc teta kəsumpər kəmar ka Kanu.

⁴⁴ Simiti dɔsɔk da kəɲesəm ndɛ dɛnacɔnc mɔ, kɔ
 aka dare fəp ɲalɔɲkanɛ kəkɔcəɲkəl toloku ta Wəbɛ.

⁴⁵ Ntɛ aSuyif ɲananəɲk kənay ka afum mɔ, kɔ ɲayɔ
 kəraca kəpɔɲ. Kɔ ɲayɛfɛ kəgbəkəl Pol, ɲaclɔməs kɔ.

⁴⁶ Pol kɔ Barnabas ɲambəkɲɛ kəlɔku ɲa: «Nəna
 yati pənamar a pacop kəlɔksɛ toloku ta Kanu. Mba
 ntɛ nənabupərəɛ ti, kɔ nəncɛm-cɛmnɛ a pəmar fɛ a
 nəsɔtɔ kiyi wəyɛɲ ka doru o doru mɔ, ndɛkəl oɲ
 sənə səndekafələ səkɔ ndɛna akɔ ɲantɔyɔnɛ aSuyif
 mɔ.

⁴⁷ Bawo Wəbɛ osom su ntɛ:
 «Isɔɲ'am kəyɔnɛ pəwan̄kərə pa tɔf,
 ntɛ tɔsɔɲɛ məkəkərə kəyɔc ka afum
 han̄ ndɛ cəpəc ca doru fəp cəyi mɔ.»»

⁴⁸ Ntɛ afum ɲane ti mɔ, kɔ pəmbɔt atɔyɔnɛ aSuyif
 dəbəkəc. Kɔ ɲan̄kor-koru toloku ta Wəbɛ, an̄ɛ Kanu
 kənacəmbərəɛ kiyi wəyɛɲ ka doru o doru mɔ, kɔ
 ɲayɔnɛ alan̄.

⁴⁹ Kɔ toloku ta Wəbɛ tɛsaməsər dətɔf fəp.

⁵⁰ Mba kɔ aSuyif alɔma ɲan̄gbiɲər aran abeki
 akor-koru Kanu, kɔ abeki a dare, kɔ ɲancop kətərəs

Pol kɔ Barnabas teta kəlanj kəŋan kɔ ɲambeləs ɲa dare danjan.

⁵¹ Pol kɔ Barnabas ɲaɲkoŋɔr ɲa kəfəl ka wɛcək waŋan, kɔ tɔyɔnɛ sede sa kəfati kəŋan kəcəŋkəl toloku ta Kanu, kɔ ɲaɲkɔ Ikoniyon. *

⁵² Pəmbɔt acɛpsɛ a Yesu darəŋ, kɔ Amera Nəcempi ɲa Kanu ɲɛnayı kɔ ɲa.

14

Pol kɔ Barnabas nde dare da Ikoniyon

¹ Dəndo dare da Ikoniyon, Pol kɔ Barnabas ɲambɛrɛ dəkətola Kanu da aSuyif. Kɔ ɲaloku moloku mmɛ mɛnasəŋɛ aSuyif kɔ aKresi alarəm kəgbəkər Yesu kəlanj mɔ.

² Mba kɔ aSuyif ayɛŋki səbomp aɲɛ ɲambɛrəs afum atɔyɔnɛ aSuyif mɛr kəter ka awɛnc aɲa alanj.

³ Ti disrɛ, Pol kɔ Barnabas ɲambɔləsɛ kiyi kəŋan dəndo dare dadəkɔ. Kɔ ɲalok-lokɛ kəgbəkər mɛra yaŋan teta MARIKI. Kɔ MARIKI əsəŋ ɲa fənəntər fəyɔnɛ mes mɛwɛy-wɛy kɔ mɛgbəkərɛ, pəcmentər sɔ kance ka mes məkɔ Pol kɔ Barnabas ɲanccam kəmar kən disrɛ.

⁴ Kɔ kənay ka afum a dare dadəkɔ ɲayersɛnɛ. Alɔma ɲanayinɛ aSuyif, alɔma ɲayinɛ asom a Yesu.

⁵ Mba, aSuyif kɔ acikərə kəbəp ka abɛ aɲan ɲanalompəsɛnɛ kəkətərəs Pol kɔ Barnabas kəca-cas kəŋan masar haɲ ɲadif ɲa.

* **13:51** *ɲaɲkoŋɔr ɲa kəbof ka wɛcək waŋan* = pəmɔ təkɔ Mariki Yesu ɛnaloku ti acɛpsɛ ən darəŋ mɔ: a dare o dare dəkɔ ɲaɲkɔ a tawosɛ kəcəŋkəl toloku ta Kanu mɔ, a ɲakoŋɔr dare dadəkɔ kəbof ka wɛcək waŋan. Ti t'ɛŋmentər a ɲanacɛpər dare dadəkɔ akɔ antəwosɛ kəcəŋkəl toloku ta Kanu.

6 Nte Pol kɔ Barnabas ɲane ti mɔ, kɔ ɲayɛkse kəkɔyacɛ nde Listɛr kɔ Dɛrbɛ, sɛdare sa atɔf ɲa Likayoni, kɔ səkəsək sayi.

7 Dɛndo sɔ ɲanccam toloku tɔtɔt ta Yesu.

Pol kɔ Barnabas nde dare da Listɛr

8 Fum wɛlɔma ɛnayi Listɛr pɛyɔnɛ wɛtɔɲkulu, wɛcɛk wɔn wɛnafi. Kɛyɛfɛ nte aɲkom kɔ mɔ, ali ɔɲckɔt fɛ. ɛnandɛ,

9 pɛccɛɲkɛl moloku ma Pol. Kɔ Pol ɛɲgbɛtɛ kɔ. Nte ɛɲɲk a wɛtɔɲkulu ɔyɔ kɛlan ɲkɛ kɛntam kɛyac kɔ mɔ,

10 kɔ Pol oloke kɔ dim dɔpɔɲ: «Mɛyɛfɛ! Mɛcɛmɛ wɛcɛk wam kɛron, mɛlomp!» Kɔ wɛrkun nwe oyokɛ, k'ɛyɛfɛ k'ɛncɛmɛ kɛkɔt.

11 Kɔ kɛnay ka afum akakɔ ɲanɲk nte Pol ɔyɔ mɔ, kɔ afum kɛnay ɲampɛnɛ cɛbebe ɲacloku cɛLikayoni: «Canu cɛntɔɲkɛlɛ afum kɔ cɛntɔr nnɔ ndorosu!»

12 Ti tenasɔɲɛ ɲawe Barnabas «Sus», ɲawe Pol nkɔn «Hɛrmɛs», bawo Pol nkɔn ɛncɛpɛrɛnɛ moloku.*

13 Wɛlɔɲnɛnɛ ka Sus ɛnakɛrɛ mura kɔ yɛnɛkɛs nde dɛkɛbɛrɛ da kɛlɔ ka dɛkɛlɔɲnɛ ndɛ deyɛ nde dare dɛkusu mɔ. Pɛnabas kɔ kɛlɔɲnɛ mi, nkɔn kɔ kɛnay ka afum nnɔ Pol kɔ Barnabas ɲayi mɔ.

14 Mba nte asom a Yesu Barnabas kɔ Pol ɲane ti mɔ, kɔ ɲawal-wali yamos yaɲan, kɔ ɲambɛrɛ afum dacɔ ɲackulɛ-kulɛ:

15 «Anapa! Ta ake tɔ nɔyɔnɛ tante-ɛ? Sɛna sɔ, afum ɲɔ sɔyɔnɛ, palompɛs su tin tayɛ pɛmɔ nɛna. Sɛloku nu toloku tɔtɔt nte tɔɲsɔɲɛ nɛsak mes

* **14:12** Dinɛ da aKresi «Sus» ɛnayɔnɛ wɛbɛ ka canu, kɔ «Hɛrmɛs» ɛnayɔnɛ wɛcɛpɛrɛnɛ kɔn moloku.

meyamayama mamε mɔ! Nəkafələr Kanu fər nkε kəyi wəyeŋ mɔ, Kanu nkε kəlompəs kəm, antəf kə kəba, kə ca yəkə yeyi ki mɔ fəp.

¹⁶ Dεtemp dəkə denacepər mɔ, Kanu kənowosεne afum a təf ya doru fəp ηactam kəcəme dəpə darəŋ dəkə ηaŋfaŋ mɔ.

¹⁷ Ali nte nkən Kanu kənaṭəsak kəcmentər nu dətət dəməyɔ mən mɔ, bawo kəncsəŋ nu wəcafən, kəncsəŋe sɔ yəbəf yonu kəkəom pəlarəm, kə kəncsəŋ nu sɔ yeri yelarəm, kə kənclas nu sɔ pəbotu dəbəkəc.»

¹⁸ Ali nte Pol kə Barnabas ηanaloku moloku maməkə mɔ, pəcuca pənayi ηa kəyamsər ka kənay kaŋkə kəlɔŋne cəna nce ηanafəŋ kəlɔŋne ηa mɔ.

¹⁹ Kə aSuyif aləma ηander kəyεfe Antiyək ηa Pisidi kə Ikoniyon, kə ηasep haŋ kə ηantalər kənay ka afum akakə. Nte tɔ kə kənay ka afum aŋe ηayεfe kəca-cas Pol. Təlpəs kə ηaliŋəs kə haŋ dare kəsək, ηacem-cemne a efi.

²⁰ Mba nte acεpse a Yesu darəŋ ηanadekəl Pol mɔ, k'eyεfe, k'oluksərne dare. Dəckəsək kə ηaŋkə dare da Dεrbe, nkən kə Barnabas.

Kəlukus ka Pol kə Barnabas Antiyək atəf ηa Siri

²¹ Nte Pol kə Barnabas ηambəp dare da Dεrbe kə ηancam dəndo toləku tətət ta Yesu. Kə ηasətɔ di afum alarəm aŋe ηanalaŋ teta Yesu mɔ. Nte tɔ kə ηalək dəpə kəlukus ka Listər, Ikoniyon kə Antiyək ηa Pisidi.

²² Kə ηacəpəs acεpse darəŋ bəkəc, ηacgbiŋər ηa kəyine kəlaŋ, ηacləku: «Kə səna, mēne səcepərəne pəcuy pəlarəm a səbεre nde akip ηa dəbe da Kanu dəntəf.»

²³ Kɔ ɲayek-yekɛ ɲa abeki dækəlɔŋkanɛ fəp da alaŋ. Ntɛ ɲalip kətola Kanu kɔ kəsun mə, Pol kɔ Barnabas ɲasɔŋ ɲa Mariki nwe ɲanagbəkər kəlaŋ mə kəbum kəŋan.

²⁴ Kɔ ɲancepər dɔpɔ da atɔf ɲa Pisidi kɔ ɲambɛrɛ atɔf ɲa Paŋfili.

²⁵ Ntɛ ɲalip kəlɔku toloku ta MARIKI dare da Perke mə, kɔ ɲantor dare da Atali.

²⁶ Dəndo Atali, difɔ Pol kɔ Barnabas ɲanalek abil kɔ ɲancali kəkɔ Antiyɔk ɲa Siri, dare ndɛ anatolane ɲa kəmar ka Kanu teta yebæc nyɛ ɲanalip mə.

²⁷ Ntɛ ɲambɛrɛ mə, kɔ ɲalɔŋka alaŋ a Antiyɔk fəp, kɔ ɲaləm təkɔ Kanu kənayɔnɛ ɲa mə, kɔ təkɔ nkən Kanu kənasɔŋɛ atɔyɔnɛ aSuyif kəlaŋ mə.

²⁸ Pol kɔ Barnabas ɲawon dəndo dare dadəkɔ kɔ acɛpse a Mariki Yesu darəŋ.

15

Kəbəpsɛnɛ ka alaŋ ndɛ Yerusalem

¹ Afum alɔma ɲanayɛfɛ atɔf ɲa Yude, ɲactəkse awɛnc aŋa alaŋ ntɛ: Kɔ nəntɔyɔ pakənc nu pəmɔ təkɔ tɔyɔ tokur ta Musa toloku ti mə, Kanu kəfɔdewosɛ kəyac nu.

² Ntɛ Pol kɔ Barnabas ɲaŋgbəkəlɛnɛ kɔ arkun akakɔ kəlɪŋɛnɛ kəŋan moloku mə, kɔ ɲantəŋnɛ a nkən Pol kɔ Barnabas kəbəp ka akin akin arkun akakɔ dacɔ, ɲakɔ Yerusalem kəkənɔnɛ moloku maməkɔ nnɔ asom a Yesu kɔ abeki a kəlɔŋkanɛ ka alaŋ fɔr kirin.

³ Kɔ kəlɔŋkanɛ ka alaŋ a Antiyɔk ɲasɔŋ ɲa daka ndɛ pənamar a ɲayɔ teta marənt mə. Ntɛ ɲancepər atɔf ɲa Fenisi kɔ atɔf ɲa Samari mə, kɔ ɲaləmər

ɲa nte atɔyɔne aSuyif ɲaɲkafɛli bɛkɛc yaɲan nno Mariki eyi mɔ, ɲacsɔɲe awɛnc aɲa alaɲ fɛp pɛbotu.

⁴ Nte ɲamberɛ Yerusalem mɔ, kɔ kɛlonkanɛ ka alaɲ, asom a Yesu, kɔ abeki a kɛlonkanɛ ɲambaɲ ɲa. Nte tɔ Pol kɔ Barnabas ɲalɔm tɔkɔ Kanu kɛnayɔ fɛp kɔ ɲa mɔ.

⁵ Awa kɔ aFarisi alɔma aɲe ɲanayɔne alaɲ mɔ ɲayefe kɔ ɲaloku: «Pɛmar pakɛnc atɔyɔne aSuyif, pagbiɲɛr ɲa sɔ kɛlelɛs sariye sa Musa.»

⁶ Asom a Yesu kɔ abeki a alaɲ aka Yerusalem ɲanabɛpsɛnɛ kɛkɔmɔmɔn ka tes tatɔkɔ.

⁷ Nte kɛgbekɛlenɛ kɛwɔn ɲa dacɔ mɔ, kɔ Piyɛr eyefe k'oloku: «Arkun, awɛnc im aɲa, nɛncɛre ti: A pɛwɔn nte Kanu kɛnayɛk-yek im nɛna dacɔ kɛcam ka Kibaru Kɛtɔt ka Yesu, nte tɔɲɔɲe atɔyɔne aSuyif ɲatam kɛne ti kɔ kɛlaɲ ti mɔ.

⁸ Kanu kɛncɛre bɛkɛc ya afum, Ki yati kɛmentɛr a kɛmbaɲ atɔyɔne aSuyif, bawo kɛsɔɲ ɲa sɔ Amɛra ɲecɛmpi pɛmɔ sɛna.

⁹ Ali kɛgbɛy kɛfɛt ɛɲgbɛy fɛ su kɔ atɔyɔne aSuyif, bawo kɛlaɲ k'ɔsɔkɛs ɲa bɛkɛc.

¹⁰ Nɛkɛl ɔɲ, ta ake tɔ nɛfaɲ kɛɔkɛtɛre Kanu-ɛ? Nte nɛfaɲ kɛsarsɛr acɛpsɛ a Yesu tes tocu nte, kɛyefe atɛm asu haɲ sɛna yati sɛntɔtam kɛsarɛ mɔ.

¹¹ Mba sɛlaɲ a andɛyac su kɛmar ka Mariki Yesu disre pɛmɔ ɲa atɔyɔne aSuyif.»

¹² Kɛnay ka afum fɛp ɲanacɔɲk, k'ancɛɲkɛl ɔɲ moloku ma Barnabas kɔ Pol. Kɔ ɲalɔm mes mɛwɛy-wɛy kɔ mɛgbekɛre mɛmɛ Kanu kɛnasɔɲe ɲa kɛyɔ atɔyɔne aSuyif dacɔ mɔ.

¹³ Nte ɲalip kɛloku mɔ, kɔ Sak endɛɲɛr: «Awɛnc im aɲa! Nɛcɛɲkɛl im!

14 Simeyɔŋ ɔlɔm tɔcɔkɔ-cɔkɔ nte Kanu kɔnader kɔyɛk-yɛk tɔf ya doru fɛp dacɔ, afum anɛ ɲayɔnɛ akɔn mɔ.

15 Itɔ moloku ma sayibɛ mosolnɛ kɔ moloku ma Simeyɔŋ pɛmɔ nte ancic ti mɔ:

16 «Kɔ Mariki oloku: «Kɔ tantɛ tencepɛr-ɛ, indeder sɔ.

Indeyekti sɔ abal ɲa Dawuda ɲɛ ɲɛnatɛmpɛnɛ mɔ, indeyekti samba sa abal ɲaɲɔkɔ,

Indecɛmbɛr ɲi sɔ ɲolomp,

17 nte tɔɲsɔɲɛ afum alpɛs ɲatɛn ina Mariki mɔ.

Ɔy, dɔtɔf fɛp nyɛ anakornɛ tewe tem mɔ.»

Mariki oloku nte, nwe ɔɲyɔ mes mamɔkɔ mɔ

18 Ɔnasɔɲɛ mi kɛcɛrɛ kɔyɛfɛ nte pɛnawon mɔ.»

19 It'ɔsɔɲɛ nte, ina Sak, ɲɲwosɛ sɔ a ta patɔrɛs atɔyɔnɛ aSuyif anɛ ɲantɛfɛrnɛ nnɔ Kanu kɔyi mɔ.

20 Mba pacicɛ ɲa a ɲakɛmbɛrnɛ pɔtɔcɛmp mɲɛ pɛyɛfɛ nnɔ kɔtola mɛrɔɲka kɔyi mɔ, kɔ dalakɔ, kɔ kɛsɔm ka sɛm nyɛ antɔfay mɔ, ɲakɛmbɛrnɛ sɔ kɛmun mecir.

21 Kɔyɛfɛ dɛtɛmp dɔcɔkɔ-cɔkɔ, Musa ɔyɔ sɔdare fɛp afum anɛ ɲaloku tetɔn mɔ, bawo anɲkaraɲ Tawureta tɔn simiti o simiti dɔsɔk da kɔɲesɛm nde dɛkɔtola Kanu da aSuyif.»

Areka ɲɔkɔ anakenɛ alañ atɔyɔnɛ aSuyif mɔ

22 Asom a Yesu kɔ abeki kɛbɛp ka kɔlonɲkanɛ ka alañ Yesu kɔrkɔr ɲande ɲamɔmɔn a pɛmar payɛk-yɛk ɲa dacɔ afum alɔma akɔ pɛmar a pasom Antiyɔk mɔ, kɛberɛnɛ ka Pol kɔ Barnabas. Ti disrɛ kɔ ɲayɛk-yɛk afum mɛrɔɲ anɛ ɲanatɛmpɛr delel awɛnc anɲa dacɔ mɔ: Yudas wɛkɔ ancwe sɔ Barsabas mɔ, kɔ Silas.

23 Kɔ ɲasom ɲa kɔ areka nyɛ:

«Awɛnc anu, asom a Yesu kɔ abeki kɔ alañ ɲancɛ nu areka, nɛna awɛnc su aɲa aka Antiyɔk, aka Siri, aka Silisi aɲɛ ɲantɔyɔnɛ aSuyif mɔ:

Səyif nu!

24 Sɔnɛ a afum asu alɔma aɲɛ ɲawur nnɔ ndorosu mɔ, ɲantɔrɔs nu kɔ ɲampempe nu moloku maɲan, mɛnɛ sɛntɔsom ɲa mɔ.

25 Ntɛ sɛnɛnɛnɛ akɔ sɛntɔɲnɛ ti mɔ, itɔ sɛnɔɲk a pɔntesɛ sɔyɛk-yɛk afum, sɔsom ɲa ndɛ nɔyi mɔ, kɛbɛrɛnɛ ka Barnabas kɔ Pol, aɲɛ sɛmbɔtɔr mɔ,

26 afum aɲɛ ɲancamɔs kiyi kɔɲan doru tewe ta Mariki Yesu Krist mɔ.

27 Itɔ sɔsom Yudas kɔ Silas ɲakɔ ɲaloku nu ntɛ teyi areka ɲaɲɛ disrɛ mɔ.

28 Pɔnabas Amera Nɛcɛmpɪ kɔ sɔna sɔ, a pɔntesɛ fɛ a sɛnuɲkɔr nu mes mɔkɔ nɛntɔtam kɛsarɛ mɔ, mɛnɛ mes mɔkɔ mɛmar nu kɛsumpɔr mɔ:

29 Ta nɛsɔm sɛm nyɛ alɔɲnɛnɛ mɛrɔɲka mɔ, nɛbɔlɛnɛ mɛcir kɔ sɛm nyɛ antɔfay mɔ, nɛbɔlɛnɛ sɔ dalakɔ. Pɔmar nɛkɛmbɔrnɛ mes mamɔkɔ fɔp.

Kanu kɛsɔɲɛ a nɛtamnɛ.»

30 Ntɛ anasak asom aɲɛ mɔ, kɔ ɲawurnɛ kɛkɔ Antiyɔk. Kɔ ɲaɲkɔ ɲalɔɲka di alañ, kɔ ɲasɔɲ ɲa areka ɲaɲkɔ.

31 K'aɲkaraɲ ɲi kɔ pɔmbɔt ɲa, bawo areka ɲaɲkɔ ɲɛnacɔpɔs ɲa bɛkɛc.

32 Yudas kɔ Silas aɲɛ ɲanayɔnɛ sɔ sayibɛ mɔ ɲancgbɪɲɔr awɛnc aɲa alañ kɔ ɲacɔpɔs ɲa sɔ bɛkɛc dɛmoloku mɛlarɛm.

33-34 Nɔnayi dɛndo Antiyɔk haɲ, kɔ awɛnc aɲa alañ ɲatolɛnɛ ɲa marɛnt moforu, kɔ afum a Antiyɔk ɲasak ɲa kɛlukus ndɛ asom aɲan ɲayi mɔ.

³⁵ Mba tem tatokɔ Pol kɔ Barnabas njanayi An-tiyok, kabereɛne kɔnan kɔ afum alarɛm alɔma, nactakɛ, naccam sɔ toloku totɔt ta Mariki.

Pol kɔ Barnabas njanbeyɛne

³⁶ Nte mataka mɔlɔma mencepɛr mɔ, kɔ Pol oloku Barnabas: «Sɛluksɛrne sɛkɔnɔnk awɛnc su aɲa sɛdare nɛ sɛnadɔnk toloku ta Mariki mɔ, nte tɔɲsɔɲe sɛcɛre nte nɲayi mɔ, kɔ tokɔ nɲasumpɛr toloku tatokɔ mɔ.

³⁷ Barnabas nkɔn encfanj kɛkenɛne Isan, wɛkɔ aɲwe sɔ «Mark» mɔ.

³⁸ Mba Pol nkɔn enawosɛ fɛ ti, enacɛm-cɛmne a pɛmar fɛ kɛkɛne Mark, bawo dɛndo Paɲfili Mark enasak nɲa pɛfati kɛcɛmbɛr nɲa kɛkɔtɛne ka yebac yɔkɔ anasom nɲa mɔ.

³⁹ Kɛgbekɛlɛne kɔnan kɛnayeɲk hanj kɔ tɔsɔɲe nɲa kɛgbeyɛne. Nte tɔ kɔ Barnabas ɛlek Mark kɔ nɲambeke debil kɔ nɲancali kɛkɔ Sipɛr.

⁴⁰ Nte Pol enayek-yek Silas mɔ, awɛnc aɲa alan nɲantolane kɔ, nactola Mariki a pɛbum nɲa kɛmar kɔn disre, kɔ nɲankɔ.

⁴¹ Kɛkɔ kɔnan, kɔ nɲancali tɔf ya Siri kɔ Silisi, naccɛpɛs alan aka di bɛkɛc.

16

Timote encɛmbɛr Pol kɔ Silas

¹ Pol enabere dare da Dɛrbe, k'ɔɲkɔ sɔ Listɛr. Dɛndo wɛcɛpsɛ Yesu darɔɲ wɛlɔma enayi pacwe kɔ Timote, kɛre pɛyɔne wɛSuyif nwe enader pɛlanj Yesu mɔ, mba kas pɛyɔne wɛKresi.

² Awɛnc aɲa alanj aka Listɛr kɔ Ikoniyon nɲanatɔɲne kɛyɔ kɔn mes mɔtɔt.

³ Kɔ Pol efaŋ kɛkɛkɛ Timote, k'elek kɔ k'ɛŋkɛnc teta aSuyif akɔ ŋanayi atɔf ŋaŋɔkɔ mɔ, bawo fɛp fɛnacɛre a Timote kas wɛKresi ɛnayi.

⁴ Sɛdare nse ŋancceɔpɛr mɔ, ŋanclukse moloku mme asom a Yesu kɔ abeki alañ a Yerusalem ŋanasom ŋa kɛkɛtɛne mɔ, nte tɔŋsɔŋe alañ atɔyɔne aSuyif ŋacɛme mi darəŋ mɔ.

⁵ Alonkanɛ alañ ŋaccɛpɔs bɛkɛc kɛlɔŋ disre, ŋacberɛne kɛla dɔsɔk o dɔsɔk.

Pol ɛnasɔtɔ kɛnəŋk kɛyɛfɛ darenc

⁶ Nte Amera Nɛcempi ŋa Kanu ŋeyamse Pol kɔ Silas kɛlɔku tolɔku tɔtɔt ta Kanu atɔf ŋa Asi mɔ, kɔ ŋancali atɔf ŋa Firiki kɔ atɔf ŋa Kalat.

⁷ Nte ŋalɔtɛrne atɔf ŋa Misi mɔ, kɔ ŋaseɔp kɛkɔ atɔf ŋa Bitini, mba Amera ŋa Yesu ŋenawosɛne fe ŋa ti.

⁸ Kɔ ŋasolne atɔf ŋa Misi kɔ ŋantor dare da Torowas.

⁹ Pibi disre kɔ Pol ɔsɔtɔ kɛnəŋk kɛyɛfɛ ka darenc. Ti disre, wɛka Masedon pɛcɛme kɔ kɛsɛk pɛclɛtsɛne kɔ: «Mɛder Masedon, mɛmar su!»

¹⁰ Pol ɛnadesɔtɔ kɛnəŋk kɛŋkɔ, kɔ sɛntɛn katina kɛkɔ ka atɔf ŋa Masedon, sɛcboc ti a Kanu kɛwe su kɛkɛcam di tolɔku tɔtɔt ta Yesu.

Ludy kɛlɔŋ kɛn Mariki Yesu

¹¹ Kɔ sɛyɛfe Torowas kɔ sɛyɛkti abela kɔ sɛntɛfɛrne kɛkɔ ka Samotiras, dɔckɔsɔk kɔ sɛmbɛre Neyapoli.

¹² Kɔ sɛyɛfe dɛndo, kɔ sɛŋkɔ Filipi, dare dɔpɔŋ da atɔf ŋa Masedon dɛlɔma ndɛ aka Rom alarɛm ŋanandɛ mɔ. Kɔ sɛncepɛrɛne mataka mɛlɔma dare dadɔkɔ.

¹³ Simiti dɔsɔk da kɛɲesɛm kɔ sɛwɔr dare dɔkusu kɛɲgbɔkɔ kɛsɔk, nde sɛnacɛm-cɛmnɛ kɛfo nkɛ sɛntam kɛtola Kanu mɔ. Kɔ sɛndɛ kɛlok-lokɛr aran aɲɛ ɲanalɔɲkanɛ di mɔ.

¹⁴ Wɛran wɛlɔma ɛnai ɲa dacɔ pacwe kɔ Ludy, pɛccamɛs cɛloto ca karɛ. Pakom kɔ dare da Tiyyatir. Wɛkor-koru Kanu ɛnai. Pɛccɛɲkɛl su, kɔ Mariki ɛɲgbiti kɔ abɛkɛc, ntɛ tɔɲsɔɲɛ kɔ kɛcne belbel moloku mmɛ Pol oncloku mɔ.

¹⁵ Ntɛ anagbɛt kɔ dɛromun teta Kanu mɔ, Ludy kɔ aka kɛlɔ kɛn disɛ, k'ewe su kɛyi nde ndɔrɔn mataka mɔlɔma, pɛctola: «Kɔ nɛncɛm-cɛmnɛ a ilan Mariki belbel-ɛ, nɛder nnɔ nderem, nɛyi nnɔ kɔ sɛna.» K'ɛletsɛnɛ su kɛyi di.

Kɛcaɲɛr ka Pol kɔ Silas nde bili ba Filipi

¹⁶ Dɔsɔk dɔlɔma sɛckɔ dɛkɛtola Kanu da aSuyif, kɔ wɛyecɛra wɛcar wɛlɔma ender pɛbɛp su, pɛyɔ ɲɔɲk nɲɛ ɲɔɲsɔɲɛ kɔ kɛloku ntɛ tender mɔ. Wɛyecɛra nwe ɔncsɔtɔnɛ ti nnɔ abɛ ɔn ɲayi mɔ pɛsam pɛlarɛm teta kɛloku kɛn mes mmɛ mender mɔ.

¹⁷ Kɔ wɛyecɛra nwe ɛncɛpɛ su darɔɲ Pol kɔ sɛna, pɛckule-kule: «Afum akanɛ acar a Kanu nkɛ kɛyi darenc mɔ ɲɔ! Dɔpɔ da kɛyac dɔ ɲayi kɛmentɛr nu!»

¹⁸ Ntɛ wɛyecɛra ɔyɔ mes mamɔkɔ mata mɛlarɛm mɔ, kɔ tɔlɔlɛs Pol dis. K'ɛɲkafɛlɛ, k'oloku ɲɔɲk: «Tewe ta Yesu Krist ilok'ɛm, mɛwɔr wɛyecɛra wɛkawɛ dɛris!» Gbɛncana babɔkɔ kɔ ɲɔɲk ɲaɲkɔ ɲowɔr kɔ dɛris.

¹⁹ Ntɛ abɛ ɔn ɲanɔɲk a tɔsɔtɔnɛ tanɲan pɛsam tɔsɔlɛr ɲa mɔ, kɔ ɲasumpɛr Pol kɔ Silas, kɔ ɲaɲkɛkɛrɛ ɲa nde abanɲa ɲa dare dacɔ abɛ a dare fɔr kirinɲ.

20 Kə ɲaɲkə ɲamentər ɲa aboc kiti, ɲaɲloku: «Afum akanɲe pəyamayama pə ɲayi kəbersɛnɛ dare dosu. ASuyif ɲə ɲayɔnɛ,

21 aɲɛ ɲayi kəcam məyɔ maɲan mme pəntɔmar su kəwosɛ kəyɔ ka mi, səna aɲɛ səyɔnɛ aka Rom mə.»

22 Kə kəɲay ka afum ɲayɛfɛ kə ɲancəme ɲa dəbəkəc. Kə aboc kiti a dare dadəkə ɲawurɛ ɲa yamos, k'asutɛ ɲa cəɲgban-gban.

23 Ntɛ alip kəsut ɲa pəlarəm mə, kə ɲamber ɲa dəbili, kə abɛ ɲaloku wəbum bili a pəkembərnɛ ɲa belbel.

24 Ntɛ wəbum bili ene moloku maməkə mə, k'ember ɲa nde bili mbe ɲantɔtam kəwur mə, k'ɔɲkotərənɛ ɲa wəcək məmbɔɲk ma tək.

25 Cək-cək cəndəbəp, Pol kə Silas ɲactola Kanu, ɲaclɛɲəs mɛlɛɲ mokor-korɛ Kanu, kə ayi dəbili ɲaɲne sim səɲan.

26 Gbəncana babəkə kə antɔf ɲeyikcɛ pəpəɲ, kə təsəɲɛ kəlɔ ka bili tantɔf kəcəkələ. Kə cumba fəp cəɲgbite, kə gbekcɛ fəp yɔɲkɔɲɛ.

27 Kə wəbum bili entimɛ, k'ɛɲəɲk ntɛ cumba ca bili cəɲgbite mə, k'owurɛ dakma dən pəkəkə kədifnɛ, bawo ɛnacɛm-cɛmnɛ a afum aɲɛ ambɛr dəbili mə ɲayɛksɛ.

28 Kə Pol ɔɲkulɛ-kulɛ pəpəɲ: «Ta məyɔnɛ pələc, səyi nnə fəp fosu!»

29 Kə wəbum bili ewe nɛnc, k'embɛrɛ katəna katəna, k'əɲkə pətɛmpɛnɛ fər ya Pol kə Silas kirin, pəcyikcɛ kənɛsɛ disrɛ.

30 K'owurɛnɛ ɲa nde doru k'eyif ɲa: «Abɛ, cəkɛ cə pəmar iyɔ ntɛ tendeyac im mə-ɛ?»

31 Pol kə Silas ɲaloku kə: «Mələɲ Mariki Yesu, andekəyac əm, məna kə aka kəlɔ kam disrɛ fəp.»

³² Kɔ ɲaloku kɔ toloku ta Mariki, kɔ afum akɔ ɲanayi nde kɛlɔ kɛn mɔ fɛp.

³³ Pibi papɔkɔ kɔ wɛbum bili ɛlek ɲa, k'ɛɲkɛkɛrɛ ɲa kɛkɔyak gbali yaɲan. Wɛbum bili kɔ afum ɔn fɛp ɲasɔtɔ gbɛncana babɔkɔ kɛgbɛt dɛromun teta Kanu.

³⁴ K'ɛmpɛnɛ ɲa nde ndɔrɔn, k'ɛncɛmbɛr amɛsa, kɔ ɲawolɛs kɔ aka kɛlɔ kɛn disrɛ pɛbotu pa kɛlan kɛn Kanu.

³⁵ Ntɛ dec dɔsɔk mɔ, kɔ aboc kiti a dare ɲasom afum aɲan alɔma kɛkɔloku wɛbum bili: «Mɛsak afum akanɛ.»

³⁶ Kɔ wɛbum bili olukɛ moloku mamɔkɔ Pol: «Aboc kiti a dare ɲasom afum nnɔ iyi mɔ, a isak nu. Awa nɛwɔr nɛkɔnɛ bɛkɛc yoforu.»

³⁷ Mba kɔ Pol oloku ɲa: «Ntɛ ɲalip ɔɲ kɛsut su fɛr ya afum kirin mɔ, ta aɲkiti su-ɛ, sɛna aɲɛ sɛyɔnɛ aka Rom mɔ, ɲabɛr su dɛbili. Nɛkɛl ɔɲ yɔkyɔk yɔ ɲandɛfan kɛsak su ba? Tatɔkɔ tɔfɔyi, ɲader ɲasɛrka ɲasak su!»

³⁸ Kɔ asɔdar ɲaɲkɔ ɲalukɛ moloku mmɛ aboc kiti, kɔ ɲanɛsɛ ntɛ ɲanane a Pol kɔ Silas aRom ɲɔ ɲayɔnɛ mɔ.

³⁹ Kɔ aboc kiti a dare ɲander ɲalɛtsɛnɛ Pol kɔ Silas kɛɲaɲnɛ, kɔ ɲasak ɲa. ɲacloku a ɲawɔr dare dandɛ.

⁴⁰ Ntɛ ɲawɔr dɛbili mɔ, Pol kɔ Silas ɲaɲkɔ ndena Ludy. Kɔ ɲanɛɲk awɛnc aɲa alan, kɔ ɲacɛpɛs ɲa bɛkɛc. Kɔ ɲasumpɛr dɔpɔ, kɔ ɲaɲkɔ.

17

Pol kɔ Silas nde dare da Tesaloni

¹ Nte ñancepær Anḡfipoli kô Apoloni mǎ, kô ñambere dare da Tesaloni, nde aSuyif ñanayo kǎlo ka dǎkǎtola Kanu mǎ.

² Kô Pol ǎḡkô pǎmǎ tǎkǎ ǎncyǎ mǎ, simiti dǎsǎk da kǎñesǎm maas ñacgbekǎlene dǎyecicǎs yecempi kô ña.

³ Pol ɛncmentær ña pǎsǎk pǎs dǎYecicǎs Yosoku a pǎnamar dis dǎlǎl Krist, a pǎdeyefe afi dacǎ. Pol oncloku ña: «Yesu nwe indǎḡkær nu tetǎn mǎ, nkǎn ǎyǎne Krist, wǎbe nwe Kanu kǎyek-yek mǎ.»

⁴ Anasep han k'ɛḡkafǎli alǎma ña dacǎ kô ñalanḡ ti, kô ñancǎme moloku ma Pol kô Silas darǎḡ, kǎbǎp ka akor-koru Kanu aKresi alarǎm, kǎlekene sǎ aran abeki alǎma.

⁵ Mba kô aSuyif aka dare da Tesaloni alǎma ñayo kǎraca. Kô ñalonḡka afum alɛc alǎma dǎpǎ dacǎ, kô ñayekti pǎyamayama dare disre. Kô ñanḡkô ñamepne kǎlo ka Yason, ñacten Pol kô Silas kǎkekǎre ña kǎnay ka afum fǎr kirinḡ.

⁶ Nte ñanatǎnḡk Pol kô Silas mǎ, kô ñalinḡs Yason kô awɛnc aḡa alanḡ alǎma fǎr ya abe a dare kirinḡ. Ñackule: «Afum akanḡe ñanḡkafǎli-kafǎli doru dandɛ fǎp mǎ, ñayi oḡ nnǎ,

⁷ kô Yason nkǎn ɛmbanḡ ña!» Afum akanḡe fǎp ñance moloku mme wǎbe wǎka tǎf ya Rom fǎp oloku mǎ, ñacloku a wǎbe wǎlǎma eyi, pacwe kô Yesu!»

⁸⁻⁹ Ti tenasḡḡe ñayekti pǎyamayama kǎnay ka afum dacǎ. Nte abe a dare ñane ti mǎ, kô ñambanḡer Yason kô awɛnc aḡa alanḡ pǎsam, kô ñasak ña.

Pol kô Silas nde dare da Bere

¹⁰ Pibi papǎkǎ disre kô awɛnc aḡa alanḡ ñasak Pol kô Silas kǎkǎ dare da Bere. Nte ñambere di mǎ, kô ñanḡkǎ nde dǎkǎtola Kanu da aSuyif.

¹¹ Akakɔ ɲanabɔt mes ɲatas aka Tesaloni, kɔ ɲancɛɲkɛl toloku ta Kanu belbel pɛbotu disrɛ. ɲackɔkɛ sɔ Yecicɛs Yosoku belbel dɔsɔk o dɔsɔk kɛcɛrɛ kɔ pɛyɔnɛ a moloku min mayi mɔ kɔ tɔkɔ Pol kɔ Silas ɲaɲloku ɲa dɛkɛtola Kanu mɔ.

¹² Kɔ afum alarɛm ɲa daco ɲayɔnɛ alarɲ, kɛlɛkɛnɛ aran aKresi aɲɛ ɲanabɛk dɛkɛcɛmɛ mɔ, kɔ arkun alarɛm.

¹³ Mba ntɛ aSuyif aka Tesaloni ɲanadecɛrɛ a Bere sɔ Pol eyi kɛcam toloku ta Kanu mɔ, kɔ ɲander sɔ dɛndo kɛdeyɛkti pɛyamayama ɲabɛrɛs kɛnay ka afum daco.

¹⁴ Kɔ awɛnc aɲa alarɲ ɲambɛlkɛr kɛkɛkɛrɛ Pol kɛca ka dɛkɛba, mba Silas kɔ Timote ɲayi dɛndo Bere.

¹⁵ Afum aɲɛ ɲanasolɛ Pol mɔ, ɲanakekɛrɛ kɔ haɲ dare da Atɛn. Dɛkɛlukus danɲan kɔ Pol osom ɲa nde Silas kɔ Timote ɲayi mɔ, a ɲabɛlɛr kɔ katɛna katɛna.

Pol nde dare da Atɛn

¹⁶ Ntɛ Pol ɛnckar Silas kɔ Timote nde dare da Atɛn mɔ, kɛnɛɲk ka dare dadɔkɔ dɛlarɛ mɛrɛɲka kɛnacɛ kɔ Pol dɛbɛkɛc.

¹⁷ Pol ɛncgbɛkɛlɛnɛ kɔ aSuyif kɔ alɔma akɔ ɲanader kɛkor-koru Kanu nde dɛkɛtola d'aSuyif mɔ, pɛcgbɛkɛlɛnɛ sɔ dɔsɔk o dɔsɔk kɔ afum akɔ ɲancyi nde abanɲka ɲa dare mɔ.

¹⁸ Acɛpsɛ mɛtɛksɛ ma Epikuru kɔ ma Seno darɛɲ alɔma ɲander ɲacɲ kɔ moloku. Alɔma ɲacloku: «Wɛlok-loku ɔfɔ wɛkawɛ! Cɛke c'ɛfan kɛloku tantɛ?» Akɔ ɲacloku: «Wɛkawɛ pɛwɛrɛnɛ pɛmɔ ntɛ endecam teta canu cɛcikɛra mɔ!» ɲanaloku ti bawo toloku tɔtɔt ta Yesu kɔ kɛyɛfɛ kɛn aɲi daco kɔ Pol oncloku.

19 Awa kɔ ɲalɛk Pol, kɔ ɲaɲkekɔrɛ kɔ tɛpɛsa mpɛ ancwɛ Areyopako mɔ kɔron, kɔ ɲayif Pol: «Mɔloku su kɛtɛksɛ kɛfu kanɲɛ mɔyi kɛloku ta ki mɔ,

20 bawo moloku mamɛ mɔyi kɛloku mɔ, mɔyɔnɛ lɛɲɔs yosu mofu. Sɛfan kɛcɛrɛ tedisrɛ ta mi.»

21 Awa dɛmɔyɔ ma aka dare da Aten kɔ acikɛra aɲɛ ɲanayi di mɔ fɛp, ɲancɛpɛrɛnɛ di tɛm taɲan fɛp kɛcloku, kɔ pɔyɔnɛ fɛ ti-ɛ, ɲaccɛɲkɛl moloku mofu.

22 Pol pɛcɛmɛ tɛpɛsa ta Areyopako kɔron, k'oloku: «Arkun a dare da Aten, inɛɲk a afum asumpɛr dinɛ belbel ɲɔ nɔyɔnɛ.

23 Ntɛ indenakɔt dare donu mɔ, k'inɛɲk mɛrɛɲka monu, k'inɲkɛcɛ tetek tolonɲɛ tonu tɔlɔma pacic ti ntɛ: «Ta kanu nɛ antɔcɛrɛ mɔ.» Awa tɛs tɔkɔ nɛɲkor-koru ta nɛncɛrɛ ti mɔ, tɛtɔkɔ yati t'inder kɛloku nu.

24 Kanu nɛ kɛlompɛs doru kɔ daka ndɛ dɔyɔ mɔ fɛp, nkɔn nwe ɔyɔnɛ Wɔbɛ wɛka kɛm kɔ antɔf ɔfɔtam kɔyi kɛlɔ kɛpɔɲ nɛ alompɛsɛ waca wa fum tɛta kɛkor-koru kɔn mɔ.

25 Waca wa fum wɔfɔtam kɛmar Kanu kɔyi, pɛmɔ ntɛ kɛɲfanɔr fum tɔlɔm mɔ. Nkɔn ompocɛ afum yeyinɛ yaɲan doru, kɛpɛnɛ kifir kɔ kɛtorɛ, kɛbɔp ka ca yɛlɔpɛs nyɛ fɛp.

26 Dɛfum wɛkin Kanu kɛwure tɔf ya afum alpɛs a doru aɲɛ fɛp, ntɛ tɔɲsɔɲɛ ɲandɛ antɔf fɛp kɔron mɔ. Kɔ Kanu kɛnanunɲɛnɛ kɛcic cɛlɛncɛr ca tɔf yayɔkɔ fɛp. Kɔ kɛlompɛs dɛrɛn kɔ kɛtɛn tɛrɛn o tɛrɛn disrɛ.

27 Kanu kɛnɔyɔ ti ntɛ tɔɲsɔɲɛ ɲatɛn kɔ han ɲanɛɲk kɔ kɛbɔma-bɔma disrɛ mɔ, bawo Kanu kɛmbɔlɛ fɛ nwe o nwe.

28 Ntɛ tɔ nɛnɛ moloku mamɛ: «Nkɔn ɔsɔɲɛ su kɔyi doru, nkɔn ɔɲsɔɲɛ su kɛcɛpɛ, nkɔn ɔsɔɲɛ su kɔyi

tante ayi mɔ.› Itɔ alenɛ anu alɔma ɲaloku:

«Kɛbɛnda ka dokom da Kanu kɔ sɛna sɔ sɛyi.»

²⁹ Kɔ pɛyɔnɛ a kɛbɛnda ka dokom dɔn kɔ sɛna sɔ sɛyi-ɛ, pɛmar fɛ a pacɛm-cɛmnɛ a Kanu kɛwureɛnɛ kɔ kɛma, kɔ gbɛti, kɔ pɛyɔnɛ fɛ ti-ɛ, tasar mɛpɛ fum encɛm-cɛmnɛ k'ɛmpatɛ dɛcɛrɛɲ dɔn mɔ.

³⁰ Kanu kɛnacɛpsɛr fɛ afum akɔ ɲanayi tɛm ntɛ anatɔcɛrɛ mes mɔ, mba kɛfanɲ oɲ afum a doru fɛp a ɲasɛkpɛr bɛkɛc.

³¹ Kɔ Kanu kɛmbɔnc dɔsɔk ndɛ kɛndekɔbocɛ afum a doru fɛp kiti kɛlɔmpu mɔ. Kanu kɛnayɛk-yɛk fum nwɛ endekɔboc kiti kanɲkɔ mɔ, kɛnasɔɲɛ afum fɛp kɛcɛrɛ wɛkayi ntɛ kɛnayɛkti kɔ afi daco mɔ.»

³² Ntɛ ɲane Pol pɛclɔku teta kɛyɛfɛ ka defi mɔ, kɔ alɔma ɲayɛfɛ kɛfani kɔ, mba alɔma ɲaloku: «Sɛndesɔcɛɲkɛl ɛm kɛlɔku ka tatɔkɔ dɔsɔk dɔlɔma.»

³³ Kɔ Pol owur ɲa daco, k'ɔɲkɔ.

³⁴ Kɔ afum alɔma ɲasumpɛr moloku mɔn kɔ tɔsɔɲɛ ɲa kɛyɔnɛ ka alaɲ a Yesu, pɛmɔ Denis wɛka kɛgba ka Areyopako, wɛran wɛlɔma pacwe kɔ Damaris, kɔ afum alɔma.

18

Pol nde dare da Kɔrɛnt

¹ Ntɛ tatɔkɔ tencepɛr mɔ, kɔ Pol ɛyɛfɛ dare da Aten k'ɔɲkɔ Kɔrɛnt.

² K'ɔɲkɔ pɛbɛp di wɛSuyif wɛlɔma pacwe kɔ Akila, nwɛ anakom dare da Pɔnt mɔ, pɛtɛp kɛcder atɔf ɲa Itali kɔ wɛran kɔn Pirsila, bawo wɛbɛ Kɛlod ɛnaloku a aSuyif fɛp ɲawur Rom. Kɔ Pol ɔɲkɔ pɛbɛp ɲa.

³ Ntɛ tenasureɛnɛ ɲapaɲnɛ yebɛc yin yayi mɔ, kɔ eyi ndaraɲan, ɲacɔbɛc, ɲaclompɛs cɛbal.

4 Simiti o simiti dɔsɔk da kɛɲesɛm Pol encgbekɛlɛnɛ kɛlɔ ka dɛkɛtolɛ da aSuyif pɛcsɛp dɛmolokɛ a aSuyif kɔ aKresi ɲawosɛ kɛcɛmɛ molokɛ mɛn darɛɲ.

5 Ntɛ Silas kɔ Timote ɲanator Masedon mɔ, kɔ Pol encɛmɛ oɲ gbɛcɛrɛm kɛcam tolokɛ tɔtɔt, pɛcsɔɲɛ aSuyif kɛlanɲ a Yesu ɔyɔnɛ nwe Kanu kɛyɛk-yɛk mɔ.

6 Mba ntɛ aSuyif ɲancgbekɛl kɔ ɲaclɔmsɛnɛ kɔ mɔ, k'oɲkɔɲ-kɔɲɛr kɛfɛl ka yamos yɔn tɛta kɛyɛnk kɛɲan sɛbomp nnɛ eyi mɔ, k'olokɛ: «Doru donu deyɛ nu dɛwaca! Kɔ ina, isɔk ti disrɛ. Nɛkɛl oɲ, nda atɔyɔnɛ aSuyif indɛkɔ.»

7 Kɔ Pol ɛyɛfɛ di, k'oɲkɔ nda Titi Yusutu wɛkor-koru Kanu wɛlɔma, nwe kɛlɔ kɔn kɛnasɛɲkɛrɛnɛ kɔ dɛkɛtolɛ Kanu da aSuyif mɔ.

8 Krispɔs, wɛbɛ ka kɛlɔ ka dɛkɛtolɛ wɛlɔma ɛnalanɲ tɛta Mariki kɔ aka kɛlɔ kɔn disrɛ fɛp. Kɔ aKɔrɛnt alarɛm aɲɛ ɲanccɛɲkɛl mɔ ɲanayɔnɛ alanɲ, k'anɲgbɛt ɲa dɛromun tɛta Kanu.

9 Pibi disrɛ kɔ Mariki olokɛ Pol kɛnɛɲk disrɛ: «Ta mɛnesɛ! Mɛlɔk-lɔkɛ, ta mɛcɛɲk de,

10 bawo ina iyi kɔ mɛna! Fum o fum ɔfɔsumpɛr ɛm kɛca kɛyɔ ɛm tes tɛlɛc, bawo iyɔ afum alarɛm dare dandɛ disrɛ.»

11 Kɔ Pol eyi ɲa dacɔ teren tin kɔ yof camɛt-tin pɛctɛkɛ ɲa tolokɛ ta Kanu.

12 Tɛm tatɔkɔ tɔ Rom dɛnadɛs Kaliyɔɲ kɛyɔnɛ ka wɛbɛ ndɛ atɔf ɲa Akaya. Kɔ aSuyif alɔma ɲantɛɲɛ kɛyɛfɛrɛnɛ kɔ Pol, kɔ ɲanɲkɛkɛrɛ kɔ dɛɲkiti.

13 Kɔ ɲalokɛ: «Fum wɛkawɛ, afum ɲ'ɛfanɲ a ɲakor-koru Kanu ɲacɛmɛ dɔpɔ dɔn darɛɲ, dɔpɔ ndɛ dɛnciyɛnɛ kɔ ndɛ sariyɛ sɛlɔkɛ mɔ.»

14 Pol ɛyɛfɛ kəkəloku, mba Kaliyɔŋ oloku aSuyif: «Pəcyɔnɛ a fum endif, kɔ pəyɔnɛ fɛ ti, tes tɛlɛc tɔpɔŋ tɔlɔma tɔyɔ-ɛ, k'incəŋkəl nu, nənna aSuyif!

15 Mba nte pəyɔnɛ a dəmoloiku, dəmewe, kɔ pəyɔnɛ fɛ ti, teta sariyɛ sonu nənna asərka sɔ nəyi kəgbəkəlɛnɛ mɔ, nənna ŋɔ tatəkɔ tɔmɔmən. Ina intola fɛ kəyɔnɛ wəboc kiti kan̄kɔ.»

16 Kɔ Kaliyɔŋ embeləs ŋa dəndo dən̄kiti.

17 Kɔ aSuyif ŋan̄kɔ ŋasumpər Sɔstɛn wəbɛ wəka dəkətola Kanu waca, kɔ ŋayɛfɛ kəsut kɔ dəndo dən̄kiti, mba Kaliyɔŋ ɛnawe fɛ ti ali daka.

Pol olukus Antiyək

18 Kɔ Pol owon dare da Kərənt mataka mɔlɔma, k'ender pələmbərɛ awɛnc aŋa alaŋ, k'ɛlɛk abil kəkɔ atɔf ŋa Siri, nkən, Pirsila kɔ Akila. K'ofonnɛ domp nde dare da Sɛŋkərə kəmentər ka kəlip ka tes nte ɛnadermɛ teta Kanu mɔ.

19 Nte ŋambɛrɛ dare da Efesi mɔ, kɔ Pol ɛsak Pirsila kɔ Akila. Kɔ Pol əŋkɔ kəlɔ ka dəkətola Kanu da aSuyif kɔ ŋan̄gbəkəlɛnɛ kɔ ŋa.

20 Kɔ akakɔ ŋantola kɔ kəyi ka dəndo dare dan̄jan kərəsna, mba ɛnawosɛ fɛ.

21 K'elembərɛ ŋa pəcloku: «Indelukus nnɔ ndoronu kɔ Kanu kəwosɛ-ɛ.» K'ɛlɛk abil dare da Efesi,

22 k'ontor dare da Sesari nde ɛnacop mərənt mən mɔ. K'empɛ kərəsna Yerusalɛm kəkəyif alaŋ. Nte elip mɔ, k'ontor dare da Antiyək ŋa Siri.

23 Nte tɛm tɔlɔma tencepər mɔ, kɔ Pol əŋkɔ k'encepər atɔf ŋa Kalat kɔ Firiki pəccəpəs acəpsɛ a Yesu bəkəc fəp.

Apolos nde sɔdare sa Efesi kɔ Kərənt

24 WəSuyif wəlɔma ancwe Apolos, ɛnader Efesi. Dare da Aleksandər* dɔ anakom kɔ, fum wɛcɛre kəlɔk-lɔku ɛnayi, pɛcɛre sɔ Yecicəs Yosoku belbel.

25 Dɔpɔ da Mariki dɔ anatəksɛ kɔ, kɔ kəsumpɛr ka mes belbel, kance k'onclɔkɛ, pɛctəksɛ teta Yesu, mba mɛnɛ kəgbət dərɔmun ka Saŋ gbɛcɛrɛm kɔ ɛnacɛre.

26 K'eyɛfɛ kəlɔk-lɔkɛ kɛlanɲ disrɛ nde dəkətɔla Kanu da aSuyif. Ntɛ Pirsila kɔ Akila ɲane kɔ kəlɔk-lɔku mɔ, kɔ ɲalɛk kɔ ndaranɲan, kɔ ɲambɛrɛnɛ kɔ kətəksɛ kɛcɛre kəŋkɔ kənabut kɔ teta dɔpɔ da Kanu mɔ.

27 Ntɛ Apɔlɔs ɛnacɛm-cɛmnɛ kɛcɛpɛr ka Akaya mɔ, kɔ awɛnc ɲɲa alanɲ ɲaŋgbɪɲɛr kɔ. Kɔ ɲancɛcɛ acɛpɛsɛ a Yesu darɛɲ ɲɲɛ ɲayi Akaya mɔ areka, ɲaclɔku ɲa kɛbanɲ kɔ belbel. Ntɛ embɛrɛ mɔ, k'entesɛ afum aka di, akɔ kɛmar ka Kanu kɛnasɔɲɛ kɛyɔnɛ alanɲ mɔ.

28 Bawo fənɔntɛr fɔ Apɔlɔs ɛncgbɛkɛlɛ aSuyif fɔr ya afum alarɛm kirɪɲ pɛsɔɲɛ ɲa kɛcɛrɛ dɛYecicəs Yosoku a Yesu ɔyɔnɛ wɛbɛ nwe Kanu kɛnayɛk-yɛk mɔ.

19

Pol nde dare da Efesi

1 Tɛm ntɛ Apolos ɛnayi Kɔrɛnt mɔ, Pol nwe ɛnacɛpɛr sɛdare sa mɔrɔ mɔ, ontɔr dare da Efesi. K'embɛp di acɛpɛsɛ a Mariki Yesu darɛɲ alɔma.

2 K'eyɪf ɲa: «Nɛnasɔtɔ Amera Nɛcɛmpɪ ɲa Kanu kɛyɛfɛ ntɛ nɛnayɔnɛ alanɲ Yesu mɔ ba?»

* **18:24** *Aleksandər* = dare dɔpɔɲ nde Misira nde afum alarɛm a doru fɛp ɲaŋkɔ kətəkəs mes.

Ko ḡalukse Pol: «Santane fe yati teta Amera Necempi.»

³ Ko Pol eyif ḡa so: «Ko kagbat daromun kare ko nasoto-e?»

Ko ḡalukse Pol: «Kagbat ka San.»

⁴ Ko Pol oloku: «Kagbat daromun ka San, kasakpar mera yati kanayi teta Kanu. Mba San oncloku afum a ḡalan wak endeder nkon tadaran ma, ito tato ko Yesu.»

⁵ Nte ḡane moloku mamako ma ko nasoto kagbat daromun tewe ta Mariki Yesu.

⁶ Ko Pol endenar ḡa waca, ko Amera Necempi ḡender ḡa, ko ḡayefe kacop cusu nce ḡantocare ma, ḡacdank so moloku motot mme Kanu kanasom ḡa kadank ma.

⁷ Arkun akako ḡancbap waco ko meran.

⁸ Ko Pol embere dakatola Kanu da aSuyif, paclok-loke di kabakne disre han yof maas, pacgbekalene, pacsep kasone afum kacare mes ma debe da Kanu.

⁹ Mba nte ayenki sabomp aloma ḡancfati kalan ma, ḡacfani dopo da Mariki nno kanay kayi ma. Ko Pol ombale ḡa, k'elkene acepse a Yesu daran aloma, ko ḡawenne kasak, ko ḡanjlok-lokarene dosak o dosak nde dakatakse da Tirano.

¹⁰ Tato ko tenawon meren meran, ko tosonje aSuyif ko aKresi anje ḡanayi atof ḡa Asi ma kane toloku ta Mariki.

Awut a Sefa

¹¹ Kanu kancsonje waca wa Pol kayo mes mewey-wey mme menacuca kanank ma.

¹² Tenasonje pacbacase acuy caloto, ko payone fe ti-e kapol nke kangbuene Pol ma, ko ayo ti-e, docu

doncwur wəkayi, kɔ yɔŋk yelɛc yocwur sɔ wəkayi dɛris.

¹³ Kɔ aSuyif alɔma ŋaŋkɔs-kɔs mofo melarɛm, kɔ ŋatubucnɛ Pol kɛbelɛs ka yɔŋk yelɛc nnɔ acuy ŋayi mɔ, ŋacloku: «Ilɔk'ɛm: Mɛwur wɛcuy wɛkawɛ tewe ta Yesu wɛkɔ Pol encam mɔ.»

¹⁴ Wɛlonɲɛ wɛpɔŋ wɛka aSuyif wɛlɔma ɛnayi pacwe kɔ Sefa. Awut ɔn atɛmp camɛt-mɛrɛŋ ŋa ŋancyɔ mɔyɔ mamɔkɔ.

¹⁵ Mba kɔ ŋawak kɛbelɛs ŋɔŋk ŋelɛc-ɛ, ŋi ŋoloku ŋa: «Yesu, incɛrɛ kɔ. K'iŋɲɛpɛl sɔ belbel fum nwe Pol ɔyɔnɛ mɔ, mba nɛna, an'ɔ nɔyɔnɛ-ɛ?»

¹⁶ Kɔ fum wɛkɔ ŋɔŋk ŋelɛc ŋɛnayi mɔ ɛŋgbɛpɛrɲɛ ŋa kɛyɛfɛrɛnɛ, k'ɛntam ŋa fɛp k'ombɔpɛr-bɔpɛr atɛmp aŋɛ, kɔ ŋayɛkse fɛp faŋan dis fos kɔ ŋasak kɛlɔ.

¹⁷ ASuyif kɔ aKresi aka dare da Efesi ŋancɛrɛ toloku tatɔkɔ, kɔ kɛnɛsɛ kɛyi ŋa fɛp, kɔ ŋalɛlɛs ɔŋ tewe ta Mariki Yesu.

¹⁸ Afum alarɛm aŋɛ ŋanawosɛ kɛlan Yesu mɔ, ŋancder ŋaccɛŋ fɛr ya afum fɛp kirinɲ pɛlɛc mɲɛ ŋancyɔ mɔ.

¹⁹ Kɔ afum akɔ ŋanayɔnɛ dure mɔ, ŋanckɛrɛ sɛbuk sɛŋan sa dure kɔ ŋancɔf si fɛr ya afum fɛp kirinɲ. Kɛway ka sɛbuk sasɔkɔ kɛnabɛp mɛncɛmbɛl ma gbɛti wul wɛcɔ kɛcamɛt (50.000).

²⁰ Ti disrɛ kɛtam ka Mariki disrɛ kɔ toloku ta Kanu tɛsamsɛr kɔ tɛsɔtɔ fɛnɔntɛr.

Pɔyamayama dare da Efesi

²¹ Ntɛ tɛncɛpɛr mɔ kɔ Pol olompɛsnɛ kɛkɔ dare da Yerusalem pɛccɛpɛrɛnɛ tɔf ya Masedon kɔ Akaya. K'oloku: «K'iŋkɔbɛrɛ Yerusalem-ɛ, mɛnɛ idɛkɔsɔmɔmɛn Rom.»

22 Kɔ Pol osom Masedon amar ən mɛrəŋ Timote kɔ Erasto, mba kɔ nkən Pol eyi mataka mɔlɔma atɔf ŋa Asi.

23 Tɛm tatɔkɔ tɔ pɔyamayama pɔpɔŋ pɛnayi Efesi teta dɔpɔ da kɔlanŋ ka Mariki Yesu.

24 Wəgbɛc wɔlɔma ɛnayi di, pacwe kɔ Demeteri, pæctubucnɛ kɔlompɔs ka wɔlɔ wa tɛrəŋka mpɛ an-cwe Artemi mɔ. Agbɛc a wɔlɔ wa gbɛti wawɔkɔ ŋancsɔtɔnɛ wi daka dɛlarəm.

25 Kɔ Demeteri oloŋka agbɛc kɔ akɔ ŋancdinɛ yebæc yayɔkɔ mɔ, k'oloku ŋa: «Arkun! Nəncərə ti belbel a yebæc yayɛ y'andinɛ.

26 Mba nənəŋk kɔ nəne a nnɔ Efesi kəbəp ka atɔf ŋa Asi Pol pampɛ ɛsɛp kəsəŋɛ afum alarəm kɔlanŋ hanŋ pæckafəli ŋa mera kɔloku a mɛrəŋka mmɛ waca wa fum wolompɔs mɔ, bafɔ canu cɔ.

27 Moloku mamɔkɔ məntam kəsəŋɛ yebæc yosu kələcɛ. Təsəŋɛ sɔ teta kɔlɔ ka tɛrəŋka Artemi tɔyɔ sɔ abɔc. Afɔde sɔ paclɔku a Artemi tɛrəŋka a kanu kɔ, kanu kəran nkɛ afum fəp ŋaŋkor-koru nnɔ atɔf ŋa Asi, kɔ doru kərkər mɔ.»

28 Ntɛ afum ŋane moloku mamɔkɔ mɔ, kɔ mɛtɛlɛ mɛncɛpərər ŋa, kɔ ŋayɛfɛ kəkule-kule: «Artemi kanu ka Efesi kəyɔnɛ kəpɔŋ!»

29 Kɔ pɔyamayama papɔkɔ posumpər dare fəp, kətəŋnɛ disrɛ kɔ afum ŋambəpsɛnɛ abanŋka ŋaŋan ŋɔpɔŋ. Kɔ ŋalinɔs asol a Pol Kayus kɔ Aristarko, aŋɛ ŋanayɛfɛ Masedon mɔ, kɔ ŋaŋkəkərə.

30 Pol ɛnafanŋ kəkəmentərɛnɛ afum fər kirinŋ, mba acɛpsɛ a Yesu darəŋ ŋanawosɛnɛ fɛ kɔ ti.

31 Abɛ alɔma a atɔf ŋa Asi, aŋɛ ŋanayɔnɛ anapa a Pol mɔ, ŋanasom afum nnɔ eyi mɔ ŋaclɛtsɛnɛ kɔ a ta

pəkə dəndo aban̄ka n̄an̄an n̄əp̄əŋ de!

³² Kə p̄əyamayama poncop afum dacə, aŋe ŋackul-kulene nte, akə ŋackul-kulene təkə. Afum alarəm ŋa dacə ŋanacəre fe nte o nte anabəpsenene mə.

³³ Kənay kan̄kə dacə kə afum aləma ŋaləmər Aleksandər, nwe aSuyif aləma ŋanacəŋəs kəkəlok-loku fər ya afum kirin̄ mə. Kə Aleksandər efek kəca, pəfan̄ kəlok-loku pəyacne.

³⁴ Mba nte ŋanadenepəl a Aleksandər wəSuyif əyənə mə, kə fəp fəyefe kəkule-kule han̄ dec mēerəŋ: «Artemi kanu ka Efesi kəyənə kəpəŋ!»

³⁵ Kə wəbe wələma wəka di entam kətorə-torə afum bəkəc pəcloku: «Arkun a Efesi, an'otəcərə a dare da Efesi dətəmpər kəbum ka kələ kəpəŋ ka kanu kosu Artemi kə terəŋka tən mpe pontor kəyefe darenc mə-ε?

³⁶ Fum əfətam kəgbekəl tatəkə, pəmar nəndə nəcan̄k ta nəbelkər kəyə nte o nte.

³⁷ Nte təsək mə, afum aŋe nəŋkerə mə ŋaləsər fe kələ kosu kəpəŋ, ŋaləməs fe sə kanu kosu Artemi.

³⁸ Kə Demeteri kə awenc aŋa apan̄ne ən yebac ŋayə kəbokene teta fum-ε, dəkəboc kiti deyi kə aboc kiti ŋayi, dəndo pəmar ŋakə ŋabokene!

³⁹ Kə nəyə sə tobokene tələma-ε, andekəlompəs ti pəmə təkə sariye səloku ti mə nde aboc kiti ŋaŋlon̄kanə mə.

⁴⁰ Nəkembərne, bawo antam kəbonce su kəsəŋe pəyamayama pəmpə kəyi, teta mes mamē men-cepər de məkə mə, bawo ali toloku səfətam kəsəto kəloku nte təsəŋe afum kəbəpsene tante mə.» Nte wəbe elip kəloku tatəkə mə, k'oloku nwe o nwe kəluku nde ndərən.

20

Pol nde tafya Macedon ko Kresi

¹ Nte poyamayama pesak mo, ko Pol ewe accepse a Yesu darəŋ, k'encəpəs ŋa bəkəc. Nte elip kələmbərne ŋa mo, k'əŋkə Masedon.

² Nte encepər atəf ŋaŋkə mo, k'encəpəs alan bəkəc dəmoloku mɛlarəm, k'ender atəf ŋa Kresi.

³ K'eyi di yof maas. Tem nte enadefan kəyeki abela kəkə ka atəf ŋa Siri mo, k'asəŋe ko kəcərə a aSuyif ŋantəŋne kəyo kən pələc, k'encəm-cəmne kəluksərne sə dərə da atəf ŋa Masedon.

⁴ Afum aŋe ŋanacəmbər ko mo, ŋanayəne: Sopateri wan ka Purus wəka Bere, Aristarko ko Sekondu aka Tesaloni, Kayus wəka Dərbɛ, Timote, Tikiko, ko Tirofimo aka atəf ŋa Asi.

⁵ Afum akakə ŋanayi su kirin kəkə, ko ŋaŋkə ŋakar su Torowas.

⁶ Ko sənə nte mataka ma kəsata ka cəcom cətəyo lebin mencepər mo, ko sələk abil dare da Filipi. Mata kəcəmət disre ko səmbəp ŋa dare da Torowas, nde sənacepərəne mata camət-mɛrəŋ mo.

Kəcepər kələpəs ka Paul dare da Torowas

⁷ Tataka təcəkə-cəkə ta tataka toluksər, ko səlonkanɛ kətɛpi ka kəcom. Pol nwe pənamar kəkə dəcəkəsək mo eyi kələk-lokər ŋa, k'əmbəlsɛ moloku haŋ cək-cək.

⁸ Səlamp səlarəm sənayi dəndo dukulə da darenc dadəkə sənalonkanɛ mo.

⁹ Wətɛmp wəloma pacwe ko Eyutik enandɛ biŋkəli ba wunder kəronj tem tatako Pol onclok-loku mo. Ko mere mɛŋgbəpərne ko, k'entɛmpɛne

kɔyɛfɛ dukulɔ dakɔron da maas. Anɔkɔlɛk kɔ, tɛtɛnɛ efi.

¹⁰ Kɔ Pol ontɔr, k'ɔŋkɔ pɛsipnɛ kɔ, k'ɛlɛk kɔ dɛwaca, k'oloku: «Ta pɛyi nu yamayama. Eyi wɛyɛŋ!»

¹¹ Ntɛ Pol ɛmpɛ sɔ mɔ, k'entɛpi kɛcom kɛsɔm, k'oncop sɔ moloku mɔn haŋ dɔsɔka. Ntɛ elip mɔ, k'ɔŋkɔ.

¹² K'anɔkɛrɛ wɛtɛmp wɛkakɔ pɛyi wɛyɛŋ, kɔ tɔyɔnɛ tɛcɔpsɛ bɛkɛc tɔpɔŋ.

Marɔnt kɔyɛfɛ Torowas haŋ Mileto

¹³ Sɛna, sɛnanuŋkɛnɛ kɛlɛk abil kɛkɔ dare da Asɔs nde Pol ɛnaloku a sɛndɛkɔlɛk kɔ mɔ, bawo kɔroru k'ɛnafan kɛkɔ.

¹⁴ Ntɛ ɛnabɔp su Asɔs mɔ, kɔ sɛlɛk kɔ kɛkɔ ka Mitilɛn.

¹⁵ Ntɛ sɛyɛfɛ kɛcali dɛkɛba dɛndo mɔ, kɔ sɛmbɛrɛ dɔckɔsɔk Kiyɔ. Dɔckɔsɔk damɛrɛŋ kɔ sɛŋgbuŋɛnɛ Samɔs, tataka ta maas kɔ sɛmbɔp Mileto.

¹⁶ Pol ɛnafan kɛcɛpɔr dare da Efesi takɔron ta ɛncɛmbɔrɛs di-ɛ, ntɛ tɔŋsɔŋɛ ta owon sɔ Asi mɔ. Yerusalem ɛncbɛlkɔr kɛbɔp, kɔ tentam kɛyi-ɛ, a dɔsɔk da kɛsata ka tataka ta wɛco kɛcamɔt dɛcbɔp.

¹⁷ Tɛm ntɛ ɛnayi Mileto mɔ, k'osom dare da Efesi kɛkɔwɛnɛ kɔ abeki a kɛlonkanɛ ka alaŋ aka di.

¹⁸ Ntɛ ŋander kɛwɛ kɔn mɔ, kɔ Pol oloku ŋa ntɛ: «Nɛncɛrɛ fɔp fonu tɛkɔ isumpɔr nu mɔ, kɛlɛk dɔsɔk dɔcɔkɔ-cɔkɔ ndɛ incɛmbɔr kɛcɛk atɔf ŋa Asi mɔ.

¹⁹ Imbɔcɛ Mariki kɛtɔrɛ banca disrɛ, icbɔk, ictɔrɔ, bawo aSuyif ŋancfan kɛy'em pɛlɛc.

²⁰ Tes o tes tentam kɛtɛsɛ nu iloku nu ti fɔr ya afum kirin kɛkɔ haŋ dɛwɔlɔ wonu disrɛ, ali tin imɛŋkɔr fɛ nu.

21 K'ingbiɲər sɔ aSuyif kɔ aKresi kəsəkpər bəkəc ɲakafələ nnɔ Kanu kəyi mə, ɲagbəkər kəlan ɲariki mosu Yesu.

22 Ndekəl oɲ Amera ɲa Kanu ɲesekət im, Yerusalem iɲkɔ. Incərə fe nte tɔɲkəbər im di mə,

23 mənɛ Amera ɲecempi ɲa Kanu ɲoɲlok'im dare o dare nte: A kətərə k'inder, paber im dəbili.

24 Teta ina, mes ma ina darəɲ meyi, tɛfan ta ina tɔyɔne kəkətɛne kəsom nke asom im mə, mes mme Mariki Yesu olok'im kəyɔ mə fəp m'ifan kəyɔ, nte tɔyɔne kəmentər sede sa Kibaru Kətət kɔ kəmar ka Kanu mə.

25 Ndekəl oɲ intas, incərə a nəfɔsɔnəɲk im, nəna fəp aɲe inacepər kəcəm dəbe da Kanu mə.

26 Ilip kəloku nu moloku fəp mme Kanu kənasom im kəloku nu teta kəyac konu mə. Kɔ nəntɔyɔ oɲ təkɔ inatəkəse nu mə, te mi teyi fe sɔ ti,

27 bawo iloku nu mɛfan ma Kanu fəp, ali tin imɛɲkər fe nu.

28 Nəkembərne nənasərka kəbər ka alan aɲe ɲayi pəmɔ yɔcɔl nyɛ Amera ɲecempi ɲa Kanu ɲəsɔɲ nu kəkək mə. Nəkembərne kəlɔɲkanɛ ka alan a Kanu, mecir mən yati məsɔtɔne ɲa.

29 Incərə a k'indekət-ɛ, afum alɛc ɲandetərəs kəlɔɲkanɛ konu pəmɔ calma cəwey-wey nce cəntəsak yɔcɔl mə.

30 K'incərə a aləma nəna dacɔ yati ɲandeyefe kəloku yem, nte tɔɲsɔɲe acɛpsɛ alan ɲacəme ɲa darəɲ mə.

31 Nəde nəkembərne, ta nəpələr a meren mme maas pibi kɔ dan isak fe kəloku nu dəmencər a nəkembərne!

³² Ndekæl oŋ isəŋ nu Kanu kə toloku ta kəŋaŋne kən. Toloku tatəkə tentam kəcəpəs nu bəkəc kə kəsəŋ nu ke, nəna aŋe ŋayəne afum ən mə.

³³ Inafaŋ fe pəsam, inafaŋ fe kema, inafaŋ fe yamos ya fum.

³⁴ Nəna yati nəncəre a waca wem wawe w'imbəce kətən ka yeri yem kə ya afum aŋe insole mə.

³⁵ Imentər nu a kə məŋbəc tatəkə-ε, mēne nəmar atəyə fənəntər. Məcəm-cēmne moloku ma Mariki Yesu, nkən nwe ənaloku: «Kəpocə kəncepər kəsətə.»

»
³⁶ Nte Pol elip kəloku moloku maməkə mə, k'encəp suwu kətola Kanu kə ŋa fəp faŋan.

³⁷ Afum fəp kəbok disre ŋanepsərne Pol dəkilim ŋaccup kə,

³⁸ nənfər denanaŋkane kəyi ŋa nte Pol ənaloku a ŋafəsənəŋk kə mə. Nte telip mə, kə ŋancəmbər kə nde dəkətənta.

21

Pol əŋkə Yerusalem

¹ Nte səmbaŋərne ŋa mə, kə səyekti abela kəkə ka Kəs. Dəckəsək kə səncepər sə haŋ Rodu, kə səyefe dəndo kə səŋkə dare da Patara.

² Nte səmbəp di abil ŋe ŋenccali kəba kəkə ka ntende atəf ŋa Fenisi mə, kə səmbəke ŋi, kə səncali.

³ Sənadetəfərne Sipər, kə səsak si kəca kəmeriya, kə səŋkə kəca ka atəf ŋa Siri, kə səŋkə səpe dare da Tir nde pənamar abil ŋotore ca yəkə ŋenayə disre mə.

⁴ Nte sənabəp di acəpse a Yesu mə, kə səyi di mata camət-merəŋ. Kəcəŋəs ka Aməra ŋa Kanu disre kə ŋaŋgbinər Pol a ta pəpe Yerusalem.

⁵ Nte kiyi kosu dɛndo kɛnalip mɔ, kɔ sɛŋkɔ. Kɔ alan fɛp ɲancɛmbɛr su, kɛyɛfɛ aran kɛbɛp awut han kɔ sɛwur dare disrɛ, kɔ sɛŋkɔ sɛcɛp suwu dɛndo dɛgbɛp kɛtola Kanu.

⁶ Nte sɛnalembɛrne ɲa mɔ, kɔ sɛmbɛkɛ debil, kɔ ɲa ɲalukus ndaranɲan.

⁷ Kɔ sɛna, kɛlɛpɛs kosu kɛkɔt kɔ sɛmbɛkɛ dare da Tir kɛkɔ ka dare da Pɛtolemay. Nde sɛnakɔ sɛyif awɛnc asu aɲa alan mɔ, kɔ sɛncɛpɛrɛnɛ di dɔsɔk din.

⁸ Dɔckɔsɔk dɔ sɛnayɛfɛ di kɛkɔ dare da Sesari. Dɛndo sɛnabɛrɛ kɛlɔ ka Filip, wɛcam ka toloku tɔtɔt, nwe ɛnayɔnɛ wɛkin ka afum camɛt-mɛrɛɲ aɲɛ anayɛk-yɛk Yerusalem mɔ. Kɔ sɛncɛpɛrne dɛndo mata camɛt-mɛrɛɲ.

⁹ Filip ɛnayɔ awut aran maɲkɛlɛ aɲɛ ɲanatɔcɛrɛ arkun mɔ, aɲɛ ɲancdɛɲk moloku mme Kanu kɛncmar ɲa kɛcam mɔ.

¹⁰ Nte sɛnayi di mataka mɛlarɛm mɔ, kɔ sayibɛ sɛlɔma sɛntɔr dare da Sesari kɛyɛfɛ ka atɔf ɲa Yude, pacwe kɔ Akabus.

¹¹ Nte encder nnɔ sɛyi mɔ, k'ɛlɛk bɛlɛt ba Pol, k'ɔɲkotnɛ wɛcɛk kɔ waca. K'oloku: «Nɛcɛɲkɛl nte Amera ɲɛcɛmpi ɲa Kanu ɲoloku mɔ: Fum nwe ɔyɔ bɛlɛt bambɛ mɔ, tante tɔ abɛ aSuyif alɔma ɲandekot kɔ Yerusalem, ɲabɛr kɔ atɔyɔnɛ aSuyif dɛwaca.»

¹² Nte sɛne toloku tɔtɔkɔ kɔ afum akɔ ɲanayi su kɛsɛk mɔ, kɔ sɛlɛtsɛnɛ Pol ta pɛpɛ Yerusalem.

¹³ Mba kɔ Pol olukɛ su: «Ta ake tɔ nɛmbokɛ, nɛsɔɲ'em abɛkɛc kɛlɛcɛ-ɛ? Iwosɛ kɛkɔt kem, iwosɛ sɔ kɛfi kem Yerusalem teta tewɛ ta Mariki Yesu.»

¹⁴ Nte anasɛp kɔ antɔtam Pol dɛmoloku mɔ, kɔ sɛnce kɔ. Kɔ sɛntola: «Kanu kɛsɔɲɛ tɛfanɲ ta Mariki

teyi!»

¹⁵ Nte sancepɛrɛnɛ mataka mamɔkɔ dare da Sesari mɔ kɔ sɔlompɛsnɛ, kɔ sɔlek dɔpɔ kɛpɛ ka Yerusalem.

¹⁶ Kɔ sɔsol kɔ acɛpsɛ a Yesu alɔma aɲɛ sɔnader kɔyɛfɛ ka dare da Sesari mɔ. Kɔ ɲaɲkekɛrɛ su nda fum wɔlɔma nwe pɛnamar sɔyi ndɔrɔn mɔ, pacwe kɔ Manasɔɲ. WɔSipɛr ɛnayi, ɛnayɔnɛ wɔcɛpsɛ wɔka Yesu darɔɲ kɔyɛfɛ nte pɛnawon mɔ.

Pol ndena Sak

¹⁷ Kɛberɛ kosu Yerusalem, kɔ awɛnc asu aɲa alan ɲaselɛnɛ su pɛbotu disrɛ.

¹⁸ Dɔckɔsɔk kɔ sɔsol kɔ Pol, kɔ sɔɲkɔ ndena Sak. Kɔ abeki a kɔlɔɲkanɛ ka alan a Yerusalem fɛp ɲambɛpsɛnɛ dɛndo.

¹⁹ Kɔ Pol ɛfaynɛ ɲa, k'ɛyɛfɛ kɔlɔmɛr ɲa tin tin tin mes fɛp mmɛ Kanu kɛnamar kɔ kɔyɔ aSuyif daco mɔ.

²⁰ Nte ɲalip kɛcɛɲkɛl Pol mɔ, kɔ ɲayek-yekɔs Kanu. Kɔ ɲaloku Pol: «Mɛmɔmɔn wɛnc kosu, afum asu wul wɛlarɛm ɲayɔnɛ alan a Yesu kɔ ɲasumpɛrɛnɛ sɔ Sariyɛ waca mɛrɔɲ.

²¹ Awa aSuyif alɔma ɲacɛm-cɛmmɛ kɛnɛ a kɛtɔkɛ kam disrɛ a mɔlɔku aSuyif aɲɛ ɲayi afum acuru daco mɔ a ɲasak sariyɛ sa Musa: Ta ɲakɛnc awut, ta ɲacɛmɛ mɔyɔ mokur ma aSuyif darɔɲ.

²² Cɔkɛ c'andeyɔ-ɛ? Bawo ɲaɲkɔnɛ a mɛnder nnɔ.

²³ Awa mɔyɔ tɔkɔ sɛndelok'ɔm mɔ. Sɔyɔ nnɔ arkun maɲkɛlɛ aɲɛ ɲanasɔɲ Kanu temer mɔ.

²⁴ Mɔlɛk ɲa, nɛkɔ kɔlɔ kɔpɔɲ ka Kanu, mɔsɔkɛsnɛ kɔ ɲa. Kɔ mɔwosɛ-ɛ, mɔlɛk kɔwure pɛsam pa kɔway kɔɲan ka kɔlɔɲnɛ, nte tɔɲsɔɲɛ ɲafonne sɔbomp mɔ. Ti disrɛ fɛp fɛndetam kɛcɛrɛ a mes mɔkɔ asɔɲɛ ɲa

kəcərə tetam mə fəp məyənə fə kance, a mənə sə yati mələləs teta sariyə sa Musa.

25 Nte təyənə ta atəyənə aSuyif anə ηayənə alan mə, sənəηk a pəntese kəcice ηa reka kəboce ηa tənc: A ta ηasəm sem nyə alonənə mərəηka mə, ta ηamun mecir, ta ηasəm sem nyə antəfay mera mə, ta ηasumpər dalakə.»

26 Dəckəsək kə Pol elək afum anə, kə ηancop kəsəkəsne, k'embere kələ kəpəη ka Kanu disre, k'əηkə pəbonc dəsək nde kəsəkəsne kəηan kəndelip mə, kə dəsək nde andelonənə nwe o nwe mə.

Kəsumpər ka Pol nde kələ kəpəη ka Kanu disre

27 Dəkələpəsər da mataka maməkə camət-mərəη, nte aSuyif aləma anə ηayefe atəf ηa Asi ηanəηk Pol kələ kəpəη ka Kanu disre mə, kə ηampene bəkəc ya afum fəp, kə ηasumpər kə.

28 Nəckule-kule: «Arkun a Yisrayel, nəder nəmar su! Wəkawe entəksə afum fəp kəfo o kəfo təkə təntətesə afum asu, sariyə sosu, kə nnə kəfo kəηkə mə! Ali aKresi embersene ηa nnə kələ kəpəη ka Kanu, k'eyik-yikəs kəfo kəsoku kəηkə!»

29 Nənobokene nte bawo təkəkə-cəkə ηananəηk Pol kə Tirofimo wəka Efesi ηasol dare disre, kə ηancem-cemne a Pol ənabersene kə kələ kəpəη ka Kanu disre.

30 Kə dare məlməl deyι yamayama, kə afum ηayefe waca fəp kə ηasumpər Pol, kə ηalιηəs kə kəwurene abəηka ηa kələ kəpəη ka Kanu disre, k'ancəηəs cumba katina.

31 Nte ηanayι kəsəp kədif kə mə, k'əηkə paloku wəbe wəsədar wəRom a pəyamayama peyι Yerusalem fəp.

³² Gbɛncana babɔkɔ kɔ wɛbɛ wɛsɔdar wɛpɔŋ nwe ɛlɛk asɔdar kɔ abɛ aŋan alɔma kɔ ŋayekse kɔkɔ di. Nte aSuyif ŋanɛŋk asɔdar aŋɛ kɔ abɛ aŋan mɔ, kɔ ŋasak kɛsut Pol.

³³ Kɔ wɛbɛ wɛpɔŋ wɛsɔdar nwe ɔncɔŋɛ, k'osumpɛr Pol, k'osom a pakote kɔ gbekce mɛrɔŋ. K'eyif fum nwe ɔyɔnɛ mɔ, kɔ tɔkɔ ɔyɔ mɔ.

³⁴ Kɛnay kanɔkɔ dacɔ, alɔma ŋackule nte, akɔ ŋackule tɔkɔ. Nte ɛnader pɛyi ɔŋ ta ɛŋne tɔlɔm ɔ tɔlɔm teta pɛyamayama papɔkɔ mɔ, kɔ wɛbɛ oloku a pakekɛrɛ Pol dɛkɛdirɛ da asɔdar.

³⁵ Nte Pol ɛmbɛp dɛkusunɔka mɔ, kɔ asɔdar ŋasipne kɔ, bawo ŋananesɛnɛ kɔ pɛlec pɔkɔ afum ŋanafan kɛyɔ kɔ mɔ.

³⁶ Kɛnay ka afum kɛnacɛmɛ Pol darɔŋ, ŋackule: «Pamɛlɛk kɔ!»

Pol kɛyacnɛ kɛn dɛmoloku

³⁷ Tɛm nte anadɛkɔfan kɔ kɛbɛrsɛnɛ dɛkɛdirɛ da asɔdar mɔ, kɔ Pol eyif wɛbɛ wɛsɔdar cɛKresi: «Aŋwos'em kɛlok'ɛm tes tɔlɔma ba?» Kɔ wɛbɛ eyif kɔ: «Mɛncɛrɛ kɛcɔp cɛKresi ba?»

³⁸ Bafɔ wɛMisira mɛyɔnɛ, wɛkɔ ɛntɛp kɛcsɔŋɛ pɛyamayama kɛyi mɔ, mɛkɛrɛ adifɛt afum wul manɔkɛlɛ (4000) nde dɛtegbɛrɛ ba?»

³⁹ Kɔ Pol oloku: «Awoŋ! Ina, wɛSuyif iyɔnɛ, dare da Tarɛs atɔf ŋa Silisi aŋkom im, fum wɛka dare dɔpɔŋ de! Intol'am, mɛwosɛ ilok-lokɛr afum.»

⁴⁰ Kɔ wɛbɛ wɛsɔdar owosɛ kɔ ti. Kɔ Pol ɛmpɛ k'ɛncɛmɛ dɛkusunɔka, k'ɛfɛk afum kɛca. Kɔ afum fɛp ŋanacanɔk, k'ɔncɔpɛr ŋa cɛEbre, kusu ka aSuyif aka di.

22

¹ «Awenc im aña, Abek'em aña!» Pol oncloku, «Næcæŋkæl oŋ moloku mme iyɔ meɣacneɛe mɔ.»

² Nte ñane pæccɔpær ña kusu kəŋan cəEbre mɔ, kɔ pənaŋkane kəyɔ yeŋ.

K'oloku:

³ «WəSuyif iyɔne, pakom im dare da Tarəs, atɔf ña Silisi. Mba nnɔ dare dandɛ d'andusum im nnəna Kamaliyel nwe afum fəp ñancəre mɔ. Nwe entæks'em belbel sariye sa atem asu mɔ, k'inasumpær sɔ teta Kanu belbel kɔ abækæc fəp, pəmɔ tantɛ pəyi nəna sɔ məkɔ mɔ.

⁴ K'inatərəs afum alɔma aŋe ñanacəme dɔpɔ da Yesu dandɛ darəŋ mɔ haŋ kɔ ñafi. K'ĩŋkot aran kɔ arkun, k'imber ña dəbili.

⁵ Wəlonɛ wəpəŋ kɔ abeki a dɔtɔf fəp ñayɔne atəŋne aka ti. Inasətər ña reka kəkene afum em aka Damas, nde inckɔ kəkəsumpær alaŋ akɔ ñanayi di mɔ, ikere ña fər ya abe kirinɛ nde Yerusalem pakəsut.

Pol ələm tɛcəme tən dɔpɔ dətɔt

⁶ Dɔpɔ inayi iclɔtərne Damas, daŋ peŋ, gbəncana babəkɔ, kɔ pəmot pəpəŋ pɛyɛfɛ darenc kɔ pɛŋkel im pəwaŋkəra.

⁷ K'intempene dantɔf, k'ine dim nde donclok'im: «Sol, Sol, ta ake tɔ məntərs'em-ɛ?»

⁸ K'iyif: «Mariki, mənə an'ɔfɔ-ɛ?»

K'olok'im: «Ina, Yesu wəka Nasaret iyɔne, nwe mənə məyi kətərəs mɔ.»

⁹ Afum aŋe sənəsol mɔ ñananəŋk pəwaŋkəra papəkɔ belbel, mba ñanane fɛ dim da nwe onclok-lokər im mɔ.

¹⁰ K'iyif kɔ: «Cəke cɔ pəmar iyɔ-ɛ, Mariki?»

Kɔ Mariki olok'im: «Mɔyɛfɛ, mɛkɔ dare da Damas, dɛndo aɲkɔlok'ɛm tɔkɔ pɛmar ɛm kɔyɔ mɔ fɛp.

¹¹ Mba nte pɔwanɲkɛra pa pɛmot papɔkɔ pɛnasɔɲ'em kɛtɔnɔɲk mɔ, afum akɔ sɛnasol mɔ ɲasumpɛr im kɛca kɔ ɲaɲkekɛr'em han kɔ imbɛrɛ Damas.

¹² Mba fum wɛlɔma ɛnayi di pacwe kɔ Ananiyas, pɛcɛmɛ tɛfan ta Kanu darɔɲ pɛmɔ tɔkɔ sariyɛ sɛloku ti mɔ. Nwɛ aSuyif aɲɛ ɲanandɛ di ɲanacɛrɛ dɔtɔt amera mɔ.

¹³ Kɔ Ananiyas ender nnɔ iyi mɔ, k'ɛncɛm'em kɛsɛk, k'olok'im: «Sol, wɛnc im, mɛluksɛrnɛ sɔ kɛnɔɲk.» Gbɛncana babɔkɔ k'inɔɲk nkɔn Ananiyas.

¹⁴ Kɔ Ananiyas olok'im: «Kanu ka atem asu kɛsɔɲ ɛm kɛcɛrɛ ka tɛfan tɔn, mɛnɔɲk Wɛlompu, mɛne sɔ dim dɔn,

¹⁵ bawo mɛndekɔyɔnɛ kɔ sede fɔr ya afum fɛp kirin ta nte mɛnɔɲk kɔ nte mɛne sɔ mɔ.

¹⁶ Ndekɛl ɔɲ ta ake tɔ mɔyi kɛwonɛ-ɛ? Mɔyɛfɛ mɔyɔ pagbɛt ɛm dɛromum teta Kanu, payak kiciya kam kɛwe ka Mariki disrɛ.»

Kɛsom ka Pol decikɛra

¹⁷ Nte ilukus Yerusalem mɔ, ictola nde kɛlɔ kɛpɔɲ ka Kanu, kɔ kɛnɔɲk kɛnder im kɔyɛfɛ darenc.

¹⁸ Ti disrɛ, k'inɔɲk Mariki Yesu, nwɛ ɛnalok'im: «Mɛkufɛ mɛwɔr Yerusalem, bawo ɲafɔdewosɛ kɛne sede sɛkɔ mɛsumpɛr tetem mɔ.»

¹⁹ K'iloku kɔ: «Mariki, ɲancɛrɛ a inckɔ dɛkɛtola Kanu da aSuyif, icsut, icbɛr afum dɛbili aɲɛ ɲanalan tetam mɔ.

20 Nte analon mecir ma sede sam Etiyen mɔ, ina wɛkawɛ yati inayi di, kɔ mes manjan mɔmbɔt im. In'enamɛnɛ akakɔ njanadif kɔ mɔ yati yamos.»

21 Mba kɔ Mariki olok'im: «Mɛkɔ! Pɛbɔlɛ pɔ ina indesom ɛm, nde atɔyɔnɛ aSuyif njan mɔ.»»

Pol kɔ wɛbɛ wɛsɔdar wɛRom

22 Afum njanacɛnkɛl kɔ han tɛm nte ɛnaloku toloku tatɔkɔ mɔ, mba ndɛkɛl on kɔ njanpɛnɛ sim njancloku: «Pamɛlɛk kɔ! Ta pasak fum pɛmɔ wɛkawɛ pɛyi dɔru.»

23 Kɔ njanɛkule-kule, kɔ njanɛbal suma sɛnan kɔ njanlɛm kɛbof darenc.

24 Kɔ wɛbɛ wɛsɔdar wɛRom osom asɔdar ɔn a pabɛrsɛnɛ kɔ dɛkɛdirɛ danjan. K'oloku a pasut Pol nte tɔnsɔnɛ pɛloku-loku, pɛcɛrɛ te tɔkɔ ɔyɔ nte tɔsɔnɛ afum kɛkule-kule tetɔn mɔ.

25 Nte anakot Pol kɛkɔsut kɔ mɔ, kɔ Pol eyif wɛbɛ wɛsɔdar wɛkɔ ɛnayi di mɔ: «Awos'am kɛsut wɛkom wɛRom nwe antɔkiti mɔ ba?»

26 Nte wɛbɛ wɛsɔdar nwe ene toloku tatɔkɔ mɔ, k'ɛnkɔ pɛyif wɛbɛ wɛsɔdar wɛpɔn, pɛcloku: «Cɛke mɛndeyɔ-ɛ? Wɛkom wɛRom ɔfɔ.»

27 Kɔ wɛbɛ wɛpɔn wɛsɔdar wɛRom ender k'eyif kɔ: «Mɛlok'im kance, wɛkom wɛRom mɛyɔnɛ ba?»

Kɔ Pol owosɛ: «Ey.»

28 Kɔ wɛbɛ wɛpɔn wɛsɔdar wɛRom nwe oloku sɔ: «Ina, pɛsam pɛlarɛm p'isɔtɔnɛ kɛyɔnɛ ka wɛRom!»

Kɔ Pol oloku: «Ina, anɛkom em ti kɛkomɛ dɛm.»

29 Gbɛncana babɔkɔ, akɔ pɛnamar njanɛnɛ Pol kɛlok-loku mɔ njanbɔlɛ, kɔ wɛbɛ wɛsɔdar enesɛ, k'ɛncɛrɛ a wɛkom wɛRom yati nkɔn wɛbɛ wɛsɔdar ɔsɔnɛ k'anɛkot.

Pol nde fɔr ya aboc kiti kirin

³⁰ Dɔckɔsɔk wɛbe wɛka asɔdar nwɛ pɛfan kɛcɛre tes tɔkɔ aSuyif akakɔ ɲambonɛ Pol mɔ, k'oloku a pasikɛli kɔ, k'oloku sɔ alonɲɛ apɔɲ kɔ aboc kiti aSuyif fɔp kɛlonkanɛ. Kɔ wɛbe ɛɲkɛre Pol k'encɛmbɛr kɔ fɔr yanɲan kirin.

23*Pol kɛyacnɛ kɛn nde fɔr ya aboc kiti kirin*

¹ Pol pɛgbɛtnɛ aboc kiti aSuyif aɲɛ, k'oloku: «Kɔ ina, awɛnc im aɲa, amera ɲosoku pɛs ɲ'inɲkɔtɛnɛ fɔr ya Kanu kirin haɲ mɔkɔ.»

² Ananiyas wɛlonɲɛ wɛpɔɲ oloku akɔ ɲanayi Pol kɛsɛk mɔ a ɲafer kɔ kɛca dɛkanca.

³ Kɔ Pol oloku kɔ: «Kanu kɛndesut ɛm, mɛyɔnɛ pɛmɔ damba dete ndɛ ancɛm alom ɲɛfer mɔ! Mɛndɛ nnɔ mɛckit im pɛmɔ tɔkɔ sariyɛ sɛloku mɔ, mba mɛcloku a pasut im, tɔkɔ sariyɛ sɛmɔnɛ mɔ!»

⁴ Afum akɔ ɲanayi di mɔ, ɲaloku: «Wɛlonɲɛ wɛpɔɲ ka Kanu mɛyi sɔ kɛlɔmɛs ba?»

⁵ Kɔ Pol olukɛ ɲa: «Awɛnc im aɲa, incɛrɛ fɛ a nkɛn ɔyɔnɛ wɛlonɲɛ wɛpɔɲ. Itɔ ancic dɛYecicɛs Yosoku disrɛ disrɛ: «Pɛmar fɛ mɛlɔmɛs wɛkirin wɛka afum am.»»

⁶ Ntɛ tɛnayɔnɛ a alonɲkanɛ ɲanayi kɛsɛk kin aSadisi kɔ kɛɲkɔ aFarisi mɔ. Kɔ Pol ɛyɛfɛ k'ɛmpɛnɛ dim dɛndɔ aboc kiti aSuyif ɲancyifɛt kɔ mɔ: «Awɛnc im aɲa! Ina sɔ, wɛFarisi iyɔnɛ, wan ka aFarisi! K'ancɛmbɛr im kɛkiti-ɛ, kɛlanɲ kem a afi ɲandeyɛfɛ defi kɛsɔɲɛ ti!»

7 Nte Pol oloku moloku mamakɔ mɔ, kɔ kɔgbekɛlɛnɛ kɔyi aFarisi kɔ aSadisi dacɔ, kɔ kɔgbeyɛnɛ kɔyi.

8 Kɔ aSadisi ɲaloku a kɔyɛfɛ defɛ kɔyi fɛ, mɛlɛkɛ meyi fɛ, yɔŋk kɔ arkifin yeyi fɛ. AFarisi kɛca kɔŋan, ɲanalɔŋ a mamakɔ fɛp meyi doru.

9 Kɔ sim sɛmpɛ haŋ, kɔ atɛkɛ sariyɛ kɛca ka aFarisi ɲayɛfɛ kɔ ɲambupɛrɛ pɛpɔŋ, ɲacloku: «Sɛnɔŋk fɛ nte o nte tɛlɛc nnɔ fum wɛkawɛ eyi mɔ! Ancɛrɛ fɛ: Tɔlɔma ɲɔŋk, kɔ pɛyɔnɛ fɛ ti-ɛ, mɛlɛkɛ molok-lokɛr kɔ.»

10 Nte kɔgbekɛlɛnɛ kɛnccɔŋnɛ oŋ kɛcɔŋnɛ dɛm kirin mɔ, kɔ wɛbɛ wɛsɔdar wɛpɔŋ enesɛ a ta ɲawatɛri-watɛri Pol, k'oloku asɔdar a ɲator ɲakɔ ɲalɛk Pol ɲalukɛ kɔ nde asɔdar ɲandirɛ mɔ.

11 Dɔckɔsɔk pibi kɔ Mariki ender Pol kɛnɔŋk disrɛ, k'oloku: «Mɛbɛknɛ! Tɔkɔ mɛnɔyɔn'em sede fɔr ya aboc kiti nde Yerusalem mɔ, mɛnɛ mɛkɔ sɔ mɔyɔn'em si Rom.»

Kɛsek kɛdif ka Pol

12 Nte dec dɔsɔk mɔ, k'aSuyif alɔma ɲasek kɛdif Pol, kɔ ɲantɔŋnɛ kɛsɔŋnɛ temer kɛtɔdi yeri, kɛtɔmun haŋ ɲaclip ti.

13 Afum aŋɛ ɲanasek kɛdif Pol kaŋkɔ mɔ, ɲanckɔ haŋ ɲacepɛr afum wɛcɔ maŋkɛlɛ.

14 Kɔ ɲaŋkɔ ɲabɛp alɔŋnɛ apɔŋ kɔ abeki a dɔtɔf kɛkɔloku ɲa: «Sɛsɔŋnɛ temer kɛtɔdi peri ta sɛntalip kɛdif Pol-ɛ.

15 Nɛna oŋ ndɛkɛl kɛbɛp ka aboc kiti aSuyif, nɛkɔ nɛtɔla wɛbɛ wɛsɔdar pɛkɛrɛ nu Pol pɛmɔ nte nɔŋfaŋ kɛmɔmɔn tetɔn belbel mɔ. Sɛna sɛncɛmɛ sɛckar kɛdif kɛn ta ɛntabɛp nu-ɛ.»

16 Nte wan ka wəkirɛ ka Pol ene pacloku toloku ta kəcəpɛ kə towul pɛdifɛ pən mə, k'ɔŋkə nde asɔdar ŋandirɛ mə, k'embɛrɛ k'oloku ti Pol.

17 Kə Pol ewe wəsɔdar wəpəŋ wəlɔma k'oloku kə: «Məsolɛ wətɛmp nwe məkenɛ kə wəbɛ wəsɔdar wəRom, bawo ɛfan kəsəŋɛ kə kəcərə toloku təlɔma.»

18 Kə wəsɔdar wəkakə ɛlɛk kə, kə ŋaŋkə ndena wəbɛ wəsɔdar wəRom.

K'oloku kə: «Kelmani Pol ew'em k'olok'im a iker'am wətɛmp wəkawɛ, a ɛfan kəsəŋ'am kəcərə toloku təlɔm.»

19 Kə wəbɛ wəsɔdar wəRom osumpər kə kəca kə ŋawurnɛ kəsək. K'eyif kə: «Ake toloku tə məyɔ nte məfan kəlɔk'im mə-ɛ?»

20 Kə wətɛmp nwe oloku: «ASuyif alɔma ŋantəŋnɛ a ŋawer əm alna Pol mətərənɛ ŋa kə ndena aboc kiti aSuyif, pəmɔ nte ŋaŋfan kəyifət kə ŋaməmən tetən belbel mə.

21 Mba məsɛp ta ŋatam əm dəmoloku de! Bawo afum wəcɔ mankələ kə təlɔm ŋa dacɔ ŋayi kəcəpɛ Pol towul pɛdifɛ pən. Ŋasəŋɛnɛ temer kətədi yeri, kətəmən ta ŋantanim kə-ɛ. Tɛm tante ŋalip kəlompəsɛ. Kəwosɛ kam gbəcərəm kə ŋayi kəkar.»

22 Kə wəbɛ wəsɔdar wəRom ɛmɛŋkəs wətɛmp nwe a ta pəlɔmər sɔ nwe o nwe toloku tatəkə oloku kə mə, k'ɛsak kə, k'ɔŋkə.

Pol nde fər ya wəbɛ Felikəs kirin

23 Kə wəbɛ wəsɔdar wəRom ewe asɔdar ɔn apəŋ mɛrəŋ, k'oloku ŋa: «Nələk asɔdar masar mɛrəŋ (200), ayɛksɛnɛ fələs wəcɔ camət-mɛrəŋ, kə atəmpər mbəncəran masar mɛrəŋ (200), ŋalompəsɛnɛ kəkə ka Sesari pibi-ana.

24 Nəlompəs sə fələs, nte tənşəne pakene wəbe Felikəs Pol pəyi wəyeŋ mə.»

25 Kə wəbe wəsodar wəRom encice Filikəs areka nne ŋenaloku nte mə:

26 «Ina, Kolodu Lisiyas, incic'am areka ŋəne mənə wəbe kem Felikəs, icyif əm.

27 Wərkun wəkawε, aSuyif aləma ŋələk kə ŋəkə kənim. Mba alok'im a wəkom wəRom əfə, it'əsəŋ em kəder kə asodar em kəbaŋəŋ ŋə kə.

28 Nte ifəŋ kəcərəε tes nte amboncε kə mə, k'intorene kə nde aboc kiti aSuyif ŋayi mə.

29 K'inəŋk, k'amboncε kə tes-ε, kəgbekələne kə nke kəŋkotərene sariye səŋan mə, mba ali tes eləsər fe nte pəmar padife kə, kə pəyəne fe ti-ε, paber kə dəbili mə.

30 Nte alok'im kəsek kədif ka wərkun wəkawε oŋ mə, itə iŋken'am kə katəna. K'ilokene aboncε ən tes, ŋəkə ŋabokene tetən nno mənə məyi mə. Dənda əfə ləŋtaŋ.»

31 K'asodar ŋayo pəmə tatəkə wəbe kəŋan ənasom ŋə mə. Kə ŋələk Pol kə ŋəŋkekərəε kə pibi disre haŋ Antipatiri.

32 Dəckəsək kə asodar aləma ŋaluksərne nde ŋandire mə, kə ŋasak ayeksene fələs ŋakekərəε kə.

33 Nte ŋambərəε Sesari mə, kə ŋasəŋ areka ŋəŋəkə Felikəs wəbe ka dətəf, kə ŋamentər kə Pol.

34 Nte wəbe ka dətəf elip kəkaraŋ areka nne mə, k'eyif Pol wəka atəf ŋere məyəne-ε. Nte ene a wəka Silisi əyəne mə,

35 kə wəbe Felikəs oloku: «Indecəŋkəl əm kə aboncε am tes ŋandeder-ε.» K'osom a pacəŋər Pol

nde bili bɔkɔ bɛnayi nde abanƙa ɲa wɔbɛ Herodu mɔ.

24

Ambonɛ Pol mes

¹ Nte mata kɛcamɔt mencepɛr mɔ, kɔ wɔlonɲɛ wɔpɔɲ Ananiyas ontɔr kɔ abeki a dɔtɔf alɔma kɔ wɔgbɛkɛlɛnɛ wɛkin pacwe kɔ Tertulu. Kɔ ɲanƙɔ ɲabokɛnɛ nnɔ wɔbɛ wɔka dɔtɔf eyi mɔ teta Pol.

² Kɔ wɔbɛ ka dɔtɔf osom k'awe Pol, kɔ Tertulu on-cɔp moloku mɔn nte: «Wɔbɛ, mɔn'ɔsɔɲɛ nte sɔyine bɛkɛc yoforu mɔ. Kɛkɛtɛnɛ dɛbɛ kam kɛtɔt, kɔ kɛsɛkpɛr ka mes mɔlɔma teta atɔf ɲosu ɲanɲɛ, bawo mɔnayay ɲi nte tender mɔ.

³ Wɔbɛ Felikɛs wɔlelɛs kosu, sɔɲsɔtɔ pɔtɔt papɔkɔ tɛm fɛp kɔ mofɔ fɛp. Sɔɲyek-yekɛs'am ti.

⁴ Mba nte intɔfan kɛlɛkɛr ɛm tɛm telarɛm mɔ, it'intolan'am kɛcɛɲkɛl su abɛkɛc ɲɔtɔt disrɛ tɛm tepic.

⁵ Sɔɲkɔkɛ a fum wɛkawɛ wɔbɛrɛs afum dacɔ ɔyɔnɛ, nkɔn ɔɲsɔɲɛ aSuyif fɛp kɛgbɛkɛlɛnɛ doru mofɔ fɛp. Wɛkirin wɔka kɛgba ka afum a Nasarɛt ɔyɔnɛ.

⁶⁻⁷ ɛnafan yati kɛyik-yikɛs kɛlɔ kɛpɔɲ ka Kanu, itɔ sɛnasumpɛrɛ kɔ.

⁸ Mɔna Wɔbɛ mɔntam kɛyifɛt kɔ, mɔtɛn kɛcɛrɛ kɔ pɛyɔnɛ a tɔkɔ sɛmbonɛ kɔ mɔ kance kɔ-ɛ.»

⁹ Kɔ aSuyif aɲɛ ɲanayi di mɔ, ɲambaɲɛ Tertulu, kɛclɔku: «Itɔ teyi yati!»

Pol fɔr ya Felikɛs kirin

¹⁰ Nte wɔbɛ ka dɔtɔf ɛfɛk Pol kɛca a pɛlok-loku mɔ, kɔ Pol oloku nte: «Wɔbɛ, incɛrɛ a meren mɛlarɛm

mə məyi atəf nəne məckiti. Kəlanə kanəkə disre k'indeloken'am kəyac kem.

¹¹ Təntacepər fe mata wəco kə merən nte impē dare da Yerusalem kəkəkor-koru Kanu, məntam ti kəyifət.

¹² Ambəp f'em kələ kəpənə ka Kanu, ambəp f'em dəkətola Kanu da aSuyif, ambəp f'em dare disre səcgbəkələne kə afum, kə pəyəne fe ti-ε, icgbiyəfər afum kəyefərənε.

¹³ Nəfətəm sə kəcmentər əm kance ka tes təkə nəmbonc em mə.

¹⁴ Kance intəm kəwose nno fər yəm kirinə a Kanu ka atəm em k'inəkor-koru, k'incəmə dəpə da Kanu darən ndε nə nəncəm-cəmnε a yəm yə mə. Mba ina ilanə nte o nte ancic dəYecicəs Yosoku Tawureta Musa kə Sayibε mə.

¹⁵ İngbəkər teta Kanu tələma amera, nte nə abonc'em mes nə sə nəngbəkər mera mə: It'əyəne a Kanu kəndeyekti afi, alompə kə atələmp.

¹⁶ It'əsənε nte ina sə inşep tēm fəp kəkətənε amera nətət fər ya Kanu kə afum kirinə mə.

¹⁷ Nte meren məlarəm mencepər mə, k'inder nno Yerusalem kədəmar afum em, k'ilonənε sə Kanu.

¹⁸ Kə nənkə nəbəp im icsəkəsne kələ kəpənə ka Kanu disre, bafə afum nəlonkənε di, bafə pəcgbəkələne de.

¹⁹ Mənε aSuyif a atəf nə Asi aləma akə nənayı di mə, nə nə pəmar kəder nno məyi mə nəcəbonc'em mes, kə pəyəne a nəntəmpər em mi-ε.

²⁰ Kə pəyəne fe ti-ε, afum akanə nəlokə tes tēlec nte aboc kiti aSuyif nənanənək im nte nənakit'im mə.

²¹ Mənε pəyəne tolokə təkə inalokε dim dəpənə,

icɛmɛ ɲa dacɔ mɔ de: «Teta kɛdeyɛfɛ defi nkɛ ilan mɔ, it'ancɛmbɛr'em mɔkɔ kiti nnɔ fɔr yam kirin!»

²² Tɛnabɛp paloku Felikɛs belbel mes ma dɔpɔ da Mariki Yesu, k'olukɛsɛ kiti dɔsɔk dɔlɔma, pɛcloku: «Kɔ wɛbɛ wɛsɔdar wɛRom Lisiyas endeder-ɛ, indɛmɔmɛn tes tonu.»

²³ Kɔ wɛbɛ ka dɔtɔf oloku wɛsɔdar a pɛcaɲɛr kɔ, mba ta pɛkot kɔ, ta pɛmɔnɛ sɔ afum ɔn kɛmar kɔ mes mɔlɔma.

Pol fɔr ya Felikɛs kɔ Durusil kirin

²⁴ Ntɛ mataka mɔlɔma mencepɛr mɔ, Felikɛs ɲasol kɔ wɛran kɔn, Durusil, wɛSuyif ɛnayi, kɔ ɲander, kɔ ɲasom pakɔwɛnɛ ɲa Pol. Kɔ ɲancɛɲkɛl kɔ kɛloku ka kɛlan kɔn Yesu Krist.

²⁵ Mba ntɛ Pol ɛnatɛfɛrnɛnɛ moloku mɔn teta pɛlompɔ, teta kɛsumpɛrnɛ, kɔ kiti nkɛ kɛndeder mɔ, kɔ kɛnɛsɛ kɛyi Felikɛs. K'oloku Pol: «Pɛntɛɲnɛ mɔkɔ tantɛ. Mɔkɔ kɛɛsna. K'indɛsɔtɔ tɛm-ɛ, indɛsɔw'am.»

²⁶ Felikɛs ɛnafɔtɔma a Pol ɔɲkɔsɔɲ kɔ pɛsam. It'oncsomɛsɛ tɛm fɔp, pakɔwɛnɛ kɔ Pol ɲaloku-loku.

²⁷ Kɔ ɲayi ti disrɛ haɲ kɔ meren mɛrɛɲ mencepɛr, k'asɛkpɛr Felikɛs dɛbɛ, k'andɛs Pɛrsiyus Fɛstus. Mba ntɛ Felikɛs ɛnafɔɲ kɛbɔtɛs abɛ aSuyif mɛra mɔ, k'ɛsak Pol dɛbili.

25

Awe Pol fɔr ya wɛbɛ wɛka tɔf ya Rom fɔp kirin

¹ Kɛdɛs ka Fɛstus dɔcɔm da dɛbɛ tataka ta maas, k'ɛyɛfɛ dare da Sesari kɛkɔ ka Yerusalem.

² Aloɲnɛ apɔɲ kɔ afum alɛl a dɔtɔf aSuyif ɲaɲkɔ ɲabokɛnɛ nnɔ ɛyi mɔ, teta Pol.

³ Kɔ ɲaɲgbɛc ɲactola Fɛstus kɛmar kɛɲan pakɛrɛ Pol Yerusalɛm, mba kɔ ɲalompɛs towul mɛrɛ ɲantam kɛdifɛ Pol dɔpɔ mɔ.

⁴ Kɔ Fɛstus oloku ɲa a ancaɲɔr Pol dare da Sesari, a nkɔn yati pɛmar pɛkɔ di mata mamɔkɔ.

⁵ K'endenɲɔr, «Afum acɛrɛ kɛlok-loku aɲɛ ɲayi nu dacɔ mɔ, ɲasol kɔ ina, sɛkɔ. Kɔ fum wɛkawɛ ɛnalɛsɛr tes-ɛ, ɲakɔ ɲalɔm kɛbokɛnɛ kɛɲan dɛndo.»

⁶ Fɛstus ɛnacepɛrɛnɛ fɛ mata camɛt-maas, kɔ pɛyɔnɛ fɛ ti-ɛ mata wɛcɔ Yerusalɛm, k'olukus dare da Sesari. Dɔckɔsɔk k'endɛ dɛɲkiti, k'osom a pakɛrɛ Pol.

⁷ Ntɛ Pol ender mɔ, kɔ aSuyif aɲɛ ɲanator Yerusalɛm mɔ ɲaɲkɛl kɔ, kɔ ɲambɔncɛ kɔ mes mɔpɔɲ mɛlarɛm, mɛmɛ ɲanatɔtam kɛsɔkɛs mɔ.

⁸ Pol oncloku kɛyacnɛ kɔn: «Ali tes ilɛsɛr fɛ! Inciya fɛ sariyɛ sa aSuyif, inciya fɛ kɛlɔ kɛpɔɲ ka Kanu, inciya fɛ Sesar.»

⁹ Fɛstus, nwɛ ɛnafan kɛbɔtɛs aSuyif mera mɔ, eyif Pol: «Mɛfan kɛpɛ Yerusalɛm pakɛkit'am di fɛr yem kirin ba?»

¹⁰ Kɔ Pol oloku: «Fɛr ya dɛɲkiti da Sesar y'incɛmɛ kirin tantɛ, difɔ pɛmar pakit'im. Ali tes ilɛsɛrɛ fɛ aSuyif, pɛmɔ tatɔkɔ mɛna yati mɛncɛrɛ ti mɔ.

¹¹ Kɔ pɛyɔnɛ a inciya, kɔ pɛyɔnɛ a iyɔ ntɛ o ntɛ pɛmar padif'em mɔ-ɛ, ifɔtola a paɲaɲɲɛn'em. Mba kɔ pɛyɔnɛ a mes mamɛ ambɔnc'em mɔyɔnɛ fɛ kance-ɛ, pɛmar fɛ nwɛ o nwɛ pɛsɔɲ im ɲa. Intola ti wɛbɛ wɛka tɔf ya Rom fɛp pakit'im.»

¹² Awa Fɛstus, ntɛ ɲalip kɛmɔmɔn mes mɛmɛ kɔ amar ɔn mɔ, k'oloku: «Ntɛ mɛloku a Sesar mɛfan a pakit'am mɔ, kɛkɔ kɔ mɛnder Rom pakɛkit'am.»

Pol fɔr ya Akripa kɔ Bernis kirinj

¹³ Nte mataka mɔlm mancepɔr mɔ, wɔbe Akripa kɔ wɔkire kɔn Bernis njander dare da Sesari, kɔdeyif Festus.

¹⁴ Nte njawak di kɔwon mɔ, kɔ Festus ɔlmɔr wɔbe nwe teta Pol, pɔcloku: «Felikɔs enasak fum wɔlɔma dɔbili.

¹⁵ Nte inakɔ Yerusalem mɔ, alɔnje apɔnj kɔ abeki a dɔtɔf aSuyif njanabokene tetɔn, njactola kɔdif kɔn.

¹⁶ K'iloku nj a aRom njafɔsɔnj fum kɔdif ta wɔkayi njantatɛfɛrene kɔ abonce ɔn mes-ɛ, pɔyacne moloku mɔkɔ ambonce kɔ mɔ.

¹⁷ It'ɔsɔnje nte njatɔwon kɔderene nnɔ mɔ. Dɔckɔsɔk, k'inde dɔnjkiti, k'isom a pakere fum wɔkakɔ.

¹⁸ Nte abonce ɔn mes njander mɔ, ali tes njambonce fe kɔ nte inafɔtɔne kɔ mɔ.

¹⁹ Njɔngbekɔlene kɔgbekɔlene dɔm teta dine danjan, kɔ teta Yesu wɔlɔma, nwe efi mɔ, mba kɔ Pol nkɔn oloku a eyi wɔyɛnj.

²⁰ Kɔ ina, nte intɔcɔre nte indeloku teta mes ma dine danjan mɔ, k'iyif Pol, kɔ pɔyɔne ɔnjwose kɔkɔ Yerusalem pakɔkiti kɔ dɔndo-ɛ.

²¹ Mba Pol ontola nte efanj mɔ: A wɔbe kosu wɔlel pakiti kɔ, it'ɔsɔnje nte iloku a pacanjar kɔ hanj ictam kɔkene kɔ Sesar wɔbe wɔka tɔf ya Rom fɔp.»

²² Kɔ Akripa oloku Festus: «Ina sɔ, ifanj kɔcɔnjkal fum wɔkawɛ.» Kɔ Festus oloku: «Alna mɔncɔnjkal kɔ.»

²³ Dɔckɔsɔk Akripa kɔ wɔkire kɔn Bernis njanderene asos njayesne, kɔ njambere nde dukulo dɔkɔ anjkiti mɔ, kɔ abe apɔnj asɔdar aRom, kɔ afum alɛl a dare. Kɔ Festus osom k'anjkerɛ Pol.

24 Awa kɔ Fɛstus oloku: «Wɔbɛ Akripa, kɔ nɛna fɛp fonu aɲɛ nɔyi su dacɔ mɔ, nɛnɛɲk fum wɛkawɛ, tetɔn tɔ aSuyif alarɛm akanɛ ɲambokɛnɛ nnɔ iyi mɔ. Kɔyɛfɛ Yerusalem haɲ nnɔ, ɲackule-kule a pɛmar fɛ pɔyi doru.

25 Kɔ ina, inɛɲk fɛ nte o nte pɛmar a padifɛ kɔ mɔ. Mba nte nkɔn wɛsɛrka ontola a wɔbɛ kosu wɔlɛl pɛkiti kɔ mɔ, it'incɛm-cɛmnɛ kɔdekenɛ kɔ Pol wɛkawɛ.

26 Nte intɔyɔ nte o nte tosoku tecicɛ wɔbɛ kosu wɔlɛl teta fum wɛkawɛ mɔ, it'ɲkɛrɛnɛ kɔ fɔr yonu kirɲ, pɛnanɲkanɛ mɛna wɔbɛ Akripa, nɔyifɛt kɔ nte tɔɲsɔɲɛ isɔtɔ tɔkɔ indecic mɔ.

27 Bawo, pɔwuren'em kɔyi samnɛ, kɔsɔɲ kelmani packekɛrɛ Rɔm ta mɛsɔkɛs kɛcic mes mɔkɔ ambɔncɛ kɔ mɔ-ɛ.»

26

Pol kɔyacnɛ kɔn nnɔ Akripa eyi mɔ

1 Kɔ Akripa oloku Pol: «Awos'am kɛloku-loku tetam.»

Kɔ Pol ondot kɛca kɛlɛk moloku kɔyacnɛ.

2 «Pɛmbɔt im, Wɔbɛ Akripa, kɛnɛɲkɛnɛ mɔkɔ idey-acnɛ nnɔ mɔyi mɔ mes mɛnɛ aSuyif alɔma ɲambɔncɛ em mɔ.

3 Mɛncɛrɛ belbel mes mokur aɲa ma aSuyif kɔ kɛgbɛkɛlɛnɛ ka mi. Ilɛtsɛn'am mɛcɛɲkɛl im belbel.

4 ASuyif fɛp ɲancɛrɛ nte tenayɔnɛ teyi tem kɔyɛfɛ dowut dem mɔ, dɛkɛcɔp nte inayi afum em dacɔ Yerusalem mɔ.

5 ɲancɛr'em kɔyɛfɛ nte pɛnawon mɔ, ɲantam sɔ kɛbɔncɛ ti, bawo fɔr yaɲan yati ɲanatɔɲnɛ mes kɔ mɔyɔ ma doru dem fɛp, a cɛFarisi c'inayi, kɛgba ka afum akɔ ɲananɲkanɛ kɔyɛɲk mes dinɛ dosu mɔ.

⁶ Mɔkɔ ayi kɛkit'im, bawo injɓekɛr amera temer nte Kanu kɛnasɔŋ atem asu mɔ.

⁷ Cusuŋka cosu nce wɛco kɔ mɛrɔŋ cɛŋsali tem fɛp, dan kɔ pibi, ŋayɔ amera kɛsɔtɔ ka kɛkɛkɛ temer kanɔkɔ. Wɛbɛ, teta kɛɓɓekɛr amera kanɔkɔ kɔ aSuyif ŋambonc em mes.

⁸ Teta ake tɔ nɛntɔfanɛ kɛlan a Kanu kɛŋsɔŋɛ fum kɛfɔtɛ dɛdefi-ɛ?

⁹ Ina wɛkawɛ yati, inacɛm-cɛmnɛ kɛsimɛs kɔ tewe ta Yesu wɛNasarɛt sɛpɔ fɛp.

¹⁰ It'inayɔ Yerusalem, ina wɛkawɛ yati inabɛr afum acempi alarɛm dɛbili kɛtam disrɛ nke abɛ a aloŋɛ ŋanasɔŋ im mɔ. Nte ŋancloku kɛdif kɛŋan mɔ, ina sɔ incwosɛ ti.

¹¹ Inckɔ dɛwɔlɔ wa dɛkɛtola Kanu da aSuyif fɛp, ictɔrɛs alan, incɓɓɛc ŋa kɛlɔmɛs tewe ta Yesu. Pɛctel'em nnɔ ŋayi mɔ, incɓɓɛs ŋa han sɛdare sɛcuru.»

Pol ɔlɔm kɛkafɛlɛ kɛn amera

¹² «Ti tɛnasɔŋɛ dɔsɔk ndɛ indekɔ dare da Damas mɔ, kɛtam kɔ kɛsom ka abɛ a aloŋɛ apɔŋ.

¹³ Dan dɛcfan kɛbɛp, Wɛbɛ Akripa, k'inɛŋk dɛndo dɔpɔ pɛwanɔkɛra mɛɛ pɛnakɛl im kɔ afum akɔ sɛnasol mɔ. Pɛmot mɛɛ pɛnayɛfɛ dɛkɔm mɔ, pɛmot pɛtas dec.

¹⁴ Kɔ sɛntɛmpɛnɛ fɛp fosu dɛntɔf, k'ine dim do-clok'im cɛEbre: «Sol, Sol, ta ake tɔ mɛntɔrɛs em-ɛ? Ta ake tɔ mɛmbɛrɛ pɛmɔ wana cɛŋɓɓangban ca mariki mam dɛntɔf-ɛ.»

¹⁵ K'iyif: «Mariki, an'ɔfɔ-ɛ?»

K'oluks'em: «In'ɔfɔ Yesu, nwe mɛna mɛyi kɛtɔrɛs mɔ.

16 Mba mæyefe mæcæme wæcæk wam kærõj. Mæcære tes nte tæsõj'em kæwurær æm mæ: Iyek-yek æm kæyõne ka wæbæce kem, mæyõne sæ wætæjne mes mækæ mænæjk nno iyi mæ kæ mækæ indesæwurær æm mæ.

17 Indeban æm afum am akanje dæwaca kæ atæyõne aSuyif nda anje indesom æm mæ,

18 kækæmepi ja fæ. Nte tæjõje jawur dækæbump jatefærne pæwanjæra, jawur kætam ka Sentani jayi kætam ka Kanu disre mæ. Kæ jalañ im-ε, jandesõtæ kænajanne ka kiciya kænjan, jasõtæ dækæcæme afum dacæ anje jayõne aka Kanu mæ.»

Pol oloku yebæc yæn

19 «Ti disre, Wæbe Akripa, iyenjær fe kænæjk nke kænjeffe darenc mæ domp.

20 Mba inacam kæræsna nno afum aka Damas kæ aka Yerusalem, kæbær ka afum aka atæf ja Yude fæp han atæyõne aSuyif. Iloku ja kæsækpær bæcæk jakafæle nno Kanu kæyi mæ, jayæ mæyæ mætæt mme menjæntær kæsækpær kænjan bæcæk mæ.

21 Tante tenasõje kæ aSuyif jasumpær im nde kælo kærõj ka Kanu disre, jacfan kædif im.

22 Mba kæbum ka Kanu kæsõj'em kæyi doru han mækæ, iyõne sede sæn nno awut kæ abeki jayi mæ. Ifæloku nte o nte sayibe kæ Musa janatæloku mæ,

23 kæcære a Krist endekekære pæcuca, k'õyõne wæyefe wæcækæ-cækæ defi-ε, nkæn endecam teta pæwanjæra nno aSuyif kæ atæyõne aSuyif jayi mæ.»

Pol kæfan kæn kæsõje Akripa kælan

24 Nte Pol oncloku moloku mæn meyacnene mæ, kæ Festus onkulærne: «Pol cæpæ mætamne fe? Kætækæs kam kælaræm kæsõj'am kætætamne.»

25 Kɔ Pol oloku: «Daka o daka dɔyɔ f'em. Intamne ken, Wæbe kem wælel, Fæstus! Moloku ma kance kɔ molompu m'iyi kæloku.

26 Wæbe encære maməkɔ fəp, it'ɪŋloke mi kəlan disre fər yɔn kirin. Incære a mæncære mes maməkɔ fəp, bawo menacepər fər ya afum kirin.

27 Wæbe Akripa, məlan sayibe ba? Incære belbel a məlan ŋa!»

28 Kɔ Akripa oloku Pol: «Kɔ mæsɛp kəberene pəpic-ε, mənʂɔŋ'em kəyɔne wəlan Krist.»

29 Kɔ Pol oloku: «Təyɔne a ndekəl kɔ pəyɔne fe ti-ε, tekirin, intola kɔ Kanu kəwɔsɛ-ε, kəyefe məna han akɔ ŋayi kəcəŋkəl im məkɔ mɔ, nəyi pəmɔ ina, mba ta gbekce yayε yeyi ti de.»

30 Awa wæbe ka atɔf, wæbe ka sədare sələrəm, Bernis, kəbər ka afum akɔ ŋanandε kɔ ŋa mɔ fəp ŋayefe.

31 Nte ŋancwur mɔ ŋaclokeɛ: «Fum wəkawε ɔyɔ fe nte o nte pəmar padife kɔ, kɔ pəyɔne fe ti-ε paber kɔ dəbili mɔ.»

32 Kɔ Akripa nkən oloku Fæstus: «K'antam kəsak fum wəkawε pətɔ-yɔne fɔ ewe wæbe wəka Rom-ε.»

27

Aŋkekære Pol Rom

1 Nte antəŋne oŋ a səbeke debil kəkɔ ka atɔf ŋa Itali mɔ, k'asəŋ Pol kɔ afum alɔma akɔ ŋanayi dəbili mɔ wəsədar wəpəŋ wəlɔma nwe ancwe Yuliyus mɔ. Wəbum ka wæbe wəka Rom enayɔne, k'asom kɔ kəkəkəs ŋa.

² Kɔ sɛmbɛkɛ dɛbil kɛyɛfɛ ka dare da Adaramit kɛkɛ ka cɛgbɛp ca Asi kɔ sɛŋkɔ sɛpɛ. Aristarko wɛMasedon wɛka dare da Tesaloni ɛnayi su dacɔ.

³ Dɔckɔsɔk kɔ sɛmbɛrɛ Sidɔŋ. Yuliyus nwe ɔncyɔ Pol mes mɔtɔt mɔ, owosɛ kɔ kɛkɔ ndena anapa ɔn kɛkɔtɛnɛr ŋa kɛmar kɛlɔma.

⁴ Ntɛ sɛyɛfɛ dɛndo mɔ, kɔ sɛsumpɛr kɛca ka Sipɛr bawo sɛncgbɔfnɛ afɛf.

⁵ Ntɛ sɛncali kɛba nkɛ mɛnc moŋsut tɔf ya Silisi kɔ Paŋfili mɔ, kɔ sɛŋkɔ sɛtor dare da Mira, atɔf ŋa Lisi.

⁶ Dɛndo kɔ wɛbɛ wɛsɔdar ɔsɔtɔ dɛndo abil nɛŋɛ ŋanakɔyɛfɛ dare da Aleksandɛr kɛkɛ ka Itali mɔ, k'ɛmbɛk su ŋi disrɛ.

⁷ Mataka mɛlarɛm disrɛ sɛckɔt mɛtɛn dɛkɛba. Pɛcuca disrɛ pɔ sɛnadɛbɛp Sinidi, mba ntɛ afɛf ŋɛnatɔwosɛ su kɛkɔ pɛbɔlɛ mɔ, kɔ sɛsumpɛr agbɛp ŋa atɔf ŋa Krɛt, kɔ sɛncɛpɛr Salmɔn.

⁸ Kɔ sɛŋgbɔfnɛ dobo dadɔkɔ pɛcuca disrɛ, kɔ sɛŋkɔ sɛbɛp kɛfo kɛŋkɔ aŋwe «Cɛtɛnta Cɛtɔt,» ta pɛmbɔlɛnɛ di kɔ dare da Laseya-ɛ.

⁹ Ntɛ tɛm tɛlarɛm tɛncɛpɛr, akɔ kɛkɔtɛnɛ abil kɛncyɔ kɛyɔ dɛm wɛywey mɔ, kɔ mata ma kɛsun mɛncɛpɛr-ɛ. Kɔ Pol ɛŋgbɛŋɛr ŋa:

¹⁰ «Anapa, inɛŋk a kɛkɔt kosu kɛŋkɛ kɛyɔ wɛywey. Abil kɔ yɛcamɛs yɔkɔ yeyi ŋi disrɛ mɔ yɛndɛlɛɛ, sɛna aŋɛ sɛyi ŋi disrɛ mɔ yati sɛtɔrɔ.»

¹¹ Mba wɛbɛ wɛsɔdar pɛlan ŋ wɛgbɛk abil kɔ wɛka ŋi, ta ewe moloku ma Pol daka-ɛ.

¹² Ntɛ tendɛŋɛrɛnɛ ti mɔ, kɛtɛnta kɛnatɛsɛ fɛ kɛcɛpɛrɛnɛ dɛrɛŋ. Kɔ ayi a abil ŋaŋkɔ disrɛ alarɛm ŋaloku kɛyɛfɛ ka di ŋabelɛr Fenik, kɛtɛnta ka Krɛt nkɛ kɛŋkɛkɛnɛ afɛf ŋɛdɛrɛŋ mɔ.

Afef ɲɔpɔɲ ɲɔsut dɔkɔba

13 Kɔ afef ɲepic ɲeyefe kɔwɔr kɔca kɔtɔt, kɔ ɲancɛm-cɛmnɛ a ɲantam kɔyɔ tɛfan tanjan. Kɔ ɲayekti abɛla ɲanjan kɔ ɲasolnɛ dobo da Kɛt, ɲagbɛpɛnɛ di.

14 Pɔwon fɛ kɔ afef ɲɔpɔɲ ɲɔkɔ ancwɛ «ɛrakilon» mɔ ɲowɔr kɔyefe ka mɔrɔ ma dare.

15 Kɔ afef ɲanɲɔkɔ ɲeyefe kɛcɛrnɛnɛ abil ta antam sɔ kɛcɛmɛ afef ɲanɲɔkɔ kirin-ɛ, kɔ sɛsaknɛ kɔ ɲɛɲkɛkɛrɛ su ndɛ ɲɛnafan mɔ.

16 Sɔyi kɛcɛpɛr mokuru mɛfɛt mɔlɔma tantɔf, mɛnɛ ancwɛ Kɔda mɔ, kɔ sɛntam pɛcucca disrɛ kɛcɛmbɛrɛs abil.

17 Ntɛ sɛlinɛrnɛ ɲi mɔ, kɔ aɲɛ ɲayi kɛbɛc abil disrɛ mɔ ɲanɲkɔtɛ ɲi bɛnda yɔkɔ yɛnayɔnɛ yɛmɛɲkɛrnɛ mɔ, ɲacnɛsɛ kɛkɔlonɛ agbɛp ɲa atɔf ɲa Siriti, bawo kɛrɛrɛ ka asɛnc kɛnayi di. Kɔ ɲanɲɔbal aɲka, mba afef ɲɔsolɛ ɲa.

18 Ntɛ afef ɲɛnananɲkanɛ kɔyikɛc su mɔ, dɔckɔsɔk kɔ ɲanɲɔbalɛs yɛcamɛs yɔlɔma dɔkɔba.

19 Tataka ta maas, kɔ abɛc a debil ɲasumpɛr gbalanɲi ba abil dɔwaca kɔ ɲanɲɔbal bi dɔkɔba.

20 Mataka mɛlarɛm disrɛ dec kɔ cɔs yɔncwɔr fɛ, afef ɲɛcbɛk ɔɲ kɛbɛk dɛm, tɛlpɛs kɔ sɔwɔrɛ mɛra kɔyi sɔ doru.

21 ɲanadi fɛ yɛri kɔyefe ntɛ pɛnawon mɔ. Itɔ kɔ Pol eyefe k'ɛncɛmɛ ɲa dacɔ, k'oloku: «Anapa, pɛcyɔnɛ a nɛnacɛɲkɛl im ta nɔyefe Kɛt nɔyekti abɛla-ɛ, kɔ nɛmbumnɛna pɛcuy pampɛ pɔsɔtɔ su, kɔ ca nyɛ yɔsɔlɛr su mɔ.

22 Mba ndɛkɛl ɔɲ, intola a ancɛpɛs nu bɛkɛc, bawo ali fum ɔfɔfi nu dacɔ, mɛnɛ abil ɲɛndɛlɛcɛ.

23 Itɔ nnɔ pibi mɛlɛkɛ mɔlɔma ma Kanu nkɛ iyɔnɛ wɔkɔn kɔ nkɛ injor-koru mɔ, mowurɛrn'em.

24 Kɔ molok'im: «Ta mɛnesɛ, Pol! Mɛnɛ mɛcɛmɛ fɔr ya wɔbɛ ka tɔf ya Rom fɔp kirinj, tetam tɔ Kanu kɛsakɛ akanɛ nɔyi abil njanɛ disrɛ mɔ fɔp kɔyi doru.»

25 Nɛcɔpɔsnɛ bɛkɛc arkun, bawo ilanɛ tɔkɔ Kanu kɛlokun'em mɔ tendeyi.

26 Mba mɛnɛ pakɔlɔnɛ mɔkuru mɔlɔma.»

27 Pibi pa wɔcɔ kɔ maɔnkɛlɛ p'anakɔ pafɛcɛrɛnɛ su kɛba ka Adiriya. Pibi dacɔ kɔ akɔtɛnɛ abil njancɛrɛ a alɔtɛrɛnɛ antɔf njowosu.

28 Kɔ njantɔrɛ paka pelel pakɔtɔr pi kɛbɛnda, kɔ njanɔɔnk a putukum pɛmbɔp mɛtɔr wɔcɔ maas kɔ camɔt-tin. Kɔ njancɔɔnɛ kirinj kɔ njawak sɔ, kɔ njanɔɔnk a pɔtukum pɛmbɔp mɛtɔr wɔcɔ mɛrɔɔn kɔ camɔt-mɛrɔɔn.

29 Ntɛ njanesɛnɛnɛ abil kɛcɔnjɛrɛnɛ masar mɔ, itɔ njanagbalɛ anka maɔnkɛlɛ tadarɔn, kɔ njande njackar pɔwanɔkɛra, mba pɛcwɔn nɛ.

30 Mba ntɛ abɛc a debil njanafanɛ kɔyɛksɔr abil mɔ, kɔ njantɔrɛ agbanɔkɛ, njacloku a njakɔ njagbal anka tekirinɛ ta abil.

31 Kɔ Pol oloku wɔbɛ wɔsɔdar kɔ asɔdar, «Kɔ afum akanɛ njantɔyi debil-ɛ, nɛfɔtam kɔyi doru.»

32 Kɔ asɔdar njancɔpu bɛnda ya agbanɔkɛ, kɔ njasak nɛ kɔ njɛntɛmpɛnɛ.

33 Nɔyi kɛkar dec kɛsɔk, kɔ Pol ewɛnɛ fɔp fosu kɛkɔdi yeri, k'oloku: «Mɔkɔ tataka ta wɔcɔ kɔ maɔnkɛlɛ ntɛ nɔyi kɛkar, ta nɛndi yeri mɔ.

34 Intɔla nu oɔn kɛdi yeri, bawo pɛmar nɛdi yi ntɛ tɔɔnsɔnɛ nɔyacnɛ mɔ. Ali wɛkin nu dacɔ, kɛfon kɔn ka dɛromp kɛfɔsɔlɔr kɔ!»

³⁵ Nte Pol elip kɛloku tatɔkɔ mɔ, k'elek kɛcom k'eyif Kanu barka fɔr ya afum fɔp kirin, k'entepi ki, k'eyefe ki kɛsɔm.

³⁶ Kɔ fɔp fɛncɔp bɛkɛc kɔ ηayefe kɛsɔm cɛcom.

³⁷ Sɛnayi afum masar mɛrɛη wɛcɔ camɛt-mɛrɛη kɔ camɛt-tin (276) akɔ ηanayi abil ηaηɔkɔ disre mɔ.

³⁸ Nte fɔp fɛnɛmbɛrɛ mɔ, kɔ ηaηgbal malɔ mɛlpɛs dɛkɛba nte tɔηsɔηɛ abil ηɛbɛrɛnɛ kɛfɔy mɔ.

Kɛloηɛ ka abil

³⁹ Nte dec dɔsɔk mɔ, abɛc a debil ηananɛpɛl fɛ antɔf, mba ηananɛηk kɛrɛrɛ, kɔ ηancɛm-cɛmnɛ kɛcɔηɛs abil haη ηabɔp ki.

⁴⁰ Kɔ ηasikɛli aηka kɔ yontor dɛkɛba, kɔ ηasikɛlɛnɛ sɔ bɛnda ya yas nye anɔgbɛkɛ abil mɔ. Kɔ ηayɛkti abɛla abil dɛkɛrɔ, kɔ afɛf ηɛlek ηa, kɔ ηɔncɔηɛs abil kɛca ka dɛkɛrɛrɛ.

⁴¹ Mba kɔ ηaηkɔ ηapɛt kɛrɛrɛ acir mɛrɛη dacɔ, kɔ kɛrɔ ka abil kɛmɛtɛnɛ dɛsɛnc, ηɛntam fɛ sɔ kɛcɔηɛ kirin. Kɔ yam yɔpɔη yɛnder yosut abil ηaηaη kɔ ηɛlɛsɛr ηi tadarɛη.

⁴² Kɔ asɔdar ηancɛm-cɛmnɛ kɛdif ka kelmani-e, ta wɛlɔma pɛηɛrɛη pɛyɛksɛr ηa.

⁴³ Mba wɛbɛ wɛsɔdar nwe ɛnacɛm-cɛmnɛ kɛmar Pol ta efi dɛkɛba mɔ, ɛyamsɛr asɔdar kɛyɔ ka tɛfan taηaη, k'oloku akɔ ηanacɛrɛ kɛηɛrɛη mɔ ηanuηkɛnɛ kɛtor dɛkɛba ηaηɛrɛη nte tɔηsɔηɛ ηape pɛwosu mɔ.

⁴⁴ Afum alpɛs akɔ ηandɛlek cɛbam kɔ cɛpom ca abil ηaηɛrɛη ηabɔp ηa dɛndo dɛpɛwosu. Kɔ afum fɔp ηampɛ dɛpɛwosu, ali wɛkin tes tɛnasɔtɔ fɛ.

¹ Nte sǎmpɛ ta tǎlǎm o tǎlǎm tǎsǎtǎ fum mǎ, k'aloku su a mokuru mamǎkǎ m'anjwe Malit.

² Kǎ afum aka di ɲasumpǎr su belbel. Kǎ ɲaɲkɛkǎrɛ su kǎkǎsayɛ nɛnc ndɛ ɲanacǎl teta wǎcafǎn wǎkǎ ɛnacop kǎtuf kǎ kǎfɛ mǎ.

³ Pol ɛnawɛtǎs yancan yǎlǎma nyɛ ɛnayi kǎcǎl dǎnɛnc mǎ, mba teta pǎwɔn, kǎ dǎf dowur yancan disrɛ kǎ dǎndɛtǎrnɛ kǎ dǎkǎca.

⁴ Nte aka atǎf ɲaɲǎkǎ ɲanǎɲk dǎf dɛdɛtǎrnɛ Pol dǎkǎca mǎ, kǎ ɲalokɛnɛ: «Fum wǎkawɛ tǎlǎma wǎdif afum ɔyǎnɛ, bawo ɛntɛp kǎccafɛ dǎkǎba, mba Pǎlɔmpu powosɛ fɛ nkǎn kǎyi doru.»

⁵ Mba kǎ Pol ɛwɛs abok nɲɛ dǎnɛnc, ali ta pǎncu kǎ-ɛ.

⁶ Afum akakǎ ɲackar a pǎɲkǎkǎf kǎ dǎnda abok ɲɛnadɛtǎrnɛ mǎ, kǎ pǎyǎnɛ fɛ ti-ɛ pǎtɛmpɛnɛ pǎfi. Nte ɲaɲkar kǎ pǎwɔn ta ɲaɲnǎɲk tǎlǎm o tǎlǎm tǎsǎtǎ kǎ mǎ, kǎ ɲasǎkpǎr tɛcɛm-cɛmnɛ tanjan, kǎ ɲaloku a kanu kǎ ɔyǎnɛ.

⁷ Kǎfo kanjǎ kǎsǎk antǎf ɲǎpǎɲ ɲɛnayi di ɲa fum wǎbɛki wǎpǎɲ wǎka mokuru mamǎkǎ wǎlǎma, pacwe kǎ Pubiliyu. Nkǎn ɛnasǎɲ su dǎkiyi dǎtǎt mata maas.

⁸ Papa kǎ Pubiliyu ɛnafǎntǎrɛ ta ɛntamnɛ-ɛ, fiba kǎ kupur yeyi kǎ. Kǎ Pol ɛmbɛrǎr kǎ, k'ǎntola Kanu, pǎcɛnǎr kǎ waca, k'ɛntamǎs kǎ.

⁹ Ti disrɛ kǎ acu aka mokuru alpǎs akǎ ɲander sǎ, kǎ ɲa sǎ ɲantamnɛ.

¹⁰ Kǎ aka dare ɲalɛlǎs su belbel, nte sǎndeyɛfɛ kǎkǎ mǎ, k'asǎɲ su ca yǎkǎ pǎnamar su kǎyǎ mǎ fǎp.

Pol kǎbǎp kǎn Rom

¹¹ Nte sǎncɛpǎrɛnɛ yof maas mǎ, kǎ sǎsǎtǎ abil nɲɛ ɲɛyɛfɛ dare da Aleksandǎr, kǎ ɲɛncɛpǎrɛnɛ

dɛrɛŋ mokuru ma Malit mɔ. Abil ŋaŋɔkɔ ŋ'ancwe «Diyɔskur.»

¹² Ntɛ sɛmbɛrɛ dare da Sirakus mɔ, kɔ sɛyi di mata maas.

¹³ Kɔ sɛyɛfɛ dɛndo, sɛsolnɛ agbɛp kɔ sɛŋkɔ sɛsumpɛr dare da Resiyo. Kɔ afɛf ŋa kɛca kɛtɔt ŋɛyɛfɛ dɔckɔsɔk, mata mɛrɛŋ disrɛ kɔ sɛmbɛp dare da Pusɔl.

¹⁴ Difɔ sɛnabɛp awɛnc su aŋa alaŋ akɔ ŋanatola su kɛyi di mata camɛt-mɛrɛŋ mɔ. Tɔkɔt tante tɔ sɛnakɔt kɛbɛrɛ dare da Rom.

¹⁵ Awɛnc su aŋa alaŋ a dare da Rom aŋɛ ŋanane tetosu mɔ, ŋander kɛfaynɛ su haŋ nde makit ma Apiyus, kɔ nde ancwe Dɛkiyi Maas mɔ. Ntɛ Pol ɛnɛŋk ŋa mɔ, k'eyif Kanu barka, k'ɛmbɛrɛnɛ sɔ kɛcɛp abɛkɛc.

¹⁶ Ntɛ sɛmbɛrɛ Rom mɔ, k'awosɛ Pol kɛyi taciŋa kɔ wɛsɔdar wɛkɔ oncbum kɔ mɔ.

Pol kɛcam kɛn toloku tɔtɔt ta Kanu Rom

¹⁷ Ntɛ mata maas mɛncɛpɛr mɔ, kɔ Pol ewe afum alɛ aSuyif aŋɛ ŋanayi Rom mɔ. Ntɛ ŋambɛpsɛnɛ mɔ, k'oloku ŋa: «Awɛnc im aŋa, ali tes ilɛsɛrɛ fɛ afum asu, ali tes ilɛsɛr fɛ ta mes mosu mokur ma atɛm asu, mba ŋanasumpɛr im nde Yerusalem kɔ ŋambɛr im aRom dɛwaca.

¹⁸ Ntɛ ayifɛt im mɔ, abɛ akakɔ ŋanafan kɛsak im, bawo ŋananɛŋk fɛ ntɛ o ntɛ pɛmar padif'em mɔ.

¹⁹ Mba aSuyif ŋawosɛ fɛ. Ti tɛnasɔŋ'em kɛwe kiti ka wɛbɛ ka tɔf ya Rom fɛp ta ifan kɛboncɛ afum ɛm tɛs-ɛ.

²⁰ Tes tatɔkɔ tɔsɔŋɛ ntɛ ifan kɛnɛŋkɛ nu, isɔŋɛ nu ti kɛcɛrɛ mɔ, bawo teta kɛgbɛkɛr amera ka afum a Yisrayel kɛsɔŋɛ ntɛ ambɛr im gbɛkɛcɛ yayɛ mɔ.»

21 Kɔ afum alel a Rom ηaloku kɔ: «Ali areka ηefet ηin səsɔtɔ fɛ kəyɛfɛ atɔf ηa Yude tetam. Ali awɛnc su aηa wəkin ender fɛ pəloku su pɛlɛc pam.

22 Mba səfan a sən'am kəlɔk-loku mənə yati təkɔ mənɛm-cɛmne mə, bawo səncərə a kəgbəkələne kəyi mofo fəp teta kəgba nke məyi mə.»

23 Kɔ ηamboc tataka, kɔ nte dəsək dadəkɔ dəmbəp mə alarəm ηander nda Pol kəcəηkəl kɔ. Kɔ Pol ɛncmentər ηa pəsoku pɛs dəYecicəs Yosoku disrɛ mes ma dəbe da Kanu fəp, kəyɛfɛ sariye sa Musa kəbəp yecicəs ya Sayibɛ. Kəyɛfɛ bətbət haη dɔfɔy kɔ Pol ɛncsɛp kəsɔηɛ ηa kələη teta Yesu.

24 K'ɛηkafəli afum aləma kələη təkɔ oncloku mə, mba aləma ηanalan fɛ ti.

25 Nte afum ηancsakətɛnɛ kəgbəkələne disrɛ dəndo onclok-loku mə, kɔ Pol endəηər nte gbəcərəm: «Am- era Nɛcɛmpi ηa Kanu ηenalok-lokər atem anu bel- bel, dəYecicəs Yosoku ya aηnabi Esayi,

26 nte t'ɛnaloku:

«Məkɔ nnɔ afum akaηɛ ηayi mə, məloku:

Nəndewon kəcəηkəl, mba nəfɔdecərə!

Nəndewon kəgbətne, mba nəfɔdenəηk few,

27 bawo səbomp sa afum akaηɛ səfɔtam kəcərə,

ηasunc ləηəs, kɔ ηamɛp fər

ntɛ tɔηsɔηɛ ta ηanəηkɛ yi,

ntɛ tɔηsɔηɛ ta ηanene ləηəs yaηan.

Ta bəkəc yaηan yɔsɔηɛ ηa kəcərə,

ηadəkafələ, ηaluksərne nnɔ iyi mə, tɔsɔηɛ itaməs ηa.»

28-29 Nəcərə a kəηaηne ka Kanu kaηkɛ atɔyɔnɛ aSuyif η'anakɛrɛ ki, ηa ηandecəηkəl ki.»

³⁰ Kɔ Pol eyi kɛlɔ kɛŋkɔ ɔncɔŋ kɛway mɔ meren merɛŋ, difɔ akɔ ŋancfan kɛnɛŋk kɔ mɔ fɛp ŋancbɛp kɔ.

³¹ Pol pɛccam dɛbɛ da Kanu, pɛctɔksɛ afum teta Mariki Yesu Krist kɛlan fɛp disrɛ, ali tes ta ayamsɛr kɔ-ɛ.

Kitabu ka Kanu
Portions of the Holy Bible in the Baga Sitemu language
of Guinea
Des portions de la Sainte Bible dans la langue Baga
Sitemu de Guinée

copyright © 2015 Pioneer Bible Translators

Language: Baga Sitemu

Translation by: Traducteurs Pionniers de la Bible

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-29

PDF generated using Haiola and XeLaTeX on 29 Apr 2025 from source files dated 29 Apr 2025

e5320012-5c6f-534d-9205-97d787f9a95c